



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


### About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



8725  
DB89











# QVAESTIONES TERENTIANAE.

SCRIPSIT

EDUARDUS A BRUNER.

Ex ACTORUM SOCIETATIS SCIENTIARUM FENNICAE TOMO IX.

HELSINGFORSIAE


ex officina typographica Societatis litterarum Fennicarum

MDCCCLXVIII.



Vidi: C. R. Lindberg.

114869



## I. De canticis et tibiis fabularum Terentii.

Mirum est silentium, quo editores Terentii omnem in explicationibus suis singulorum mentionem canticorum, quasi aut nulla sint aut res nullius sit momenti, omittunt. Quae quidem res cum tamen in enarratione harum comoediarum satis sit gravis, esse autem in iis cantica veteres praefationes, quae Donati nomen praescriptum habent, multis verbis memorent, summae illius taciturnitatis causa ponenda est in incerto quodam statu hujus quaestionis, quo factum sit, ut, quod nondum ad liquidum perductum esse videretur, id tacitum praeterire placuerit. Et tamen jam postquam operae pretium eum esse facturum, qui cantica in Terentii et Plauti fabulis a diverbiis distingveret, hoc vero in Plauto plerumque facilius esse quam in Terentio, Godofredus Hermannus ante hos quattuor et quinquaginta annos dixerat \*), Godofr. Aug. Bened. Wolffius tertio decimo anno post id tempus eam ipsam rem, quam exquirendam Hermannus commendaverat, evolvere, etiam in Terentio, ita studuit, ut quaestionem non is quidem absolutam et perfectam, sed bene inchoatam neque postea reticendam reliquerit \*\*). Sunt nonnulla apud Terentium cantica, quae nihil habentia dubitationis existimari debuerint, quamquam de uno solo in commentariis Donati hoc esse canticum relatum est, neque plus quam duo metri tali a diverbiis differentia, ut versus cretici, bacchiaci, dactylici, choriambici inter iambicos et trochaicos recepti sint, lyricam naturam indicant, quae ex re ea maxime pendet difficultas cantica a diverbiis dignoscendi, quam in Terentio majorem quam in Plauto esse Hermannus ait. Evidem, cum jam ante cognitum mihi libellum Wolffii rem ab editoribus neglectam mecum dijudicare conatus essem, post eum mihi librum tandem ex antiquaria libraria Germaniae impetratum tam multa animadverti a Wolffio eodem modo recte constituta, ut in his nunc ejus, tamquam ducis, vestigia

---

\*) In dissertatione *de cantico in Romanorum fabulis scenicis*; v. ejus *Opuscul.* vol. 1 p. 298.

\*\*) *De canticis in Romanorum fabulis scenicis* (Halis 1824, programma Portense).

persequi videar, sed haec tamen ejusmodi fere esse, quae nullius oculos, paulo diligentiore adhibita pervestigandi cura, fugere oporteat, in aliis autem corrigenda esse, quae ille disseruit, et vel supplendam vel contra circumcidendam canticorum Terentii, quam proposuit, enumerationem; qualem ut praeterea neminem adhuc exhibuisse certum videtur, ita ne ad ulla quidem cantica hujus poetae demonstranda quisquam aliorum, quantum circumspicere potui, accessit praeter Benfejum et Grysarum, quorum ille tantum in annotationibus ad Andriam et ad Adelpheos et uno loco ad Eunuchum hujus rei meminit \*), hic autem in opere ad aliud spectante obiter pauca de eadem re disputat \*\*). Nec vero Wolffius de iis canticis, quae esse vere dixit, omnia attulit, quae ad probandum apta et ad explicandum necessaria fuerant afferenda; sed vix quidquam consideravit praeter varietatem et motum concitatum metri et acres atque vehementes sensus personarum secum loquentium. Quod non omnibus usus est notis cognitionis et iudicii, id cum ad alia, tum vero ad hoc pertinet, quod in quaerendo, quae partes fabularum cantica essent, nullam rationem habuit eorum, quae tradita sunt de cantu tibiarum in his comoediis. Ac tamen hujus cantus tum hilarior tum gravior et tristior natura certe haud minimum iis partibus fabulae, quae cantica erant, accommodata fuit, propterque eam causam nequaquam sunt inter se sejungenda, quae de canticis quaeque de tibiis statuuntur. Verum contorta et impedita quaestio sane est de modis musicis fabularum Terentii, quoniam ea, quae de harum tibiis in titulis sive didascaliis scripta sunt, saepius cum verbis praefationum Donati pugnant, magnaque insuper etiamnum est dissensio doctorum de ipsarum tibiarum ratione ac diversitate. Universae huic de tibiis quaestioni ut clarior lux e trac-

---

\*) „*Publius Terentius im Versmass der Urschrift übersetzt*“ (Stuttgartiae, 1837). — Editorem Terentii nullum observavi de singulis canticis quidquam attulisse, nisi quod Reinholdo in editione Eunuchi ad clausulam in act. 2 sc. 3 v. 1 aliquid de cantico subolet. Is vero tanta perversitate verba facit, velut quod etiam scenae superioris versus 53 et 54 canticum vel cantici partem esse ibidem (p. 116) arbitratur, ut facillime credam Friedlaendero (in Beckeri et Marquardtii Antiquitat. Roman. IV. p. 539, annot. 3453) et Grysaro (in ea, cujus titulus est infra, commentatione p. 371, annot. 1) librum ejusdem viri „*Ueber die Anwendung der Musik in den Komödien der Alten*“ (Pasewalciae 1839) „plane inutilem“ et „alucinantem“ esse, quem librum nihilo minus requisitum accipere mihi non contigit. In recentissima et uberrimis enarrationibus instructa editione Andriae (*Bibliotheca Latina minor*. II. Lips. 1865) — ut hoc exemplo utar — singula cantica ne verbo quidem monstrat Klotzius, vir clarissimus.

\*\*) „*Über das Canticum und den Chor in der römischen Tragödie*“; vid. commentationum Academiae litterarum Vindobonensis sub inscriptione *Sitzungsberichte der philosophisch-historischen Classe* collectarum tom. XV (anni 1855) p. 365 sqq.

tatione ejus nostra orta esse dicatur, fore fidenter speramus, ac fuit nobis propositum non minus de tibiis Terentianis quam de canticis judicium. Disquisitio ejus partis didascaliarum Terentii, quae est de modis musicis, non expedita ab iis est, qui complures nuper de his didascaliiis disseruerunt; quorum studiis sicut earum verba ad codicum scriptorum auctoritatem et ad artis criticae praecepta revocata atque e rebus dubiis et obscuris permultae enucleatae sunt \*), sic ad hanc rem explanandam illi vix quidquam contulerunt, quia neque generalem quaestionem de tibiis scenicis solverunt, aut recte in ea re judicarunt, et in Terentio ne quaesiverunt quidem, quomodo cantica modis tibiis respondissent \*\*).

Jam primum omnium dispicere conemur, quid pro vero ducendum, quid secus existimandum in iis sit, quae viri docti de tibiis cantu, quo tibicines antiqui fabularum scenicarum partes prosecuti sunt, statuerunt. Omnis hujus disceptationis fundamentum jecisse dici potest Salmasius \*\*\*), quoad de tibiis geminis, ab una eademque lingula aut a sua quaque incipientibus, quas simul unus tibicen inflabat, recte vidit *impares tibiis* tum vocatas esse, cum *dextra* et *sinistra* inter se differrent, acuta altera, altera gravis, *pares* autem, cum ejusdem essent generis, aut ambae dextrae, quemadmodum Eunuchum Terentii *tibiis duabus dextris* actam esse didascalia hujus comoediae refert, aut utraque sinistra. Haec inter omnes fere postea convenerunt, sed exstitit dissensio de hoc inprimis, unde multa pendent, utrum ea tibia, quae dextra appellatur, an quae sinistra, graviter aut contra acute sonuerit. Salmasius non dubitavit fidem adjungere illis, quae sunt in fragmento, ut inscribitur, Donati de comoedia: *Agebantur autem (fabulae) tibiis paribus aut imparibus*

---

\*) Librorum permagnam copiam contulit et in re critica praecipue versatus est Gelpertus („*Ueber die Terentianischen Didaskalien*“, in *Archivi philolog. et paedagog.* Lipsiensis tom. XVIII p. 550—582). *De didascaliiis Terentianis* dissertationem haud levis ad quaestiones longius provehendas momenti edidit Vilhelmus Wilmanns Berolini a. 1864, aliam permulto minoris habendam, quae inscripta est *Didascaliae Terentianae explicatae*, Alfredus Kohl Halis Saxon. a. 1865. Commentatione, quam scripsit Carolus Dziatzko („*Ueber die Terentianischen Didaskalien*“, in *Museo philolog. Rhenano* anni 1865, p. 570—598, et a. 1866, p. 64—92), maxime ceterae quaestiones profecerunt, haec autem de tibiis non item.

\*\*) Unus in hoc excipiendus est Wilmannsius, quatenus, inter didascalias et Donatum de tibiis Eunuchi et Adelphorum ac Phormionis breviter disceptans, commemorat se naturam spectasse canticorum, de quibus auctorem citat Wolffium.

\*\*\*) In *Emendationibus et notis in historiae Augustae scriptores*, p. 494—496 editionis Parisiensis anni 1620. Iterum easdem res attigit in *Plinianis exercitationibus*, p. 119 sq. ed. Paris. a. 1629.

*et dextris aut sinistris. Dextrae autem et Lydiae\*) sua gravitate seriam comoediae dictionem pronuntiabant. Sinistrae et Serranae acuminis levitate jocus in comoedia ostendebant. Ubi autem dextra et sinistra acta fabula inscribebatur, mistim joci et gravitates denuntiabantur.* Qvibuscum, ut apparebit, plane conspirant, qvae de sonis dextrae tibiae et laevae quidam sibi persvaserat, qvi praefationibus Donati olim manum emendatricem imponere sibi visus est. Itaque longe plurimi, auctoritate Donati commoti, Salmasium hac quoque in re et antehac secuti sunt et hodie sequuntur \*\*); nonnulli vero Boeckhio, viro illustri, assenserunt, qvi verba Donati in scripto de comoedia perturbato ordine depravata esse judicavit, rationibus compluribus demonstrare studens \*\*\*), dextras fuisse sono acuto („*Discantflöten*“), sinistras contra gravi („*Bassflöten*“). Rationes Boeckhii singillatim refellendas nuper suscepit Wilmannsius (l. c. p. 37 sqq.), et profecto eae, qvales sunt, non possunt non labefactari. At vero, etsi argumentatio Boeckhii magnam partem vel falsa vel parum firma est, tamen sententia ejus de duarum tiliarum diversitate nihilo minus est vera, neque ullo modo contigit Wilmannsio contrariam opinionem auctoritate Donati suffultam stabilire.

Dijudicatio hujus quaestionis non minimum nititur in explicatione loci Varronis de re rustica I. 2, unde Boeckhius argumentum suae sententiae petivit, sed commenticium quoddam neque id, quod petendum fuit. Verba Varronis, quo dilucidius fiat, quid sibi velint, exscribamus haec omnia: *Certe, inquit Fundanius, aliud pastio, et aliud agricultura, sed affinis, et ut dextera tibia alia quam sinistra, ita ut tamen sit quodam modo conjuncta, quod est altera ejusdem carminis modorum incentiva, altera succentiva. Et quidem licet adjicias, inquam, pastorum vitam esse incentivam, agricolarum succentivam, auctore doctissimo homine Dicaeargo, qui, Graeciae vita qualis fuerit ab initio, nobis ostendit, ut superioribus temporibus fuisse doceat, cum ho-*

\*) Verba *et Lydiae* non in omnibus MSS. esse dicuntur, et pro iis in editione Klotziana anni 1838 legitur *tibiae*, sed ea hoc loco tuetur illud in praefatione Donati ad Adelpheos: *Modulata est tibiis dextris, id est Lydiis.*

\*\*) Exempla sunt etiam ea opera recentissima, qvae propositum sibi habuerunt, ut, qvae doctis pervestigationibus explorata essent, in conspectum docte proferrent, et vulgo maxime consuluntur, qvalia sunt Encyclopaedia Paulyana, Antiquitates Marquardtianae cum disquisitione Friedlaenderi de Indis, Guhl et Koner liber de vita Graecorum et Romanorum, Weissii de vestitu et supellectile aedificiisque antiquarum gentium, Richii Antiquitatum Romanarum lexicon, alia ut praeteream.

\*\*\*) Anno 1810 in Annalibus Heidelbergensibus humanitatis studiis dicatis et partis eorum 3:ae tomo priore, p. 165—170. De sententia sua non destitit, sed eandem profitetur in Opp. Pindari T. 1. P. 2. p. 259 (De metris Pindari lib. 3 cap. 11).

*mines pastoriciam vitam agerent neque scirent etiam arare terram aut serere arbores aut putare; ab his inferiore gradu aetatis susceptam agriculturam. Quocirca et succinit pastorali, quod est inferior, ut tibia sinistra a dextrae foraminibus.* Extrema Salmasius sic corrigenda censet: *ut tibia sinistra a dextra foraminibus*, dicens *inferior a dextra* pro *inferior dextra* vel *quam dextra* scripsisse Varronem antiqua consuetudine, cujus tamen nulla exempla ad aetatem Varronis, omnia ad infimam latinitatem pertinent \*). Quam probans correctionem, ait Boeckhius verbis Varronis evidenter indicari tibiam dextram plura habuisse foramina quam sinistram; ex quo confici, ut sonuerit acutius. Horum prius illud Wilmannsius male concedit; alterum vero sic effici cogique posse recte negat: nam rei natura refutari vere contendit hoc placitum Salmasii a Boeckhio repetitum et contra auctorem versum, „acutius tinnire tibias et clarius, quae pluribus foraminibus apertae sint, quam quae paucioribus.“ At nihil de numero foraminum Varro; qui si diceret foraminum aut, ut interpretatur Dziatzkius \*\*), sonorum numero inferiorem aut, ut Grysarum \*\*\*), vi soni infirmiore, quam dextram, laevam fuisse, qualis tum esset collatio vitae pastoralis et agrorum culturae vel cum tibiis vel inter se collatarum? Insulsissima sane et falsissima, quia et prorsus nulla appareret similitudo, quam haberent in hoc genere cum tibiis, et tamen agricultura in inferiore quodam gradu dignitatis, quam pastio, reposita induci videretur.

\*) Cftr. de hoc usu Handius in Tursellino I. p. 44. Qvi erravit, quod eodem retulit Plin. N. H. XVIII. 13. 34: *Quamquam prius de rapis dixisse conveniat, — in transcurso ea attingere nostri, paulo diligentius Graeci, et ipsi tamen inter hortensia, — si justus ordo fiat. a frumento protinus aut certe faba dicendis, quando alii usus praestantior ab his non est.* Quo loco ab his (Handius ab iis) idem valet, ac post l. secundum haec (frumentum et fabam), neque potest idem esse ac *quam his* (rapis). Sed pro alii, cujus loco in libris MSS. est etiam *alius*, legendum videtur *aliis*.

\*\*) Ejus verba haec sunt p. 595: *Aus der Stelle Varros kann ich nicht mit Böckh folgern, dass die sinistra tibia tiefere Töne gehabt habe als die dextra, sondern nur, dass diese als obligates Instrument (incentiva), jene zur Füllung (succentiva) angewendet wurde, womit übereinstimmt, dass die t. sinistra „inferior a dextrae foraminibus“ war, also wohl weniger Töne umfasste.* Ergo agriculturam quoque censeamus apud Romanos appendicem quendam pastionis et minoris momenti existimatam?

\*\*\*) Ait p. 378: *Dass die dextera vermöge der tieferen Tonlage einen etwas stärkeren Klang hatte, so wie umgekehrt die sinistra einen schwächeren, ist ganz natürlich. Dadurch aber erklärt sich eine Notiz bei Varro, wo er von dem Zusammenspielen beider Flöten sagt: Succinit tibia sinistra, quod est inferior, a dextrae foraminibus, d. h. das Spiel der sinistra ist für die stärker tönende dextera ein untergeordnetes Accompagnement.* Ordinem verborum Varronis temere mutavit et interpunctionem; non enim tibia ab alterius tibiae foraminibus, sed tantum a suis ipsius succinere potuit.

Atqui usus est Varro imagine et apta et vera. In qua ut *inferior* utrobique in ultima sententia ad ordinem rerum, quarum altera alteram excipiat, neque de duobus rei rusticae generibus ad hoc quidem, sed de tibiis mirum in modum ad aliud quiddam, ad copiam, vim, dignitatem, spectat, ita in verbis *a dextrae foraminibus*, in quibus nihil mutandum est, — etsi fuerunt, qui ea omnia, sibi non intellecta, tamquam spuria exterminari voluerint, — *u* particula designat, post quam rem vel cuius rei respectu posterius res alia veniat \*). Dicit Varro rem pecuariam et agriculturam, quamvis dissimiles, optime inter se concinere, et hunc earum concentum sic esse, ut tibiium dextrae et sinistrae, quarum sit in illa dissimilitudine egregia concordia: incentivam pastionem videri, quippe quae aetate fuerit superior, alteramque succentivam, quemadmodum in tibiis prior audiatur dextra eique laeva succinat, ut quae sit *inferior a dextrae foraminibus*, h. e. suam vocem effundere incipiat post dextram, cuius foraminibus inferiora laevae posterius flatu tibicinis attingantur atque operculis apertis penetrentur. Jam vero haec quid sint, declarat locus Macrobiani (comment. in somn. Scipionis II. 4), de tibiis sic loquentis: *De quarum foraminibus vicinis ori infantis sonus acutus emittitur, de longinquis autem et termino proximis gravior \*\*)*; cum quibus verbis componenda sunt haec Censorini (de die natali c. 9): *Tibiae incremento longitudinis sunt graviores*. Rem illustrat pictura antiqua \*\*\*), in qua tibicen ad aram geminas tibias inflat, de quibus dextra brevior, sinistra perlonga est, hujus autem foramina obliqua, prominentibus operculis sive paxillis signata, a media fere parte tibiae deorsum collocata sunt, dum nulla apparent foramina dextrae, qua sola, etsi ambae ore tenentur, cum maxime cani videtur, praecclusis foraminibus sinistrae: quo in exemplo ideo dextra et *incentivam*, utpote quae etiamnum sola sonos edere videatur, et *acutam*, quippe quae multo, quam sinistra, brevior sit, oculis se praebet. Ergo, his adjunctis te-

\*) De hoc usu praepositionis (velut Cic. Acad. I. 12. 46: *Carneades quartus ab Arcesila fuit*, et Plin. N. H. XVIII. 13. 34, de quo loco paulo ante dictum est) vid. Handii Tursell. I. p. 43 sq. sub III. — Non absurde, immo recte faciat, si quis Varronem in paenultima enuntiatione ita interpretetur: *ab his* (temporibus) *inferiore gradu aetatis*.

\*\*) Auctorem citans Porphyrium ad Ptolemaei Harmonica I. p. 217, quo commentario uti mihi non contigit, Fortlagius dicit in Encyclopaedia Paulyana VI. p. 608: *Das Oeffnen der oberen und Schliessen der unteren Löcher gab die hohen, das umgekehrte Verfahren die tiefen Töne*.

\*\*\*). Vide tabulam 10 seriei 4 picturarum in opere, quod inscribitur: „*Herculanum und Pompeji. Vollständige Sammlung der daselbst entdeckten Malereien, Mosaiken und Bronzen. Gestochen von H. Roux aîné. Mit erklärendem Text von L. Barré. Deutsch bearbeitet.*“ — De his tibiis deque operculis foraminum tibiium antiquarum plura post dicentur.



stimoniis, satis perspicue Varro testatur vocem eam, quam nos appellamus *diskant*, e tibiis imparibus dextram habuisse, quam svecice *bas* vocamus, sinistram. Nunc praeterea hoc tantum monemus, leges musicae antiquae, si in tiliarum cantu imparium generatim atque omnino gravi sono incini, acuto succini jussissent, non minus mire a musicis rationibus temporum nostrorum discessuras fuisse, quam si idem in concentu assae vocis praecepissent, quamquam rationem justae contrariam, si res ita ferret, inire operculis acutae tibiae clausis licuisse intelligitur. — Postquam igitur nunc ad idem, quo per Varronis verba viam Boeckhius monstraturus erat, sed alio itinere atque meliore per eadem verba et alia quaedam indicia perventum est, viro summo astipulamur in iudicando de hoc Appuleji Madaurensis e Florid. I. 3. 11: *Primus Hyagnis in canendo manus discapedinavit; primus duas tibias uno spiritu animavit; primus laevis et dexteris foraminibus, acuto tinnitu et gravi bombo concentum musicum miscuit*. Quo loco sonum gravem dextrae, tinnientem laevae tibiae attribui cum planum Salmasio et aliis visum esset, Boeckhius breviter admonuit, quam frequenter scriptoribus veteribus in afferendis notionibus contrariis institutum ordinem verborum invertere placuerit: propterea nihil obstare, quominus tinnitus ad dextram et bombus ad sinistram referantur. Sed quo perspiciatur necesse esse apud Appulejum chiasmum agnoscere, subijcimus testimonia ex artis monumentis prolata et scriptorum quorundam aliorum. Appulejus verbis illis et pluribus de ipsa inventione tiliarum geminarum loquitur, quam rem omnes veteres Phrygiis ascribunt, Appulejus Hyagnidi Phrygi, Euripides (Iphig. Aulid. 576 sq.) Olympo, homini item Phrygio, Plinius (N. H. VII. 56. 57) Marsyae, filio Olympi aut, ut alii, Hyagnidis. Phrygias autem tibias geminas, et quidem speciem quandam earum antiquissimam — id quod ob paucitatem foraminum affirmandum est\*), — Varro, a Servio ad Aen. IX. 618 testis productus, ita describit: *Tibia Phrygia dextra unum foramen habet: sinistra duo, quorum unum acutum sonum habet, alterum gravem*. In imaginibus, quas artium monumenta proponunt, binis tibiis Phrygiis cani videmus, e quibus dextra recta, sinistra ad terminum curvata atque cornus similis est\*\*). Nunc quaero: num dubium

\*) Tibiis praeae vetustatis pauca fuisse foramina Horatius dicit Ep. ad Pison. v. 203; ad quem locum Porphyrio annotavit: *Terna enim tantummodo foramina habuit antiqua tibia*, Acro autem haec: *Varro ait in III Disciplinarum et ad Marcellum de lingua latina: quatuor foraminum fuisse tibias apud antiquos; et se ipsum ait in templo Marsyae vidisse tibias quatuor foraminum. Quare quaterna tantum foramina antiquae tibiae habuerunt; alii dicunt non plus quam tria*.

\*\*) Vid. Ennii Q. Viscontii *Musée Pie-Clémentin*, tom. 2, tab. b. IV; Bartholini li-

habendum est, quin gravis bombus, quem dicit Appulejus et acuto tinnitui opponit, e cornus Berecyntii, quod a laeva parte est, foramine emissus sit? Haec illa fuit curva Phrygum tibia, quae eadem cornu dicitur (Horat. C. I. 18. 14), quam et multi saepe scriptores commemorant, et Catullus *grave* cecinisse (LXIII. 22) atque *raucisonos bombos* efflasse (LXIV. 263) narrat, quam etiam Athenaeus spectat (Deipnosoph. lib. IV. p. 185, — edit. Schweighaeus. T. 2. p. 197), ubi allato versu e tragoedia Ionis, in quo de tibia gravi mentio fit, Phrygiam significari explicat, addens: βαρὺς γὰρ οὗτος (αὐλός) παρ' ὃ καὶ τὸ κέρας προσάπτουσιν, ἀναλογοῦν τῷ τῶν σαλπύγγων κώδωνι. Sponte igitur sequi videtur, ut dextra tibia acute sonuerit. Verumtamen a Varrone docemur in hoc quidem genere vetusto Phrygio tibiatarum imparium etiam uni foramini sinistrae, quod ori canentis propius erat, sonum acutum fuisse; quae ratio accommodata, opinor, fuit naturae moduli Phrygii, quem de tribus modis musicis principalibus inter summam gravitatem Dorici et summum acumen Lydii modi medium locum tenuisse traditum est \*). Fac vero praeter foramen cornus id quoque, quod in dextra tibia erat, sonum habuisse gravem: quia ratione, si ita fuisset, mediocritas illa et temperatio gravitatis et acuminis Phrygia oritura fuerit, perspicui prorsus nequit. Sed hoc concludi potest, rem ab origine tibiatarum geminarum ita institutam fuisse, ut acutus a primo sonus incineretur et huic acuto gravis responderet \*\*), posteaque munus et nomen incentivae e tibiis imparibus rectis acutae dextrae, succentivae autem gravi sinistrae mansisse, et cum deinde ad vim ejusdem modi musici augendam binis tibiis paribus uti homines coepissent, latine quidem his ambabus ob naturam soni, quem singulae in imparium societate edebant, vel dextra-

---

ber de tibiis veterum p. 194; Gerhardi *Archäologische Zeitung* anni 1850, tab. XX, imag. 1; Weissii *Kostümkunde*, II. p. 1317, fig. 529 d. Has et similes Phrygias tibias esse omnes consentiunt. Curva tibia sinistrorsus et recta dextrorsus manu tenentur etiam in Musei Pio-Clementini tom. 5 tab. VII, ubi tibiis non canitur. Foramina nulla obliqua in his exemplis cernuntur. Sed tria apparent supra cornu sinistrae in imagine, quae est in Viscontii tom. 5 tab. C (ultima).

\*) De his et ceteris modis musicis vid. praecipue Claudii Ptolemaei *Harmonica*, lib. 2 cap. 10. Tres illos principales commemorat praeter alios scriptores veteres Plutarchus de musica c. 8. — Boeckhius dicit p. 170: *Die dreierley Flötengattungen, Sarranae, Phrygiae, Lydiae, entsprechen den drey ältesten Tonarten, der tiefsten dorischen, der mittlern phrygischen, der höchsten lydischen*. Tibias vero scenicas omnino in tres classes illis nominibus inscribendas describi posse non video.

\*\*) Is est apud Appulejum usus chiasmi, ut, postquam laevae tibiae mentionem ante dextrae posuit, non forte, ut videtur, et casu in ipsis sonis nominandis horum ordinem sic indicaverit: *acuto tinnitu et gravi bombo concentum musicum miscuit*.

rum, i. e. acutarum, vel sinistrarum, i. e. gravium, appellationem obtigisse\*). Impares tibiae omnes dictas et dicendas Phrygias esse nihil persvadet, quamvis a Phrygiis totum hoc genus ortum sit; nam Phrygiarum nomen proprium earum fuisse videtur, quarum altera curva fuit. Has Graeci etiam *ἐλύμους ἀύλους* (Athenaei lib. IV. p. 176 sq.), rectas vero impares aut certe earum quandam speciem *γαμήλιους* (Pollucis Onomast. lib. IV. segm. 80) vocitabant. Sed exemplum Phrygiarum id quoque habendum est, quod ad locum Varronis de re rust. I. 2. declarandum adhibuimus; etsi enim perlonga sinistra tibia ceteroquin recta est, in ipso extremo termino corniculum sursum versus adjunctum habet, ut admoneamur de verbis Athenaei paulo supra prolatis: *παρ' ὃ καὶ τὸ κέρασ προσάπτουσιν*. — Praeterire hic non licet illa Solini, ad quae etiam paulo post lectorem relegabimus: *Thermitanis locis insula est harundinum ferax, quae accommodatissimae sunt in omnem sonum tiliarum, seu praecentorias facias, quarum locus est ad pulvinaria praecinendi, sive vascas, quae foraminum numeris praecentorias antecedunt, seu puellatorias, quibus a sono clariore vocamen datur, sive gingrinas, quae, breviores licet, subtilioribus tamen modis insonant, aut milvinas, quae in accentus exeunt acutissimos, aut Lydias, quas et turarias dicunt, vel Corinthias vel Aegyptias aliasve a musicis per diversas officiorum et nominum species separatas* (c. 11): ubi quae tibiae nominantur praecentoriae, eas fuisse easdem ac Varronis incentivas Salmasius propter nominum similitudinem opinatur, atque eas tibiae indicio Varronis dextras fuisse et, quod minore, quam vascae, quas nihil aliud quam sinistras habendas dicit, foraminum numero instructae essent (cfr. supra p. 7), graviter sonuisse affirmat. Ac recentissimo tempore in encyclopaedia Paulyana vir quidam doctus *incentiva* et *praecentoria* ejusdem tibiae nomina esse contendit et huic tibiae verborum quorundam causa, quae Solini esse ait, sed sunt Salmasii, gravitatem soni ascripsit\*\*). Probatum

\*) Huic loco apponamus e Boeckhii argumentatione haec verba (p. 168), in quibus ratio habetur discriminum omnium in tibiis apud Donatum commemoratorum (v. supra p. 6): *Das ganze Alterthum nennt alles Fröhliche, Heitere, Glückliche rechts, alles Düstere, Traurige, Unglückbedeutende links; sollte es in der Musik, die dem Gemüthe so nahe liegt, eine Ausnahme gemacht haben? Die dextra tibia muss die fröhliche, die sinistra die düstere, jene die hohe, diese die tiefe seyn*. Quae fuerit origo appellationis *dextrarum tiliarum* et *sinistrarum* t., supra hoc ipso loco indicatum est, quo pertinet, quod illud est apud Festum p. 74 Muell.: *Dextra auspicia prospera* et deinceps: *Dextrarum tiliarum genus est, quae dextra tenentur* (videlicet, nisi utraque tiliarum geminarum dextra est); sed nihilo secius aures Romanas offendere sane debuit, si *sinistrae* nominatae essent tibiae laeta, *dextrae* tristia nuntiantes.

\*\*) Haec in Solini cap. 2 inepae

VL 2. p. 1946, s. v. *Tibia*: „Praecentorias

esse incentivam et praecentoriam eandem fuisse tibiam Boeckhius paucis contra Salmasium negat; et vero aliam praecentoriam fuisse ex ipso nomine et ex usu ejus colligendum est: denominata enim ab eo esse traditur, quod ad pulvinaria, i. e. non ad sacrificia, ut putat Bartholinus \*), sed ad lectisternia praecinuerit, quemadmodum *deorum pulvinaribus et epulis magistratuum fides praecinuisse* memorat Cicero (Tusc. IV. 2. 4): quid ergo huic praecentoriae commune fuit cum ea tibia, quae in imparium cantu ab incinendi officio nomen acceperat? Gravitas quaedam soni praecentoriae non defuisse videtur, sed non eam ob causam, quam finxit Salmasius, verum quia Solinus, cum in aliquot exemplis demonstrare vellet, quomodo Thermitanae insulae calami omnibus sonis apti essent, tot postea attulit exempla tiliarum magis magisque, ut ipsius verba declarant, acute sonantium \*\*). Sed haec hactenus. — Nolumus verbosius loqui de argumento e Plinii N. H. XVI. 36. 66, qui locus cum Theophrasti Hist. plant. IV. 11, unde sua, nunc non integra, Plinius excerpserit, comparandus est, a Boeckhio assumpto, cui ipse multum tribuit. Id non tanti esse momenti Wilmannsius p. 37 sqq., Theophrasti interpretationem secum privatim ab ipso Boeckhio communicatam afferens, ostendit, sed ad rationem mutuam tiliarum dextrae et sinistrae dijudicandam etiam Theophrasti verba nihil valere tamen non recte arbitratur. Omnia ad rem pertinentia huc redeunt, ut dicat Theophrastus e lacus Orchomenii arundinibus lingulas dextrae et sinistrae tibiae ita deligi, ut ex eodem ejusdem arundinis internodio utraqve sumatur, sed e superiore parte in duas partes dissecti internodii lingulam dextrae et ex inferiore sinistrae \*\*\*). Jam quoniam, ut ipse commemorat Wilmannsius, inferior pars internodii arundinum crassior, quam

---

vocant dextras, quae propter gravitatem soni ad pulvinaria deorum et aras inflari solebant, quales et spondaicae tibiae, quibus σπονδαῖα et ἐπιβώμια μέλη caneantur. Verum haec opiniones et ipsa verba sunt Salmasii ad Hist. August. script. p. 495.

\*) *De tibiis veterum et earum antiquo usu* (Amstelodami 1679), p. 189: „Et has, quibus praevis victimas obtulerunt, eas fuisse credo, quas Praecentorias tibiae vocarunt, quemadmodum Thurarias, quibus usi sunt, cum thus in aram inderent nec immolarent hostias.“

\*\*) De tibia vasca O. Jahnius disputat in „*Berichte über die Verhandlungen der Königl. Sächsischen Gesellschaft der Wissenschaften zu Leipzig: Philolog. historische Classe*“, tom. 3 p. 169 sqq. Vasca cum apud Solinum foraminum numero praecentoriam antecessisse dicatur, praecentoria non solum dissimilis eo modo fuisse, sed aliquam etiam similitudinem cum vasca habuisse et propterea obliqua s. πλαγίανλος ideoque monaulos fuisse nobis videtur.

\*\*\*) Theophrastus dicit l. c.: συμφωνεῖν δὲ τὰς γλώττας τὰς ἐκ τοῦ αὐτοῦ μεσογονατίου, τὰς δὲ ἄλλας οὐ συμφωνεῖν καὶ τὴν μὲν πρὸς τῇ ὀλῇ ἀριστερὰν εἶναι, τὴν δὲ πρὸς τοὺς βλαστοὺς δεξιάν. τμηθέντος δὲ δίχα τοῦ μεσογονατίου τὸ στόμα τῆς γλώττης ἐκατέρως γίνεσθαι κατὰ τὴν τοῦ καλάμου τομήν.

superior, est, et nostra aetate tibiae graves, velut quae sunt in organo pneumatico, non modo longiores, sed etiam crassiores, quam acutae, esse solent, sane videtur ea tibia, cui lingula ex inferiore segmento, id est crassior, fuit, tota crassior fuisse, id est gravior; quae argumentationis via non fugit Wilmannsium, sed immerito ab eo despecta est \*). — Ut est apud Censorinum l. c.: *tibiae incremento longitudinis fiunt graviores*, ita et ratio evincit et nostrorum temporum usus docet necesse esse, tibiae graves longiores acutis sint. Qvocirca ad omnem litem de sonis tibiae dextrae et sinistrae dirimendam nihil opus esse videatur aliud, quam ut monumentorum imaginibus alterutra opinio sine ulla repugnantia confirmetur. Et quia ad sonum *impares tibiae* ad visum etiam *numero foraminum discretae* (Fest. p. 109 Muell.) fuerunt \*\*), atque *de foraminibus vicinis ori infantis sonus acutus emittitur, de longinquis autem et termino proximis gravior* (Macrobius l. c.), expectandum erat, ut ab hac quoque parte res monumentis plane illustraretur. At horum conqueramur inconstantiam. Interpretationi nostrae loci Varroniani, qui est in primo libro de re rustica, confirmationem adjecimus e pictura Herculanensi. Ecce autem etiam Wilmannsius ad testimonium veritatis suae de tibiis sententiae imagines monumenti cujusdam cum Macrobius iisdem verbis vocavit. Nam inter figuras, quae in pariete antri sepulchralis Cyrenaici pictae inventae sunt, duae tibicinae binis tibiis canunt, e quibus tibiis utraque dextra re vera propius ad terminum, quam laeva, minus prope, quam haec, ad lingulam accedentia opercula foraminum habet \*\*\*). Hoc ille magno documento esse putat, sed jure valde dubitare licet, numquid ad rem pertineat. Primum enim in utraque figura ambae tibiae longissimae sunt, ut gravem sonum a nulla tali abjudicaveris, et altero loco non discernitur, utra tibia fortasse longior sit, quia ipsi termini non dispiciuntur, altero autem dextra sinistram tam perpaulo superat, ut dissimiliter promotae, sed ad longitudinem aequales haberi recte possint. (Neque de longitudine earum quidquam vir doctus). Deinde utraque tibiae, etsi foramina obliqua magnis paxillis longo ordine oclusa sunt, inflantur, et ob eam causam aut huc referendum est illud

\*) Hoc, quod contra opposuit, nihili esse censuerim: „Sed quamquam inferior internodii pars paullo crassior est quam superior, foramen partis inferioris, siquidem ex nostra arundine de lacus Orchomenii arundine conicere licet, paullo angustius est, ita ut ratiocinatio modo prolata plane evertatur.“ — De tibiis foraminibus, per quae soni exhibant, Macrobius l. c. adjecit: *item acutior (sonus emittitur) per patentiora foramina, gravior per angusta.*

\*\*) Nimirum, opinor, plura in longiore tibia foramina erant, quam in breviori.

\*\*) Vide Wieseleri *Theatergebäude und Denkmäler des Bühnenvesens bei den Griechen und Römern*, tab. XIII, imag. 2.

καταπλασμένον, de quo Qvintilianus I. 11. 7: sic appellatur sonus tibiaram, quae praecclusis, quibus clarescunt, foraminibus recto modo exitu graviores spiritum reddunt, aut credere necesse est aliquot foramina aperta eoque — ut ob id ipsum fit in imaginibus tibiaram, quarum foraminum loci plerumque non apparent, nisi illa clausa sunt — non aspectabilia esse \*); hoc autem si verius est, nihil conjici potest e locis foraminum apparentibus. Sed quamquam hoc exemplum a Wilmannsio allatum vix quidquam valet, neque opinio, quam amplexi sumus de tibiis dextra et sinistra, monumentis refellitur, horum imaginibus tamen non ubique adjuvatur. Ubi enim tibiae geminae inaequalis sunt longitudinis \*\*), modo sinistra \*\*\*), modo rursus, sed tamen, quod sciam, multo rarius, dextra \*\*\*\*) longior est quam altera. Foraminum autem obliqvorum signa raro accurate observari possunt. Talis igitur varietas est, quae universa vel a regionum et temporum et multorum ipsarum tibiaram generum diversitate vel a quadam in hisce imaginibus deformandis incuria veterum †) repetenda videtur, ut, quemadmodum difficultates omnes in singulis

\*) Hac in re observetur astare ad eas tibiae, quarum extremae partes conspiciuntur, hominem has longas tibiae, quae alte a tibicina sublatae sunt, digitis suis sustentantem et fortasse paxillos foraminibus insertos extrahentem. Nam in tibiis antiquis opercula foraminum non sunt similia iis, quae nostrorum temporum tibiae habent, sed longe exstantia videntur in foramen immissa ac rursus plane de tibia detracta esse.

\*\*) Parium tibiaram cum plurima exempla inveniuntur, tum notabiles sunt imagines, in quibus etiam utrimque foramina inter se aequaliter respondent, apud Viscontium, Mus. Pio-Clement. tom. IV tab. XV, et apud Montefalconium in *L'Antiquité expliquée*, tom. II tab. LXXXI. In illis tibiis, quae non inflantur, foramina operculis tecta sunt, in his, quibus cum maxime canitur ad aram, in quam ante immolationem merum defundit imperator Trajanus, et quae totae sunt *apertae* (v. Qvintilian. XI. 3. 50), ideo tantum ipsa foramina cernuntur, sed nusquam opercula; quod monuimus propter annotationem nostram superiorem.

\*\*\*) Vide ex. c. Viscontii Mus. Pio-Clement. tom. IV tab. XXV; Gerhards commentarios, ad quos supra ablegatum est, anni 1845, tabulam XXXVI, imag. 3; Wieseleri libri cit. tab. XIII imag. 6 (in corpore tabularum Hercul. et Pompej. supra citato imag. 13 ser. 2 pictur.); Weissii lib. c., II. p. 1817, fig. 529 b.

\*\*\*\*) Vid. ex. c. inter tabb. Hercul. et Pompej., ad quas relegavimus, tab. 31 ser. 6 picturarum et imaginem, quam proponit Richii lexicon s. v. *Tibiae impares*, quae e genere Phrygio est et conspicitur etiam apud Bartholinum p. 60. Euterpe geminas tibiae, longiorem dextra manu, aliquanto brevioris sinistra tenet, sed neutram inflat, in Mus. Pio-Clem. tom. I tab. B. 2, quod annotavit Wilmannsius (p. 40); in qua figura sunt tibiae, quae a dextra parte est, foramina operculis longe eminentibus signata duo, alteri sex.

†) Dicit Fortlagius in encyclopaedia Paulyana s. v. *Rhythmica* (VI. 1. p. 605): *Unter den auf uns gekommenen Abbildungen von antiken Instrumenten verdienen nur die den sorgfältigsten Stempel der Wirklichkeit an sich tragenden ägyptischen eine genauere Beachtung,*

exemplis removeantur, frustra circumspicias. — Magnum vero et firmum argumentum sententiae suae hoc proponit Boeckhius, quod, cum e modis musicis antiquitus numeratis tribus, ut supra relatum est, acutissimus fuerit Lydius, Lydiae tibiae, quae apud Donatum et dextrae dicuntur et graves, graves esse non potuerint. Qvo nihil est evidentius. Itaque tibiae dextrae, modo eadem aut ejusdem generis essent ac Lydiae, — neque in hoc ponendus videtur error, qui quomodo inter Donati verba irrepserit, declarare posterius studebimus, — acutae necesse est fuerint. Salmasius, dextras a Donato Lydias appellari miratus, illuc confugit, ut Lydias tibias non a modo Lydio, sed pro Tyrrhenis sive Tuscis, quod Etrusci gens Lydia putati essent, vocatas esse contenderit (Plinian. exercit. p. 120). Qua originatione, quae auxilium quasi ultimum frustra quaerere videtur\*), non magis quisquam acquiescere debet, quam opus esse potest accurate, quod Wilmannsius postulat (p. 43), demonstrare tibias dextras vel Lydias a modo Lydio nomen habere. Vidisse enim satis est non tam perverse loqui antiquos homines potuisse, ut acutas tibias Lydii moduli sonis instructas, sed graviter sonantes Lydias dixerint. Ipsam vero Lydiam tibiam Lydio sono, id est summo vocis acumine, insignem fuisse nihil planius facere mihi videtur, quam quod, ut Athenaeum IV. p. 185 memorantem video, Ion in versu quodam, quem affert Athenaeus, hanc tibiam ἀλέκτορα nominat. Neque quidquam proficitur argumentatione Wilmannsii, qua versus Horatii: *Virtute functos, more patrum, duces Lydis remixto carmine tibiis Trojamque et Anchisen et almae Progeniem Veneris canemus* (C. IV. 15. 29 sqq.) aperte ostendere ait „non tam tenues atque molles tibiis Lydiarum fuisse cantus“: quasi vero ea vox, quae *diskant* nominata est, necessario tam mollis sit, ut heroum laudibus indigna videatur\*\*). Interpretibus Horatii plerisque eo satisfactum est, quod commemora-

indem die der griechischen Bildwerke meistens eine solche Unvollkommenheit zeigen, dass man sie nur für traditionelle Typen mythischer und vorgeschichtlicher Tonwerkzeuge halten kann.

\*) Num enim credibile est, ne quid moneamus aliud, etiam Graecos τοὺς ἀλὺοὺς Ἀυδίους (cfr. ex. c. Pindar. O. 5. 45) ab Etruscis accepisse et ex horum originibus nominasse, aut tibias Lydias Romanis alias, alias Graecis fuisse?

\*\*) Herodotus I. 17 inter instrumenta musica, quibus Alyattes, rex Lydorum, in exercitu usus sit, ἀλὺὸν γυναικῆϊόν τε καὶ ἀνδρῆϊον fuisse narrat, hisque tibiis nominibus dextram et sinistram designari intellectum est, de qua re cfr. Boettigerus in Wielandii *Attisches Museum* I. 2. p. 334 sq. et editores Herodoti (quamquam falso, ut fieri solet, dextrae tibiae gravem et sinistrae acutam vocem adjudicant); apparet autem in Graecis illis appellationibus naturalem differentiam femineae et virilis vocis spectatam, nec vero idcirco dextrae tibiae effeminatam et enervem molliam ascriptam esse.



tur etiam in hac annotatione Acronis: *Lydis tibiis laeta cantabantur, Phrygiis tristia*, et sane ob eam causam, quam haec verba continent, in laetissimo, quem poeta describit, rerum statu et *inter jocos munera Liberi* tibiis Lydiis locum opportunum fuisse fatendum est \*). Atque insuper quiddam accedit, quod ab his Horatii versibus omnem offensionem avertat \*\*). Inter tibiae, quarum genera quaedam Solinus enumerat l. c., invenimus etiam: „*Lydias, quas et turarias dicunt*“, et earum fit mentio continuo post complura nomina item haud dubie acutarum. Hae tibiae quod etiam *turariae* vocatae sunt, id explicationem desiderat. De turariis tum adhibitis, cum tus in honorem deorum accensum est, ipsam appellationem testari liquet. Id vero ad quaestionem non sufficit. In sacrificiis, cum victima aut hostia immolanda esset, ante immolationem tura in ignem arae injiciebantur et merum superfundebatur. Hinc autem turarias vocatas esse non est verisimile; nam quae tibiae in his sacrificiis auditaе sunt, eae non tantum ad turis et vini injectionem, sed ad totum sacrificium pertinuerunt; eademque perlongae erant, quales eas videmus in imaginibus \*\*\*), i. e. clarissime et gravissime sonabant, dum, ne quid mali ominis in sacificatione exaudiretur, cavebatur, quare in columnae Trajanae prostypis, ubi ante victimas immolatas vinum arae infundit imperator, astante cum acerra turaria camillo, etiam tubae et cornua militaria simul inflantur \*\*\*\*). Sed moris fuisse notum est etiam *ture et mero*

\*) In conviviis Lydium modulum adhiberi solitum memorat Plato de Republ. III. 10, et convivalem proponit tibiam Lydiam Luciani Dialog. Mer. XV p. 322, quod non praeterierunt editores Horatii. — Ceterum apud Platonem l. c. harmonia Lydia non solum *ξυμποτική* vocatur, sed etiam *μαλακή* et *χαλαρά*, eademque a Plutarcho (de Musica c. 15) *ὀξεῖα καὶ ἐπιτήδειος πρὸς θοῆνον*, sicut Appulejus (Florid. IV. 17) *Lydium qveruhum* dicit, eoque modulo primum usum esse Olympum ad canendum *ἐπικήδειον* Plutarchus ait, addens tamen in nuptiis primum usurpatum secundum alios. Hunc modum reprehendens, a bellicosus viris alienum esse vult Plato, sed contra Aristoteles (Polit. VII. 8. 7) omnium maxime convenire putat institutioni puerili *διὰ τὸ δύνασθαι κόσμον τ' ἔχειν καὶ παιδεῖαν*. Itaque et varie judicatur hic modus musicus, et fuisse apparet in ipso magnam varietatem. Sed nihil variant judicia de acuto sono ejus et (si Donatum omittimus) tibiae Lydiae.

\*\*) Orellius offendit in *Lydis tibiis*. „Carmina tamen illa“, inquit, „in laudem veterum ducum Romanorum Lydia harmonia canenda vix serio dixit, ut multis videtur, sed *Lydis* merum est *ἐπιθετον* poeticum.“

\*\*\*) V. librum Bartholini de tibiis veterum p. 190, 192, 196 et Richii lexicon s. v. *Tibia longa*. — Etiam Phrygiis tibiis in sacrificiis hisce utebantur, cujus rei exemplum praeter alia exstat in ea imagine Herculanensi, quam ad locum Varronianum de re rust. I. 2 commemoravimus, in qua, dum hostia ad aram versus ducitur, vinum in ignem de patera funditur.

\*\*\*\*) V. Montefalconii *L'Antiquité expliquée*, tom. 2, tab. LXXX et LXXXI (in qua

*supplicare* sine hostiis: qvo in sacrificio projecta sunt in ignem accensum tura, *pingves facientia flammis* (Ovid. Trist. V. 5. 11), et a stridentibus et alte emicantibus, cum vinum infunderetur, flammis bonum omen petatum est (Ovid. sq. vers. et Heroid. XIII. 114 sq., Virg. Geo. IV. 379—386). Neque hoc sine tibicine fiebat in aedibus sacris aut ad exstructa altaria ac ne in domibus quidem et conviviis privatis \*), verum eodem tempore tibia turaria laete sonuisse videtur, ob eam causam, qvod laetos sonos fuderit, ad feliciter auspicandum usurpata \*\*). In vulgaribus quidem coenis privatis, cum, mensa secunda apposita, libatio vini fieret, tus quoque adhibitum commemorari non video: sed in tali coena, qvalem cogitavit Horatius, cum senatusconsulto jussum esset, ut Augusto principi etiam in privatis conviviis aeqve ac diis libaretur (Dio Cass. LI. 19), qvmodo vult poeta, ut Itali per singulas domos ad canendas Juliae gentis laudes accedant *rite deos prius apprecati*, nisi cum prece ture et vino in foco laribus \*\*\*) et diis praesidibus datis? Qvod utcumque est, nunc tamen multo clarius intelligitur poetam carminum convivialium postea more vetusto canendorum comites tibias Lydias, non modo laetas illas et convivales, sed etiam, qvando usus erat, sacras et turarias, retineri justo jure atqve fortasse — qvoniam ad tibicinem olim hujuscemodi carmina cantata erant (v. ex. c. Cic. Tusc. I. 2 et IV. 2) — instituto antiquo velle.

Attulimus jam ea, unde super ratione et differentia trium generum tibi-  
arum, imparium dico et dextrarum sinistrarumqve, judicium repeti possit, exceptis iis, qvae ad omnes Terentii comoedias et ad unam Plauti, qvae est Stichus, de harum fabularum tibiis prodita et cum ipsis fabulis comparanda sunt: qvam rem Boeckhius etiam attigit, verum ita, ut nulla cantica consideraverit, sed modo ingenium universum comoediarum Terentii, idqve verbis perpaucis. Nos ad veritatem adducta putari, qvae adhuc a nobis disputata sunt,

---

fortasse non tubae sunt, sed longissimae tibiae). — V. etiam tab. LXIX (ubi dextra tibia non ita longa, sinistrae inferior pars pone tergum camilli abscondita est) et LXXI. 1.

\*) Hoc testatur Plutarchus Symposiac. VII. 8. 4, ubi, acroamata coenarum dijudicans, dicit: τὸν δ' αὐλὸν οὐδὲ βουλομένοις ἀπώσασθαι τῆς τραπέζης ἐστίν· αἱ γὰρ σπονδαὶ ποθοῦσιν αὐτὸν ἅμα τῷ στεφάνῳ.

\*\*) Etiam Bartholinus turariis tibiis Romanos usos esse credit, „cum thus in aram inderent nec immolarent hostias.“ Cfr. supra p. 12, annot. 2.

\*\*\*) Horat. C. IV. 5. 29—36: *Condit quisque diem collibus in suis Et vitem viduas ducit ad arbores; Hinc ad vina redit laetus et alteris Te mensis adhibet deum. Te multa prece, te prosequitur mero Defuso pateris et laribus tuum Miscet numen, uti Graecia Castoris Et magni memor Herculis.*

non postulamus, nisi accedet, ut haec in singulis comoediis comprobentur, et ut origo errorum, qui apud Donatum exstant, probabiliter explicetur. Dum autem e loco hujus, quem protulimus p. 5 sq., cum Boeckhio non solum id pro vero accipimus. ut discrimen acuminis et gravitatis inter dextram tibiam et sinistram fuerit. etsi apud Donatum contraria ratione commemorandum, sed hoc etiam. ut in fabulis scenicis gravitas soni seriis, gravibus, tristibus rebus. acumen contra jocosis et laetis verbis, genusque tibiaram imparium mixtis cum tristitia jocis consentanea visa sint antiquis, haec sic interpretanda existimamus. ut tamen vix ullae tibiae scenicae tantum severos et tristes aut tantum laetos sonos ediderint. sed ut major sinistrarum gravitas argumentis seriis et severis, majus dextrarum acumen laetitiae animi et levitati omnino congruerint. et ut acutae tibiae, ubi de scenicis agitur, dicendae sint eae. in quibus acumen soni. graves, in quibus gravitas plurimum valuerit, a neutris plane exclusis sonis generis contrarii \*). Etenim quaeritur hic de iis tibiis, quae in usu erant post musicam antiquam ab incunabulis ad perfectionem progressam et multo postquam Pronomus Thebanus tres illos modos, Lydium, Phrygium. Dorium. una eademque tibia conciliare primus scivit \*\*). Plura his de rebus posterius. Nunc hoc quoque jam ante notatum volumus, tibiae *Sarranas* \*\*\*). quas Donatus cum sinistris nominat, ut tamen non diserte declaret. similesne et ejusdem generis universi. an eadem fuerint \*\*\*\*). graves et ipsas. sed tamen alias nobis videri. Quare pariter quaeri potest. qualis inter nomina *dextra* et *Lydia* intercesserit ratio: utroque autem nomine tibiam acutam significari idque de hoc posteriore. Boeckhio duce, jam demon-

\*) Boeckhius in editione Pindari l. c. dicit: „Acumine autem Phrygia (harmonia) Doriam. Lydia Phrygiam superabat, ut alio loco adversus Salmasium demonstratum est — — —. Rursus alio respectu uniuscujusque modi tibiae et fides variam poterant *tensionem* habere, quod aliae acutum, aliae medium, aliae grave *diapason* continerent: quemadmodum ex iis patet, quae de diversitate melopoeiae disputavimus. Latini autem eas tibiae, quarum diapason est gravius, vocarunt *sinistras*, quarum acutius, *dextras*, ut alibi evicimus. (In Ann. Heidelberg. l. c. Quamquam ibi haec non iisdem verbis dicta sunt, ita tamen intelligi nunc velim).“

\*\*) Cfr. Pausanias IX. 12. 5.

\*\*\*) *Sarranae* (non *Serranae*) recte hoc vocabulum scribi, ductum a Tyri urbis antiquiore nomine Latino *Sarra*, jam inter doctos constat.

\*\*\*\*) Servius ad Aeneid. IX. 618 haec annotavit: *Tibiae aut Serranae sunt, quae sunt pares et aequales habent cavernas, aut Phrygiae, quae et impares sunt et inaequales habent cavernas. Quae superioribus tibiaram definitionibus addenda sunt, sed quod duo genera principalia, Sarranas et Phrygias, constituent, non sine causa fortasse a duobus fontibus rem totam repetunt, verum, ut haec res se ostendit, non recte definiunt.*

stratum putamus. — Unum solum hoc loco adjungimus. Quid *pares dextrae* intelligendae videantur, quid *pares sinistrae*, superiora satis docent (de ipsis enim sonis nunc non loquimur); illae vero bis *duae dextrae* appellantur in didascaliis Terentianis, nec umquam in his titulis legitur *pares dextrae* (aut *p. sinistrae*), sed tantummodo Donatus de tibiis Andriae, cui fabulae didascalica ipsa non restat, verum inde petita narratio sola Donati, dicit modos hujus comoediae factos esse *tibiis paribus dextris et sinistris*. Hoc observato, et quod scriptum est in titulo Hecyrae „*tibiis paribus*“, neque aliter ibi apud Donatum, Dziatzkius (p. 595 sq.) contendit hunc grammaticum perperam addidisse de tibiis Andriae illud „*dextris et sinistris*“: nam *tibias pares* proprium genus videri; de quo quiddam ipse excogitavit, quod, cum nullo argumento nitatur, ne locum quidem dat refutationi \*). At etiam apud Diomedem haec sunt: *Cujus rei indicia produnt nobis antiquae comoediae, in quibus invenimus: „acta tibiis paribus“ aut „imparibus“ aut „Sarranis“* (p. 492. Keil.) — et paulo post: „*paribus tibiis“ vel „imparibus“ invenimus scriptum*: ubi apparet Diomedem, judicem ceteroquin harum rerum imperitum, didascalias librorum veterum inspexisse. Quae cum ita sint, eatenus Dziatzkio assentior, ut credam adjectum a Donato esse „*dextris et sinistris*“ et saepe in titulis repertum „*tibiis paribus*“ nec quid amplius de earundem fabularum tibiis, ut nihil aliud reperitur in titulo Hecyrae, unde verba excidisse non recte vulgo arbitrantur; sed simul haec opinor: exemplum hoc esse insignis illius in didascaliis breviloquentiae, quae ne in hac quidem re obscuritatem attulerit, cum in iis moris fuisse videatur, ut scriberetur „*duabus (non paribus) dextris (sinistris)*“; itaque scribi solitum esse in didascaliis „*tibiis paribus*“ et quidem perbrevisiter pro hoc: „*tibiis paribus dextris et (paribus) sinistris*“; Donatum igitur veram et nostrae aetati necessariam explicationem addidisse; hanc eum posuisse de tibiis Andriae, quia in ordine comoediarum Terentii ea fabula primum locum tenet, reticuisse autem, ut jam ante pro-

\*) Verba ejus illa sunt: *Welches das Verhältniss dieser vier verschiedenen Modulationsweisen gewesen sei, wage ich nicht mit irgend welcher Bestimmtheit anzugeben, doch liesse sich dasselbe folgendermassen denken: die t. pares sowie die t. impares bestanden aus je einer dextra und sinistra, von welchen jene die Hauptflöte, diese die begleitende [cfr. supra p. 7 annot. 2] war. Auf der Verschiedenheit der Art und Weise, wie das begleitende Instrument die Melodie der Hauptflöte unterstützte, beruhte alsdann der Unterschied zwischen den t. pares und impares. Ferner ist klar, dass die Hauptflöte (t. dextra) auch ohne accompagnirendes Instrument die musikalischen Parteen eines Lustspiels begleiten konnte; dann wurde sie aber zur Verstärkung verdoppelt, und die Modulation geschah tibiis duabus dextris. Ceterum persuadere sibi non potuit duas sinistras in usu fuisse et, quales Sarranae fuerint, in medio relinquit.*

positam, postea de Hecyrae. Sed hae opiniones confirmatione egent, quae iis non deerit.

Quid fuerit in fabulis Romanorum scenicis canticum, jam diu hactenus inter omnes constat, ut partem esse ipsius fabulae neque — quem errorem Boettigeri Hermannus sic refutavit l. c., ut resurgere numquam possit — inter actus adhibitum cum saltatione quadam mimica, sed sine verbis cantum tibiatarum fuisse nunc nemo non consentiat. Et ceteroquin haec cantica qualia putanda sint, testimoniis Livii VII. 2. et Diomedis III. de arte gramm. p. 490 sqq. Keil., cui auctor fuit Svetonius in libro de poetis \*), atque Donati et aliorum usi, idem Hermannus et post eum Wolffius et Grysarus II. cc. aliique enarrant; quarum explicationum summa haec est: cantica esse soliloquia, nec vero omnia soliloquia cantica esse, sed tantummodo quaedam, eaque olim ad tibicinis modos cantata; apud Romanos autem usque ab aetate Livii Andronici non ipsum actorem verba canticorum cecinisse, sed in iis motu et gestu pantomimico exprimendis totum versatum esse, canente verba, qui in scena ante tibicinem stetisse narratur, cantore. Itaque haec soliloquia talia existimanda sunt, in quibus vis animi commoti, sive lugentis aut timentis, sive e contrario laetantis aut, quod saepe fit, astuta secum consilia habentis, rerumque describendarum status seu tristis seu laetus atque ridendus gesticulatione vividissima imitanda fuerint: in alio enim et tranquilliore carmine neque illud excogitari \*\*), ut verba ab actione sejuncta alii atque actoris personae traderentur, neque id postea in usu manere \*\*\*) potuit; quod institutum Romanis magnopere placuisse et ex eo tandem ludos pantomimos, in quibus chorus mutae histrionis saltationi argumentum fabulae praecinebat \*\*\*\*), existisse agnitum est. Accedit animi et orationis vel tristi vehe-

\*) Cftr. *Svetonii praeter Caesarum libros reliquiae*; edidit A. Reifferscheid: p. 370 sqq.

\*\*) T. Livius de hoc Andronici invento l. c.: *Livius post aliquot annis, qui ab saturis ausus est primus argumento fabulam serere, idem scilicet, id quod omnes tum erant, suorum carminum actor, dicitur, cum saepius revocatus vocem obtudisset, venia petita puerum ad canendum ante tibicinem cum statuisset, canticum egisse aliquanto magis vigente motu, quia nihil vocis usus impediabat: inde ad manum cantari histrionibus coeptum, diverbiaque tantum ipsorum voci relictas.* — Valerius Maximus de eadem re II. 4. 4: *Isque* (Livius Andronicus) — — — *adhibito pueri et tibicinis concentu gesticulationem tacitus peregit.*

\*\*\*) Cftr. Hermannus p. 301 sqq., qui etiam monet, quanta constantia veteres, de canticis mentione injecta, *agendi* aut *saltandi* verbo de histrionibus, non *canendi* vel *cantandi* utantur; Wolffius p. 17 sq.; Friedlaenderus in *Antiqvit.* Marquardt. p. 540 sq.

\*\*\*\*) Jam antea res eo in canticis venerat, ut, quod canticum unus histrio agebat, id aliquando, quo major esset vis cantus in magno theatro, *caterva* cantorum caneret; cfr. verba Ciceronis pro Sest. c. 55 et de Or. III. 50 extr., et quae dicit Friedlaenderus l. c.

mentiae vel permagnae alacritati alia huic rei conjuncta et insignis canticorum investigandorum nota metrum varium aut, etiamsi simplex, ne tum quidem non concitatum; quapropter meris senariis lenibus et sedatis ullum canticum compositum esse equidem cum Grysaro (p. 370) contra Wolffium (p. 29) nego.

Etsi vero nemo infitias iverit canticum, si veteres ipsos audiamus, unius secum loquentis carmen esse, tamen etiam post Hermanni et Wolffii de hac re disputationes fuerunt Plauti editores, qui fabularum hujus poetae haud pauca colloquia cantica appellare non dubitaverint, velut Weiseus et Lindemannus; et quod Gvilelmus Studemund contendit hac thesi proposita: „Palliatarum romanarum cantica ab una tantum persona acta esse falso creditur“ \*), idem sentire video virum quendam doctum in commentariis Lipsiensibus, qui inscribuntur „*Litterarisches Centralblatt*“, anni 1866, p. 65, qui hanc definitionem Svetonii apud Diomedem l. c.: *In canticis una tantum debet esse persona* — in Plauti quidem fabulas accommodari posse infitatur. At jure quaerimus: errasse in tali re num est credibile Svetonium? Ac si quis forte hujus verba non integra servata apud Diomedem esse opinetur, nonne eam suspicionem diluunt, quae de modo cantica agendi antiquitus tradita sunt? Id enim canticorum in comoediis tragoediisque Romanorum proprium erat, non modo ut canerentur, sed etiam ut verba et actio separata et in duas personas divisa essent. Nusquam autem proditum exstat duos pluresve simul in colloquio actores a voce cantoribus mandata abstinuisse, in gesticulando tantum occupatos; ne de ludis quidem pantomimis; in his enim histrio unus, personam et vestem commutans, omnia agebat \*\*), quod gravi documento est de canticis, unde pantomimi, qui e multis argumento inter se connexis canticis constabant, originem duxerant. Neque in comoediis diverbia ulla cantata sunt, si quid valet comparatio horum locorum Diomedis: p. 491 K.: *Latinae igitur comoediae chorum non habent, sed duobus membris tantum constant, diverbio et cantico* — et p. 490: *Latine fabulae appellantur sive fatibulae; in Latinis enim fabulis plura sunt (diverbia, quae fan-*

---

\*) *De canticis Plautinis* (Berolini 1864), ultim. pag. — Similiter de versibus Plauti constituendis non in canticis solum, sed etiam in diverbiis disseruit Mauritius Crain sub hoc titulo: *Ueber die Composition der Plautinischen Cantica* (Berolini 1865), qui tamen de vera notione cantici saltem dubitat (p. 31 et 37).

\*\*) Cfr. Friedlaenderus l. c. p. 549 sqq. et in ejusdem „*Darstellungen aus der Sittengeschichte Roms in der Zeit von August bis zum Ausgang der Antonine*“, II. p. 314 sqq. edit. 2.

tur, quam) cantica, quae canuntur\*). Atque satis dilucide Donatus in libello de comoedia: *Diverbia histriones pronuntiabant* (non igitur cantabant). *Cantica vero temperabantur modis, non a poeta, sed a perito artis musicae factis* (canebantur igitur, quamquam non ab ipsis histrionibus, cantica tantummodo agentibus). Hinc etiam canticum graece dicitur *μωρῳδία*, ut ap. Donatum ad Hecyrae v. 816. Ergo acquiescendum est sine dubitatione in hoc, quae appellabantur cantica, ea non a colloquentibus inter se pluribus, sed ab uno secum semonem intimum habente acta esse. Idque quivis canticorum in colloquiis Plautinis defensor concedere debebit, si ostendere nobis contigerit melicas illas, ut videntur, in Plauto scenas ad ullam opinionem de diverbiis vere cantatis non eas quidem, sed ad aliud quoddam explicationis genus viam monstrare.

Nunc quaeramus, quas ad partes comoediae cantus tibiatarum pertinuerit, qui non sane canticorum tantum finibus continebatur. Donatus monet de fabulis Latinis generatim in argumento Andriae (ed. Klotz. tom. I p. 5): *Est igitur attente animadvertendum, ubi et quando scaena vacua sit ab omnibus personis, ut in ea chorus\*\*)* vel tibicen audiri possit: *quod quom viderimus, ibi actum esse finitum debemus agnoscere*. Et in Plauti Pseudulo servus, cui idem nomen est, in ultimo versu primi actus dicit abiens, ad spectatores conversus: *Tibicen vos interea hic delectaverit*. Qui duo loci satis probant tibicinem inter actus comoediarum tibiis cecinisse. Quamquam non id nisi „interdum“ factum esse Hermannus ex iisdem locis colligit et post eum alii statuunt\*\*\*). Atque etsi Hermannii argumentatio in ea re levis est\*\*\*\*), et

\*) Verba intra parenthesis signum inclusa Reifferscheidius, l. c. p. 10, cum magna veri similitudine addidit.

\*\*) Chorus, qui in tragicis Romanorum fabulis palliatis e Graecis exemplis retinebatur, id quod Gryсарus in commentatione, quam saepenumero commemoramus, demonstrat, in hisce fabulis Latinis inter binos actus ad tibias choraulae cantare solebat; cfr. Gryсарus p. 398—400 et Friedlaenderus in Antiquitatibus Marquardtianis p. 542.

\*\*\*) Etiam Friedlaenderus l. c. p. 539: „In Komödien wurde der Zwischenakt bisweilen mit Musik ausgefüllt“.

\*\*\*\*) Donatum sic interpretans: „Hoc videtur dicere, ubi in Latinis fabulis scena vacua sit, ut, si istae Graecae essent fabulae, chorus vel tibicen audiri possit, ibi actum finitum debere intelligi“: — plurimum tribuit his Vitruvii verbis in praefatione libri V de architectura: *Graeci quoque poetae comici, interponentes e choro canticum, diviserunt spatia fabularum; ita partes cubica ratione facientes, intercapedinibus levant actorum pronuntiationes*: — et quaerit: „quid est, quod hic Graecos tantum comicos, non etiam Latinos commemorat?“ Id inde est, quod ipsam inventionem separandi in fabulis actus plures respexit. Quare etiam (verbis utimur Hermannii p. 298) „e choro canticum dixit, carmen a choro can-



Donatus in verbis allatis et in aliis, quibus de actibus distribuendis praecipit, non tam spectatorum quam legentium rationem habuit \*), tamen ex iis, quae dicit, et e loco quodam Euanthii \*\*) satis superque apparet quinque actus inter se distinguere horum quidem grammaticorum aetate perdifficile visum esse, quae difficultas sicut nulla fuisset lectoribus, si in libris distinctio actuum constanter indicata esset, ita nulla spectatoribus, si semper inter actus tibiae intervenissent. Sed haec relinquitur quaestio, itane fuerit iis temporibus, quibus ambo hi grammatici vixerunt, an ab initio. Et videtur sane amissa potius, exemplaribus librorum depravatis et raro in scenam delatis fabulis, notitia hujus rei grammaticorum tempore fuisse, oblitteratus tum etiam cum rebus aliis intercinendi ille mos \*\*\*), quam ob eam causam, quam Donatus memorat, a poetis res sic esse instituta \*\*\*\*). Hoc vero utcumque exi-

tatum significans“ (*canticum* hoc loco, ut interdum fit, in universum designat carmen cantu persequendum). Nam constat actuum separationem enatam esse in fabulis Graecis ex earum per chori cantica partitione; poetae autem comici choros comoediis subtrahere coeperunt, *locum eis relinquentes* (verba sunt Euanthii, quae vide in fine annotationis post hanc quartae). i. e. intervalla inter partes fabulae, inter binos actus, facientes.

\*) Id perspicitur de verbis allatis et ex iis, quae proxime haec antecedunt, et ex his, quae ibi sequuntur: *Confundit saepe lectorem id, quod persona in superiori scaena desinens et in proxima incipiens loqui non intelligitur ingressa.*

\*\*) *De tragoedia et comoedia* (Terent. ed. Klotz. tom. I. p. XIV): *Postremo ne locum quidem reliquerunt* (choro poetae): *quod Latini fecerunt comici, unde apud illos dirimere actus quinquepartitos difficile est.*

\*\*\*) Hoc Donati ad Andr. IV. 3. 1 et testimonio est actas esse etiam illis temporibus comoedias veteres et ostendit magnas in agendis fabulis mutationes tum esse factas: *Vide non minimas partes in hac comoedia Mysidi attribui, hoc est personae femineae, sive haec personatis viris agitur, ut apud veteres, sive per mulierem, ut nunc videmus.*

\*\*\*\*) Dicit Donatus in praef. Eunuchi: *Actus sane implicationes sunt in ea, et qui non facile a parum doctis distingui possint: ideo, quia tenendi spectantis causa vult poeta noster omnes quinque actus velut unum fieri, ne respiret quodam modo atque distincta alicubi continuatione succedentium rerum ante aulaea sublata fastidiosus spectator exsurgat.* Cfr. eundem in praef. Andriae. Non tamen uno tenore ac sine ullis temporis intermissionibus comoedias peragi solitas esse, quod fere contendere videtur Euanthius in verbis supra positis (in annot. ante hanc 2:da), Donatus intelligi vult in his ad Adelphos: *In dividendis actibus fabulae identidem meminerimus, primo paginarum dinumerationem neque Graecos neque Latinos servasse, cum ejus distributio hujusmodi rationem habeat, ut, ubi attentior spectator esse potuerit, longior actus sit, ubi fastidiosior, brevior atque constrictior.* Magnum vero atque delicatum fastidium in comoediis spectandis Euanthius ipsis Atheniensibus aetatum mediae et novae comoediae aequalibus tribuit hoc loco, qui proxime ei praecedat, ad quem modo lectorem relegavimus: *Comoedia vetus ut ab initio chorus fuit paulatimque personarum numero in quinque actus processit, ita paulatim velut attrito atque extenuato choro ad novam comoe-*

stimabitur, qui haec nostra lecturi sunt, facillime, ut speramus, concedent recte nos fecisse, si ad tibias in comoediis Terentii dijudicandas etiam actuum intervalla diligenter respexerimus et, quid tibiae his locis cecinerint, e proxime antegressis sequentibusve seu diverbiis seu canticis, quae quin tibiae vel quasi meminissent vel praenuntiarent, non potuerit fieri, aestimaverimus. Sed ut dicamus, quod sentimus, aut nulla fuit ipsi Plauto et Terentio ceterisque poetis fabularum in quinque actus vera divisio, quae iis diserte ascribitur, aut non tantum scena paulisper vacua relictæ, sed etiam alio quodam modo finis actus significabatur, idque, quoniam aulaeum ante exitum fabulae non motum esse constat, tibiis intercinentibus fiebat, quas jam post primum actum Pseuduli finitum spectatoribus delectandis inserviisse Plantus Pseudulum servum testem fecit.

Grande momentum in comoediis Romanorum musicae tributum esse inde patet, quod nomen ejus, qui modos fecerat, cum tiliarum genere in didascalis notatum est. Sed omnino cantica in his fabulis non ita multa sunt, in Terentii Heautontimorumenos tantum duo, in quibusdam Plauti singula aut nulla \*), eamque ob rem in quaestionem venire debet, num forte tibiae, praeterquam quod inter actus breves per breve tempus sonuerint, etiam alios suos locos extra cantica habuerint, id est in diverbiis; tametsi pravum esset credere eas per totas ubique comoedias aut per majorem harum partem sonos edidisse. Quae si etiam diverbiis quibusdam comitatae sunt, non ideo haec diverbia vere cantata putare necesse est, neque cantica nomine falso appellanda sunt, sed modulatus, quam cetera diverbia, pronuntiata fuerint, comitibus factis, vel perpetuis vel ex intervallo redeuntibus, tibiis, quale genus pronuntiationis recentiores *recitativum* nominaverunt. Neque perspicere possum, quales *rhythmicæ modulationes* verborum, quas *musici* temperaverint, nisi hujuscemodi, Marius Victorinus quodam loco a *lyricis cantionibus* distingvat \*\*).

*diam sic pervenit, ut in ea non modo non inducatur chorus, sed ne locus quidem ullus jam relinqvatur choro. Nam postquam otioso tempore fastidiosior spectator effectus, tunc, cum ad cantores ab actoribus fabula transibat, consurgere et abire coepisset, admonuit poetas primo quidem choros praetermittere, locum eis relinquentes, ut Menander fecit, hac de causa, non, ut alii existimant, alia.*

\*) Singula in Stichos et Persa, nulla in Milite glorioso, Epidico, Poenulo, Curculione esse videntur.

\*\*) *De orthographia et de metrica ratione* (Scriptor. Lat. rei metr. ed. Gaisford. p. 49, apud Putsch. p. 2481): *Inter Metricos et Musicos propter spatia temporum, quae syllabis comprehenduntur, non parva dissensio est. Nam Musici non omnes inter se longas aut breves pari mensura consistere, siquidem et brevi brevior et longa longior dicant posse syllabam fieri: Metrici autem, prout cujusque syllabae longitudo ac brevitatis fuerit, ita tempo-*

Notum est canticorum, quae vere sunt, partibus interposita saepe esse diverbia brevia, quae dicentes fecit poeta homines, qui in scena adsunt et canticum audiunt, sed ab eo, qui hoc agit, antequam carmen finitum est, nec videntur nec audiuntur, et haec verba aliena canticis interjecta spectari in fine hujus loci Diomedis (p. 491. K.): *Diverbia sunt partes comoediarum, in quibus diversorum personae versantur; personae autem diverbiorum aut duae aut tres aut raro quattuor esse debent; ultra augere numerum non licet. In canticis autem una tantum debet esse persona, aut, si duae fuerint, ita esse debent, ut ex occulto una audiat nec conloquatur* (cum eo, a quo agitur canticum), *sed secum, si opus fuerit, verba faciat*: quo loco, ut Wolffius jam dixit (p. 11), oblitus est addere grammaticus non modo unum adesse posse et secum loqui, dum canticum intermittitur, sed etiam haud raro fieri, ut duae personae audiant et inter se colloquantur. Jam ut eo redeat, unde deflexit, oratio, haec unius aut plurium inter cantici partes prolata verba, — quae, ut mox ostendetur, seu plurium sunt seu unius, recte diverbium appellantur, — ad modos tibiarum pronuntiata esse evincam, ubi cantica Terentii perlustrabo. Quod si certo comprobabitur usitatum fuisse, ut in his diverbiis tibiae non silerent, quidni cecinerint etiam in aliis aliquando diverbiis, dummodo haec insigni quadam dictionis alacritate aut vehementia fuerint? In Stichō Plauti exemplum exstat (act. 5 sc. 4, 5) adhibiti in diverbiis tibicinis; tametsi haec quidem scenae suum quiddam proprium habent, in quibus ad convivalem laetitiam concelebrandam tibicen, qui hujus fabulae erat, nominatim advocatus et sic inter personas fabulae receptus sit. Sed persvadent de eo, quod nunc quaeritur, permultae scenae Plautinae, in quibus metro melico colloquentium sermo procedit. Haec sunt illa in Plauto diverbia, quae cum nihil a canticis distent, si metrum eorum spectes, nonnulli iis etiam nomen canticorum quasi coacti impertiverunt\*), dum cantica semper *μωρῳδίας* esse vel dubitant vel negant. Atqui ea hujus rei explicatio, quam jam proposuimus, neque ve-

---

*rum spatia definiri, neque brevi breviorē aut longa longiorē, quam natura in syllabarum enuntiatione protulit, posse aliquam reperiri. Ad haec Musici, qui temporum arbitrio syllabas committunt in rhythmicis modulationibus aut lyricis cantionibus, per circuitum longius extentae pronuntiationis tam longis longiores, quam rursus per correptionem breviores brevibus, proferunt.*

\*) Sic etiam, quod ex c. commemoramus, Fritzsche in programme Rostochiensis a. 1861 (de Trinummi v. 223—300) et ipse Ritscheli, summus dux studiorum ad poësim Romanorum scenicam pertinentium, in programmati Bonnensibus a. 1850 et 1858 (de personarum nominibus quibusdam in Stichō et de Poenuli v. 211—262) et in Prolegomenon editionis Plautinae capite XVIII.

terum auctorum appellationibus repugnat et satis rem explanat. Non igitur tibiae mutae erant ad Trinummi actus 2 scenae 2 versus 1—25 (v. f. 276—300) post canticum Lysitelis, quod scenam superiorem continet, neque in Pseuduli ultima scena (v. f. 1285 sqq.) post canticum, quod est in scena paenultima (v. f. 1246—1284), neque initio novorum actuum, postquam tibicen assis tibiis paulisper praeluserat, in Pseuduli v. 574—594, in Stichi v. 1—47, in Captiv. v. 195—239, neque, etsi nullus cantus proxime antecessit, in Casinae act. 3 scena 5 et in Poenuli act. 1 scenae 2 versibus circiter 50, ut haec exempla e multorum copia indicemus; omnia enim enumerare nostrum nunc non est. Sed quod modo contendimus explicationem nostram non pugnare cum veterum definitionibus, secus esse nonnemo dixerit, qui hunc locum Donati in superioribus prolatus: *Diverbia histriones pronuntiabant. Cantica vero temperabantur modis* e. q. s. meminerit. Neque negamus opinionem nostram verbis hisce Donati, ut nunc habentur, repugnare videri, sententiae autem ejus, qualis esse debuit et, id quod posterius ex ejusdem praefationibus ostendemus, fuit, adversari minime concedimus. In libello Donati de comoedia lacunoso et mutilato, qualem esse nemo gnarus infitiabitur, ad cantica referuntur omnia, quae sunt de modis musicis comoediarum \*); at vero sicut etiam inter actus cantus tiliarum fuit, ita eundem ad diverbia quaedam pertinuisse credere, non laesa auctoritate antiquitatis, licebit. — Quod si sunt in comoediis colloquia, quae *diverbia ad tibias modulata* recte vocemus, exquirere attinet, sintne ad hoc idem genus diverbiorum referendi etiam loci quidam ex numero eorum, ubi ipse secum aliquis loquitur, ut haec soliloquia ad modos musicos pronuntiata non ideo sint cantica, sed nomine diverbii comprehendenda. Diomedes diserte et plane dicit illud, quod jam attulimus: *Latinae igitur comoediae — — — duobus membris tantum constant, diverbio et cantico*; neque id falso aut parum accurate dicere putandus est, quia etiam Donatus non alia quam haec duo membra comoediae distingvit, et Livius, postquam *canticum*, et quomodo id agere coepisset Andronicus, commemoravit, addit *diverbia* tantum ipsorum histrionum voci posthac esse relictas (v. supra p. 20 annot. 2). Satis igitur apparet veteres ipsos diverbii appellatione complexos esse etiam ea soliloquia, quae cantica non essent \*\*), quem-

\*) Itaque in illa enuntiatione: *Agebantur autem tibiis paribus aut imparibus et dextris aut sinistris* (v. supra p. 5 sq.), quae subsequitur hanc, de qua mox disputabimus: *Hujusmodi adeo carmina ad tibias fiebant*, et quae sunt reliqua, sententiae subjectum rectius fortasse intelligitur *carmina*, quam suppletur, sicut feci cum aliis, *fabulae*; quod imprimis post lectam eam enarrationem, ad quam hic lectorem delegavimus, contendere poterit.

\*\*) Hoc dicto nihil novi extulimus. Grysari haec sunt (p. 371, annot. 1): *Streng ge-*

admodum nostris temporibus omnia fabulae verba *dialogi* vocabulo comprehendendi solent, non iis in hac communi nominatione exceptis, quae solus secum aliquis facit, nisi si canuntur, sed omnibus carminibus exclusis; eamque dicendi consuetudinem Romanos multo etiam constantiorem habuisse ex hoc perspicitur, quod ad id significandum, quod Graeci sero *μονολογίαν* vocaverunt, nullo proprio vocabulo usi aut indigere sibi visi sunt: nam *soliloquium* primus Augustinus (nec tamen is de scenico sermone), ut ipse narrat, invenit (Soliloqv. 2. 7. 14), Romani autem satis habuerunt, sicut graece *ὁ πρὸς ἑαυτὸν διάλογος* dicitur, ita, sive in scenam plures inter se, sive singuli secum colloquentes (hi autem non canticum agentes) inducti erant, *diverbium* nominare. Hoc paulo diligentius definire necesse fuit, quia saepe in sqq., etiamsi unus in comoedia loquitur, diverbii nomen non vitabimus. Jam ut illuc redeamus, ne ea quidem diverbia, quae sunt secum colloquentium, ad modos tibicinis modulata non interdum fuerunt. Quo posito quam in perturbationem omnis quaestio canticorum incidere videatur, bene intelligo, sed, quemadmodum res diversae internoscantur, exemplo ostendam. Canticum vocatur Plauti Captivorum scena 2 actus 3, in qua omnia sunt Hegionis senis:

*Quid est suavius quam bene rem gerere  
Bonó puplicó, sicut égo feci herí,  
Quom emi hósce homines. ubi quisque vident,  
Eúnt obuiám gratulánturque eám rem.*

nommen sollten unter *diverbia* nur solche Stellen verstanden werden, in denen zwei oder mehrere Schauspieler sich mit einander unterreden. Diese machen in jedem Drama den bei weitem grösseren Bestandtheil aus: und so darf es uns nicht Wunder nehmen, wenn Donat ebenso wie Diomed dem Canticum gegenüber alles was nur recitirt und nicht gesungen wurde, auch Monologe solcher Art, mit unter dem Namen *Diverbium* befasst haben. — Ceterum idem vir clarissimus in fundamento eorum Donati verborum, quibus *diverbia* histriones pronuntiassent, cantica vero temperata modis esse dicuntur, has asseverationes constituit: *Die Recitation der Diverbien und alles dessen was nicht Canticum oder [in fabulis palliatis tragicis] Chor war, geschah ohne Begleitung der Flöte* (p. 370) et: *Mit dem Verbum pronuntiare bezeichnet Donatus die blosse Recitation, in welcher zwar der in dem jedesmaligen Metrum liegende Tact genau eingehalten wurde, aber so, dass gar keine musikalische Begleitung dazu trat* (p. 371). Neque aliter sentit Friedlaenderus in *Antiqv. Marqv.* p. 539: *In dieser Bühneneinrichtung bestand das Drama aus Dialog, Pantomime und Gesang mit Flötenbegleitung; die Dialoge (diverbia) wurden stets gesprochen und waren niemals componirt. Et sunt hae opiniones, quantum e libris intelligi potest, nunc omnium virorum doctorum communes. Ne ii quidem, qui colloquia quaedam Plautina cantica nominaverunt, usquam significant se putare haec *diverbia*, quae cantica iis videntur, non fuisse, ut cantica alia, vere cantata.*

5. *Itá me miserum restitádo, retinédo*  
*Lassum reddidérunt:*  
*Vix éx gratuládo misér iam eminébam.*  
*Tandem ábii ad praetórem. ibi uix requiéui,*  
*Rogó syngraphum:*
10. *Datúr mi: ilicó*  
*Dedi Tyndaró.*  
*Ille ábiit domum. postquam id áctumst,*  
*Eo prótinus ad fratrem, mei ubi álíi sunt captíui:*  
*Rogó Philocratem ex Álide ecquis nórit: hic extémplo*
15. *Exclámat, esse eum sibi sodalem: dico eum esse apúd me.*  
*Hic órat opsecráťque, eum sibi út liceat uidére.*  
*Iussi ilico hunc exóluier. inde ábii. nunc tu séquere,*  
*Vt quód me orauisti ímpetres, eum hóminem uti conuénias. \*)*

Non est canticum. Nam quae Hegio expromit de gaudio sibi e re bene gesta percepto et de hominum gratulationibus deque Tyndari in Elidem missione et Aristophontis, mutae in hac scena personae, desiderio Philocratis conveniendi, haec minime sunt ejusmodi, ut intelligatur actionem ea pantomimicam, a vocis cantu separatam, requisivisse aut admisisse; et praeterea Aristophontem, quem secum ducit senex, bis (v. 14 et 16) digito monstrat spectatoribus et in vers. duobus ultimis alloquitur; qualia numquam is, qui canticum agit, sed semper secum omnia. At vero non sine causa verba modulatissima sunt et tam vario metro: quae prosecutae sunt tibiae. Etenim hae cecinerunt etiam et ante et post hoc diverbium, quod interpositum est inter soliloquia Ergasili et Tyndari, quae ambo cantica esse, quod utrique ars pantomimica praeclare convenerit, asseveraverim. — Sed id, quod in his diverbiis Plautinis, quae non sine tiliarum cantu enuntiata videntur esse, pronuntiationem versuum modulationem et actionem alacriorem solito fuisse arguit, metrum dico et maxime varium et melici simile, id signi non pari modo Terentii diverbiis impressum deprehendas: quam ob rem admodum difficile est in hujus poetae comoediis diverbia ad tibiae modulata agnoscere, quae tamen ne illis quidem desunt.

Quoniam etiamnum id agimus, ut, cujusmodi locis in actionibus comoediarum tibiae auditae sint, indicemus, et de ultimo fine fabularum et de ipsis initiis actionis loqui oportet, quamquam non erit, quod posthac ad Terentii fabulas oratio eodem revertatur, quia nec hinc nec illinc aliquid proveniet,

\*) Ex editione Brixii.

unde de genere tiliarum in singulis fabulis possit concludi. Illud, quod in Terentio est, *Plaudite!* vel *Vos valet et plaudite!* et quod semper apud eum, sicut ab Horatio (Ep. ad Pis. v. 155), *Cantori* tributum est, — aliter plerumque apud Plautum res se habet\*), — tibiis prosequentibus decantatum esse per se liquere videtur. Cantor enim, i. e. idem, qui cantica voce cecinit, quid sine tibiis? — Cum aliquanto autem impeditiore quaestione conjunctum est, quod de principiis actionis fabularum nunc addendum. Sunt multi, qui dicant fabulis scenicis fuisse musicum quoddam exordium (*Ouverture*). Nolim equidem huic opinioni repugnare, quippe per se admodum verisimili. Sed id argumentum, in quo niti dicitur, non accipio. Ducta enim est ex interpretatione Donati de comoedia p. XVIII edit. Terent. Klotz., ubi grammaticus, de canticis locutus, sic pergit: *Hujusmodi adeo carmina ad tibias fiebant, ut his auditis multi ex populo ante discerent, quam fabulam acturi scaenici essent, quam omnino spectatoribus ipsis antecedens titulus pronuntiaretur.* Ritschelius\*\*) in hoc loco magnopere offendit, qui, sicut ceteri, quantum video, omnes, Donatum hoc dicere putat: „usitatum fuisse“ — (Hermannii sunt haec verba, l. c. p. 296) — „ut, ante quam histriones in scenam prodirent, immo ante quam fabulae titulus pronuntiaretur, tibicen tibia modos caneret eos, qui deinde canticis essent adhibendi.“ Haec Ritschelius argumentatione impugnans, quam a nobis referri non opus est, contendit errori Donati hanc ejus narrationem tribui debere, qui etiam de cantu tiliarum ab intelligentibus, cum auditus esset, cognito turpiter se ipse fefellisset: id enim et deinceps cetera orta esse e male intellecto loco illo Ciceronis Academ. II. 7. 20 — quem locum grammaticum in mente habuisse A. G. Langius jam ante conjecerat\*\*\*): *Quam multa, quae nos fugiunt in cantu, exaudiunt in eo genere exercitati! qui primo inflatu tibicinis Antiopam esse ajunt aut Andromacham, cum id nos ne suspicemur quidem.* Ciceronem, cujus verba Donatus falso ad scenicas actiones retulisset, non de his, sed de modulationibus quibusvis aliis tiliarum cantica e tragoediis canentium loqui Ritschelius ait. At vero ne Donatus quidem in iis, quae de tibiis, quibus auditis multi, quam fabulam acturi scenici essent, jam ante cognovissent, attulit, fabulae coram populo actionem, verum is certe, et fortasse etiam Cicero, exercitationes scenicas ante ludos et ante editos libellos munerarios (qui-

\*) De reliquo cfr. Bentlejus ad Andr. V. 6. 17, Wolffius p. 18—20, Ritschelius in Prolegomenis editionis Plautinae p. XXX.

\*\*) *Parergon Plautinorum Terentianorumque* vol. 1, p. 301—304.

\*\*\*) *Vindiciae tragoediae Romanae* (Lips. 1822), p. 45.



bus temporibus hi jam in usu erant) institutas \*) et foris auditas cogitatione complexus est. Nam quid est illud, quod *spectatoribus ipsis* opponuntur alii quidam inflatum tibiaram audientes? Hi videlicet ii sunt, qui nondum spectatores facti, nondum in cuneis et orchestra sedebant. Haec interpretatio eo firmatur, quod ita continuatur apud Donatum oratio (ea omnia verba usque ad finem libelli sequentia proposita sunt supra p. 5 sq.), ut ibi dicatur, quomodo tum, cum fabula non spectaretur, de argumento ejus vel serio vel jocosio vel inter utrumque genus medio e tibiis judicari potuerit: ubi, quia latine dici sane non possunt tibiae *sua gravitate seriam comoediae dictionem pronuntiare*, apertum mendum agnoscendum et pro *pronuntiabant* scribendum *praenuntiabant* censeo; — ubi porro alias tibiae, quae *acuminis levitate jocum in comoedia ostendebant*, non ipsis spectatoribus, qui, quid jocosum esset, quid non, aliunde melius cognoscerent, sed tibiae tantum audientibus jocum ostendisse intelligendum est; — quo loco denique hoc extremum: *ubi autem dextra et sinistra acta fabula inscribatur, mistim joci et gravitates denuntiabantur* variatam continet narrationem de judicio fabulam non spectantium, sed titulum modo ejus legentium ex hoc petito. Ut vero in Donati de comoedia libello multa nunc sunt verbis omissis contracta et decurtata, non debet quemquam nimis offendere repentinus ille et non ante praeparatus transitus ad tibiae in scenicis exercitationibus foris auditas, postquam nihil antecessit praeter illud *Hujusmodi adeo carmina ad tibiae fiebant*. — Atque adeo tanta in Donatum injustitia vir ille celeberrimus fuit, ut etiam *pronuntiationem tituli*, omnia cetera in actione fabulae antecedentem, etsi multa de ea grammaticus in libello de comoedia loquitur et ejusdem rei in tribus praefationibus meminit, ab ipso totam per errorem fictam esse asseverarit. Sed de hac re verbis parcere nos sinit praeclara disputatio Dziatzkii \*\*), quae confisi non dubitamus, quin mos ille fuerit, ut nomen fabulae cum nomine poetae ante prologum de scena pronuntiaretur. Ne vero id, quod de hoc eodem non minus breviter in prologo iteratum est (iteratio profecto non supervacanea), statim et nulla re interveniente afferretur, cantus, post tam solennem proclamationem expectandus, sane videtur interfuisse, quo loco inter-

\*) De his exercitationibus cftr. Carolus Magnin in *Revue des deux Mondes*, tom. 22 (seriei 4) p. 279—286 („*De la mise en scène chez les Anciens*“); qui tamen etiam verba Donati, de quibus quaerimus, spectare opinatur ad exordium ipsius actionis fabularum; dicit enim, horum Donati verborum ratione habita, tom. 24 p. 429, annot. 5: *Souvent, quand la pièce était ancienne, le jeu des flûtes, qui précédait le prologue, suffisait pour faire deviner le titre de la pièce aux spectateurs*.

\*\*) *De prologis Plautinis et Terentianis quaestiones selectae* (Bonnae 1864), p. 1—14.

positum etiam Ritscheliuss cogitari posse dicit (p. 303), atque toti comoediae ibi praelusisse. Inter prologum autem et primum actum, qui protasin fabulae introducit, tibias non cecinisse credimus, etiamsi in sqq., quae ratio fuerit inter argumentum et tibias comoediae, in hoc quoque actu spectabimus.

Jam tempus est ad singulas Terentii comoedias accedere, ut, et quae in iis sint cantica, et quales tibiae in his fabulis adhibitae sint, earumque tibiarum modis quomodo vel cantica vel actuum primae extremaeque partes, quas inter tibiae canere solebant, congruerint, videamus. Diverbia singillatim notabimus non solum ea, quae cantico sunt interposita, sed etiam si quae longiora et separatim a canticis collocata ad tibias modulata fuisse videbuntur, quamquam in hoc posteriore genere et incertior neque expleta enumeratio erit. In fabulis perlustrandis eum sequemur ordinem, quo disquisitio optime procedet.

I. Ab Adelphis igitur ordiendum est. Cui comoediae didascalica in omnibus libris manu scriptis Terentianis, non minus in codice Bembino, omnium longe vetustissimo, quam in ceteris, recensitionem Calliopii secutis, *tibias Sarranas* tribuit. Bembini verba sunt: „Tibis Serranis *tota*“ \*). At in praefatione hujus fabulae Donatus haec habet: *Modulata est autem tibiis dextris, id est Lydiis, ob seriam gravitatem, qua fere in omnibus comoediis utitur hic poeta. Saepe tamen mutatis per scenam modis cantica mutavit: quod significat titulus scenae, habens subjectas personis litteras M. M. C. Item diverbia ab histrionibus crebro pronuntiata sunt, quae significantur D. et M. litteris secundum personarum nomina praescriptis in eo loco, ubi incipit scena* \*\*). Quae verba attulimus jam hic omnia, quia etiam ea, quae sunt in extremo de diverbiis ab histrionibus pronuntiatis, non nullius momenti sunt in quaestione de tibiis et canticis Terentii nec umquam intellecta esse videntur. Superiora, quae ad modos canticorum mutatos attinent, ne illa quidem satis adhuc enucleata, non recte ii ceperunt, qui, ut Salmasius (ad Script. hist. August. p. 495) et Boeckhius (Annal. Heidelb. l. c. p. 169), de modis diversis diversarum tibiarum inter se in eadem comoedia succedentium Donatum loqui arbitrantur: quasi vero nulla varietas modorum in iisdem tibiis fu-

\*) Cftr. Geppertus l. c. p. 569 sqq., qui ad didascalias Terentii recensendas 45 libros scriptos consuluit.

\*\*) Ad manum mihi haec scribenti fuerunt editiones Terentii cum praefationibus vel argumentis et commentariis Donati Schreveliana (Lugd. Batav. et Roterod. 1669) et Westervoviana, quam Stallbaumius curavit (Lips. 1830 sq.) atque Klotziana (Lips. 1838, 1840); quarum haec, repudiatis tribus illis compendiis *M. M. C.*, quae et hac et superiore aetate omnes in hunc locum invirentes sine ulla dubitatione protulisse video, recurrit non bene ad editionum duarum vetustissimarum scripturam *d. m. c. s.*, quae mendosa sit necesse est.

erit, et quasi verisimile sit — quoniam in aperto est modos unius et ejusdem cantici mutari solitos dici — abjectas a tibicine tibias et novas in medio carmine sumptas esse. Negare noluit Donatus, aut quisquis haec post eum talia effecit, qualia nunc sunt, eas tibias, quas Adelphis esse scripserat, usque quaque huic fabulae esse, quippe cum nullas alias commemoret; is vero postquam seriam quandam dicendi gravitatem Terentio omnino placuisse memoravit, addere voluit, in iis quoque verbis non solum Adelphos, sed generatim fabulas Terentianas spectans, modorum quidem in canticis gravitatem, ab eo, qui modos fecerat, pro re nata usurpatam, ab eodem saepe variatam esse, idque in libris veteribus cura poetae notis designari hanc rem significantibus. Hoc in universum de comoediis Terentii intelligi scriptorem voluisse rerum exemplis firmaturi sumus; sed jam nunc apparet vitiosum esse illud: *saepe tamen mutatis per scenam modis cantica mutavit*; his enim verbis poeta diceretur orationis genus mutavisse pro mutationibus modorum ab horum inventore excogitatis, quod contra factum esse perspicuum est \*). Mendum cum ita primo correcturus essem: *saepe tamen mutatos per scenam modos cantici notavit*, mox satius duxi tantum ultimum verbum sic emendare, a ceteris manum abstinere. Nam ablativi esse possunt qualitatis et hic et ubi in praefatione ad Eunuchum legimus: *cantica saepe mutatis modis exhibita sunt*; quare ipsam formam vocabulorum, quorum notas subjecit, grammaticus in explicatione servavisse videtur, hic tamen inter ea interponens, si modo id ipse fecit: *per scenam*, i. e. in una eademque scena, sicut altero loco, qui valde corruptus est: *saepe*. Et quoniam, ut nos docet is, qui sine dubio ipse vidit, in libris vetustis Terentianis initio scenae indicari solebat, si quod canticum mutatis modis in ea scena continebatur, nec minus canticis, in quibus modi non mutabantur, opus fuisse denotatis sponte sane intelligitur, ad haec significanda in titulo scenae nomini personae, cujus erat canticum agere, subscriptum fuisse videtur *C.*, i. e. *canticum*, ad illa superiora *M. M. C.*, i. e. *mutatis modis canticum* \*\*). Cum hoc loco Donati prope omnes, qui de eo disseruerunt,

\*) Grysarus l. c. p. 373 ideo scribendum censuit: „saepe mutatis per scenam canticis, modos mutavit“, — addens: „d. h. so wie in der einzelnen Scene der Ton des Canticums sich änderte, so hat er auch den Tonsatz in dem musikalischen Texte ändern lassen“.

\*\*) Hermannus dicit l. c. p. 295: „Itaque ei scenae, in qua canticum esset mutatis modis, litterae *M. M. C.*, quae mutari modos cantici indicarent, praemittebantur“; similiterque praeter alios jam multis aetatibus ante Salmasius l. c.: „Significabant hae tres litterae singulares *mutatos modos cantici*“. Accuratus autem verborum designatorum formam definitam ita voluit Wolffius l. c. p. 5: „Mutantur modi cantici“. Male maluit Grysarus p. 373: „Mutavit modos cantici“; h. e. mutandos curavit poeta.

illum e Donati de comoedia libello contulerunt: *Diverbia histriones pronuntiabant. Cantica vero temperabantur modis, non a poeta, sed a perito artis musicae factis. Neque enim omnia iisdem modis in uno cantico agebantur, sed saepe mutatis, ut significant, qui tres numeros in comoediis ponunt, qui tres continent modos cantici* \*). Qvibus in verbis quid sibi velint tres numeri, satis Hermannus (p. 294 sq.) eatenus declarat, ut moris hoc censeat fuisse, ut praeter eam significationem, quae erat in titulo scenae, insuper ad eos versus cantici, in qvibus mutarentur modi, ascriberentur suo qvisque loco in margine numeri I, II, III. Ternarii vero numeri vis in re musica antiqua quam multiplex fuerit, monet Langius (l. c. p. 44), auctore usus Aristide Qvintiliano, cujus verba talia sunt \*\*), ut etiam iisdem tibiis geminis, qvibus cantus aliquis inceptus erat, qvarum cum aliis in eodem cantico commutationem loco Donati illo ostendi negavimus, maxime varios atqve plane contrarios animorum motus per triplicem modulationem exprimi potuisse pateat. Et qvalis ista, qvaeso, fuisset musicorum veterum ars, si nihil nisi triste, maestum, severum uno genere tiliarum cecinissent, nec quidquam alio qvodam nisi hilare, laetum, jocosum, si non iisdem tibiis a desperatione ad spem, a summo dolore ad maximum gaudium assurgere et contrariam, qvando usus erat, viam persequi potuissent? Sed qvia, ut supra indicatum est (p. 18), aliud genus tiliarum alii argumento accommodatius erat, ideo qvidem, non autem velut si per se qvodque genus nihil praeter unam rem valeret, magnum rei discrimen sine dubio in electione tiliarum ponebatur. — Haec ad priorem partem loci e praefatione Adelphorum supra allati disputanda nobis visa sunt, priusquam ad posteriorem, quae hinc orditur: *Item diverbia ab histrionibus crebro pronuntiata sunt* e. q. s., interpretandam aggredieremur. Qvam partem ii aut praeterierunt silentio aut, ut Langius, se non intellexisse professi sunt \*\*\*), qui de loco Donati dixerunt, praeter Wolffium (p. 7 sq.) et Gry-

\*) Proxime ibi sequentium verborum verissima est emendatio, etsi negat Grysarus p. 375, quam proposuit Langius in *Vindiciis tragoediae Romanae* p. 44 sq.: *Illius, qui hujuscemodi modos faciebat, nomen in principio fabulae et scriptoris et actoris superponebant.* (In libris est: *cantici illius. Qui hujuscemodi modos faciebant* e. q. s.).

\*\*) Διαφέρουσι δ' ἀλλήλων αἱ μελοποιταὶ γένει ὡς ἑναρμόνιος, χρωματική, διά-  
τονος· συστήματι ὡς ὑπατοειδής, μεσοειδής, νητοειδής· τόνῳ ὡς δώριος, φρύγιος,  
λύδιος· τρόπῳ νόμικῳ, διδυραμβικῳ, τραγικῳ· ἥθλει ὡς φαμέν τὴν μὲν συσταλικήν,  
δι' ἧς πάθη λυπηρὰ κινουμέν· τὴν δὲ διασταλικήν, δι' ἧς τὸν θυμὸν ἐξεγείρομεν τὴν  
δὲ μέσην, δι' ἧς εἰς ἡρεμίαν τὴν ψυχὴν περιάγομεν. (Antiquae musicae auctores, ed. Meibom., tom. 2 p. 30, qvod opus ad manum ipse non habui).

\*\*\*) Horum Donati verborum sententiam obscuram neqvdedum explicatam esse dicit etiam Friedlaenderus in *Antiquitatibus Beckeri et Marqvardtii*, IV. p. 540, ann. 3453.

sarum (p. 371 sq., ann. 2), quorum tamen ille, cautissime judicans, haec verba explicatu adeo difficilia esse ait, „ut desperandum sit, an quis umquam plenius et accuratius sensum indagare possit.“ Animadvertit autem Donatum ejusdem rei meminisse in praefatione ad Eunuchum, ubi haec leguntur: *Diverbia multa saepe pronuntiata, et cantica saepe mutatis modis exhibita sunt.* Neutro loco *diverbia crebro l. saepe pronuntiata* intelligi licere saepius a revocatis histrionibus repetita, cum praesertim talis successus semel pluriesve habiti memoria nihil ad perpetuam designationem comoediarum, quam spectare grammaticum ad Adelphos apertum est, pertineret nec posset eo modo in libris inscribi aut illis compendiis denotari, idem vidit. Ceterum *D* et *M* litteras interpretans *diverbia mutata*, excidisse fortasse utroque loco post *crebro* et *saepe* verba *per mutationem*, quae si exstarent, nullam futuram fuisse obscuritatem, nunc autem nihilo minus de celeritate, gravitate, vehementia in diverbiis pronuntiandis varie adhibita cogitandum esse credit: proinde quasi talis res non histrionum arti relinqvenda, sed iis in principio scenarum quarundam, quamquam in omnibus actione arguta opus erat, commendanda fuerit. Libri verba fabularum scenicarum continentes non magis potuerunt histrioniam praeceptis, praesertim tam generalibus neque ad singulos versus ascriptis, moderari, quam notas musicas, quarum separati libelli haud dubie erant, tibicini et cantori exhibere, sed cum ipsis verbis ad certas personas relatis tantum ejusmodi descriptionem partium fabulae proponere, ut etiam, ubi canticum esset, ubi canticum mutatis modis, ubi diverbium ad tibias pronuntiandum, indicarent. Neque felicius in vero reperiendo fuit Grysarus. Qui putat, ut in canticis Adelphorum et Eunuchi multitudinem modorum musicorum, ita in earum fabularum diverbiis horum multitudinem personarumque vicissitudines laudari apud Donatum, neque in comoediis eo loco, ubi scena inciperet, per *D* et *M* (interpretatur: *diverbia mutavit*) aliud quidquam significatum esse quam novae scenae initium. Videat vero oportet, si quis attentius Donati verba ad Adelphos contemplatur, non id, ut aliquid insigne, sive Adelphis sive in universum comoediis Terentii tribui, quod omnium fabularum scenicarum commune erat, ut varietate scenarum distinctae essent; sed in orationis tenore diverbiorum crebro pronuntiatorum mentionem sic injectam esse, ut haec res nexa sit ex iis ad eaque pertineat, quae ante memorata sunt de canticis variatis. Ne plura, ex illis, quae de diverbiis modulatis diximus, perspicuum hic jam esse debet aut ea diverbia, quae Diomedes locum in mediis canticis habere narrat, designari iisque cantica Terentii saepe distingvi et variari dici apud Donatum, qui etiam, quod „diverbia ab histrionibus crebro pronuntiata“ commemorantur, quoniam verba cantici non ab histrione gesti-

culante, sed a cantore efferebantur, quodam modo declaraverit se idem velle, ac si scripsisset: „diverbia in mediis canticis ab histrionibus“ e. q. s., aut alterum genus diverbiorum ad tibias pronuntiatorum aut simul utrumque significari. Etenim quod in praefatione Adelphorum Donatus de diverbiis addidit, id certe aliqua ratione modorum musicorum, de quibus ante loquitur, habita dixit. Adjecerim autem verbis reliquis ante *pronuntiata sunt* duo, quae sententia desiderat: *ad tibias*. Nam quantum verba Donati depravata sint, alter locus, qui est ad Eunuchum, ostendit, ubi commemoratio diverbiorum mentioni canticorum praeposita est in codicibus manu scriptis, qui hoc loco ne *diverbia* quidem servaverunt, — quae vox, quia in ceteris suis omnibus praefationibus Donatus de diverbiis simul et de canticis meminit, pridem ab arte critica restituta est, — sed *proverbia* habentes, produnt, quantopere sententia scriptoris librariorum et posteriores grammaticos olim fugerit, ut occasio aperta fuerit mutationibus et correctionibus falsis, quibus eo tandem perventum est, ut isti correctores non modo sibi, verum etiam omnibus, quod sciam, philologis recentiorum temporum persvaserint Donatum, ubi in praefationibus cantica et diverbia eodem loco nominat, diverbia semper sic dixisse omnino eos versus fabulae, qui canticorum non essent, ut hoc fit apud Diomedem l. c.:  *Latinae comoediae — — — duobus membris tantum constant, diverbio et cantico*. Nec vero solum *proverbia* mendosissime scriptum est, sed non minus falsum videtur *multa*, de quo Wolffius, leni utens iudicio, p. 7: „*multa* juxta *saepe* fortasse displiceat“. In verbi hic profecto inepti locum substituerim, et sane verisimiliter, *modulata*, e quo, praesertim per compendium scripto, alterum vel fortuito scripturae errore oriri potuerit, quo facto, cum illud: *Diverbia multa saepe pronuntiata sunt* ne intelligi quidem posse videretur, corrector excogitaverit *proverbia*. Quae autem ad Adelphos Donatus tradidit, ea scripta esse apparet, cum suis oculis vidisset volumina vetera, quae initio scenarum canticum mutatis modis et diverbia modulata vel canticis immixta vel separatim posita continentium, ut eas diversas partes distinguerent et suae quamque personae assignarent, annotatum haberent ad nomen personae, cui canticum agendum erat, *M. M. C.*, ad earum autem nomina personarum, quarum haec diverbia erant, *D. M.*, hoc est — non enim dubito sic interpretari — *diverbium modulatum*. Ad has res exemplis probandas sequentia pertinebunt, ubi etiam quaerendum suis locis erit, etiamne ea, quae in aliis praefationibus Donatus simul de canticis et de diverbiis attulit, ita plus minusve, ut quae apud eundem ad Adelphos et Eunuchum dicuntur, accipienda sint.

In Adelphis actus 3:ii scenae 2:ae versus 1—21 (versus fabulae 299—

319), quibus Geta, per scenam currens, metum et sollicitudinem et iram ob infortunium herili filiae et herae et cum iis sibi, famulo fidissimo, imminens effundit, dum adsunt et inter se colloqvuntur, nondum servo conspectae, Sostrata matrona et Canthara nutrix, canticum continere dixerunt cum Wolffio (p. 48) Benfejus (ad h. l. Terentii) et Gryсарus (p. 369): quod quidem propter verba servi secum loquentis concitatissima et vehementer commoti animi plena atque ideo actioni pantomimicae accommodata verisimillimum, immo certissimum est. Et cum, quod tradidit Donatus de diverbiis (ad tibias) pronuntiatis, referri sane debeat etiam ad ea, quae in canticis insunt, accedit id quoque argumentum, quod fere necesse est credere hanc comoediam aliquod canticum cum diverbio habere, neque vero ulla est alia pars Adelphorum, in quam haec res conveniat. Versus hi sunt \*):

- I. GE. *Nunc illud est, quom, si ómnia omnes sua consilia cónferant  
Atque huic malo salutem quaerant, auxili nil ádferant,  
Quod mihique eraeque filiaeque erilist. uae miseró mihi:  
Tot rés repente circumuallant, unde emergi nón potest:*  
5. *Vis egestas iniustitia sólitudo infámia.  
Hócine saeculum! o scélera, o genera sacrilega, o hominem ínpium,*  
SO. *Me miseram, quid namst quód sic uideo tímídum et properantém  
Getam?*
- II. GE. *quem néque fides neque ius iurandum néque illum misericórdia  
Représsit neque refléxit neque quod pártus instabát prope,*  
10. *Quoi miserae indigne pér uim uitium obtúlerat. SO. Non intéllego -  
Satis quae loquatur. CA. Própius obsecro áccedamus, Sóstrata.  
GE. Ah*
- III. *Me miserum, uix sum cómpos animi, ita árdeo iracúndia.  
Nil ést quod malim quam illam totam fámiliam dari mi óbuiam,  
Vt ego iram hanc in eos éuomam omnem, dum aégritudo haec  
ést recens.*  
15. *Satis mihi habeam súpplici, dum illós ulciscar meó modo.  
Seni ánimam primum exstínguerem ipsi, qui illud produxit scelus:*

---

\*) Seqvor in versibus Terentii afferendis et hic et alibi, ut par est, recensionem Fleck-eiseni. Cujus etiam rationem verba scribendi, saepius a mea ipsius abhorrentem, ne quid his locis in alienis peccasse videar, totam reddidi, et quidem etiam in u et v, i et j sonis scriptura non distinguendis, quam rationem, nunc in Germania usitatam, saltem extra editiones veterum minime necessariam esse, neque sane in figuris litterarum, sed in usu verborum bonam latinitatem ponendam existimaverim.

*Tum autem Syrum impulsorem, uah, quibus illum lacerarem modis!  
Sublimen medium arriperem et capite primum in terram statuerem,  
Vt cerebro dispergat uiam.  
Adulescenti ipsi eriperem oculos, post haec praecipitem darem.  
Ceteros ruerem agerem raperem tunderem et prosternerem.*

De pronuntiatione diuerbii cantico inserti non video homines doctos aliter sentire solere, ac de aliorum diuerbiorum: omnia enim diuerbia sine tibiis pronuntiata esse dicunt. En vero hic exempla *diuerbii ad tibiis modulati*. Nullo enim pacto credibile fieri potest tibiis post v. 6, nondum finita sententia Getae, mutas factas esse, ut statim rursus a v. 8 succinerent, atque iterum subito intra v. 10 in medio pede metrico conticuisse, donec denuo audiri deberent ad exclamationem Getae in fine versus 11, cum qua vocabulum antecedens per elisionem vocalis confunditur. Cernuntur hic profecto indicia pronuntiationis notis signisque compositae, qualis his temporibus vocatur *recitativa*. Praeterea intelligi etiam potest, quomodo in hoc cantico modis musicis per immixta diuerbia variatio afferri potuerit: neque enim sermonem matronae et nutricis, rei noscendae studio captarum et sane timere jam incipientium, postquam ad ultimum versum scenae superioris ambae bono animo fuerunt, sed quae nondum satis quidquam auribus et mente perceperunt (cfr. v. 7, 10, 11), eadem tristitia modulationis decuit, quae initium cantici servi omnia desperantis. Denique hoc quoque intelligitur, ipsius cantici modos mutatos esse, ubi abjecti animi maerorem depingere jam desiit et sensim assurgit ad maiorem semper iram et ulciscendi cupiditatem, cui Geta quomodo satisfieri velit, sibi ante oculos proponit, repraesentandam (inde a v. 8 usque ad finem). Dixerim tibiis post utrumque diuerbium animosius et fortius, quam antea, sonare coepisse et varietatem modorum cantici signatam fuisse per I, II, III iis locis, quibus hi numeri supra ascripti sunt.

Praeterea tria cantica in Adelphis Wolffius verissime, unum autem, quod ordine primum esset, perperam indicavit. Illorum in numero est soliloquium Aeschini in act. 4: i scen. 4:ae versibus 1—25 (v. f. 610—633), quod esse canticum nemo, credo, non vidit, qui id genus carmina in Terentio quaesivit: etenim argumentum huius soliloquii non minus, quam metrum valde varium, ex trochaicis, iambicis, choriambicis versibus compositum, naturae cantici plane congruit. Argumentum vero quia modo questus, in quos sese profundit iuuenis falso de perfidia suspectus, modo narrationem sermonis cum Canthara de his rebus habiti, modo deliberationem, quid in re trepida agendum sit, exponit, non poenitebit breviter dixisse hoc quoque exemplum censerī posse



cantici mutatis modis. Aliud canticum a Wolffio recte observatum continetur act. 5:i scena 1 (ex vera actuum distributione Fleckeiseni \*), vulgo ejusdem actus sc. 4, — v. f. 855—881), trochaicis septenariis ad canendum aptis constante tota; in qua Demea, senex parcus et severus, vitae rationes, sibi adhuc tam praeclaras visas, parum tamen prospere institutas et novas jam sibi in ipsa senectute periclitandas esse edisserit, cantico hanc poenitentiam confiteri eo magis putandus, quod in hac consiliorum ejus mutatione cardo quidam fabulae vertitur. Non aequè aperta indicia, ac quibus haec cantica insignia sunt, id habet, quod Wolffius tribuit Sannioni in act. 2:i sc. 1:a vel potius 2:a (in v. f. 196—208), quod etiam, sicut omnia superiora, agnovit Benefejus; verum tamen quae leno, solus in scena relictus, conquiritur de injuriis sibi illatis, dum eas, modo argentum accipiat, concoquere vult, sed, argentum ut sibi detur, misere metuit, ea, velocibus septenariis trochaicis expressa, tam sunt, si verba spectamus, pantomimicae actioni apta, ut hoc soliloquium nos quoque fidenter in numero canticorum repositum velimus. Nam praeceptum Grysari (p. 370), ne quis attribuat cantica nisi iis personis, quae locum admodum conspicuum in rebus fabulae gerendis tenent, parum confirmatur apud Terentium; veluti uni tantum personae de iis, quas in Adelphis primarum, secundarum tertiarumque partium habitas esse Donatus narrat \*\*), suum est ex hujus comoediae canticis. His ejus quattuor quintum accedit, de quo nihil attulit Wolffius, sed Benefeji annotatiuncula ad eum locum verbo monet canticum esse. Et id produnt praeter ea signa, quae canticorum sunt omnium communia neque huic desunt, quaedam, quae observentur, digna. Ctesiphonem enim, qui hoc agit canticum, Syrus, qui est in proscenio cum Sannione, venientem videns (v. f. 252), *laetum esse de amica* dicit et videlicet e gestu ejus colligit. Ut igitur adolescens jam, dum in scenam intrat, in gesticulando versatur, ita ibi, ut fit in canticis, oculis cernit neminem, sed animi sensa sibi soli interpretatur, donec Syrus nomen ejus exclamat. Argumentum autem versuum et ipsi versus cantico bene conveniunt. Neque obstat hoc loco brevitās, sicut in aliis quibusdam soliloquiis apud Terentium. Hic enim poeta, quod saepius monendi causa erit, perbrevis interdum cantico

\*) Cfr. Kayserus in commentariis Academiae litterarum Bavariensis, qui inscribuntur *Gelehrte Anzeigen*, tom. 47 p. 283.

\*\*) In hac primae partes sunt, ut quidam putant, Demeae: ut quidam, Syri. Quod si est, ut primas Syrus habeat, secundae Demeae erunt, tertiae Micionis, et sic deinceps. Quamquam etiam sunt, qui putant primas Micioni dandas, secundas Syro, tertias Demeae. — Syri nullum canticum est; quare esse non potest propter summam brevitatem soliloquium in quinque versibus 587—591.

utitur, si in vicinia aliud collocavit; neque hoc Clitiphonis nisi una scena haud longa disjunctum est a Sannionis cantico versuum item pauciorum. Comprehenditur act. 2:i sc. 4:ae (vulgo 3:ae) versibus 1—6 (v. f. 254—259):

*Abs quivis homine, quomst opus, beneficium accipere gaudeas:  
Verum enim uero id demum iuvat, si quem aequomst facere is bene facit.  
O frater frater, quid ego nunc te laudem? satis certo scio:  
Numquam ita magnifice quicquam dicam, id uirtus quin superet tua.  
Itaque unam hanc rem me habere praeter alios praecipuam arbitror,  
Fratrem homini nemini esse primarum artium magis principem.*

Ratione habita eorum, quae de tibiis afferenda sunt, animadverti volumus in hac laeti hominis declaratione animi grati illam „seriam gravitatem“, quam Donati praefatio nominat, non licentiam ullam joculari inesse. — Itaque quinque cantica huic fabulae sunt, ex iisque suo quisque actuum 3, 4, 5 instructus est, duobus autem brevioribus actus 2: primus, qui protasin fabulae continet, nullum habet. Omni enim probabilitatis specie caret, quod Wolffius in ipsa prima scena fabulae, exceptis versibus duobus primis et quattuor ultimis, canticum longissimum ascribit Micioni seni, qui, ut iambicis senariis utitur, a cantico, nisi si quando in metri varietate singuli aliis versibus intermiscuntur\*), et in Terentio et in Plauto alienissimis, ita tam loquitur secum sedate et seniliter, ut neque carminis ullum vestigium in dicendi genere deprehendatur, nec ullus locus fuerit motui gestuique illi in canticis vigenti, qui, ut actio a vocis cantu separaretur, effecerat. — At hic quaerat aliquis, num forte non cantica habenda sint ea aut quaedam eorum, ad quae id nomen a nobis quoque delatum est, sed verba ad tibicinis modos recitata, quando quidem hoc genus verbi etiam in soliloquiis reperiri posse sumpsimus. At vero fieri nequit, ut ea suspicio adhaerescat ad cantica Sannionis et Getae, quorum de hoc nihil addimus, de illo autem eas turpissimi lenonis querelas non aliter dignas existimandas esse, quae tibiis comitibus usae sint, nisi ut pantomimica ratione expressae putentur, cui quidem rei et risui inde captando materiam praeclaram obtulerunt, id quod perspexerit, qui rerum descriptionem pantomimicam cogitaverit in his, quae leno secum agit:

*Pro supreme Iuppiter,  
Minime miror qui insanire occipiunt ex iniuria.  
Domo me eripuit, uerberavit: me inuito abduxit meam:*

\*) Exempla praebent apud Terentium in Adelphis canticum Aeschini, apud Plautum Tyndari canticum in Captivis (v. f. 516—532).

*Hómini misero plús quingentos cólaphos infregit mihi.  
 Ób malefacta haec tántidem emptam póstulat sibi trádier.  
 Vérum enim quando béne promeruit, flat: suom ius póstulat.  
 Áge iam cupio, módo si argentum réddat. sed ego hoc háriolor:  
 Vbi me dixeró dare tanti, téstis faciet ilico,  
 Véndidisse mé, de argénto sómnum: „mox: crás redi“.  
 Íd quoque possum férre, modo si réddat, quamquam iniúriumst.  
 Vérum cogito id quod res est: quádo eum quaestum occéperis,  
 Áccipiunda et míssitanda iniúria adulescéntiumst.  
 Séd nemo dabit: frustra egomet mécum has rationés puto.*

Jam Aeschini canticum, qvod item largam copiam rerum motu corporis et gestu depingendarum dedit, si non est canticum, nullum circumspicias tota hac fabula. Neque adjiciendum quidqvam videtur de eo, qvod est Clitiphonis. Restat autem, qvod defensionis indigeat, illud Demeae senis. De qvo sic sentio: bene id quidem cogitatione fingi posse ad tibias ab histrione pronuntiatum, sed etiam arti pantomimicae idoneum, et omnino in soliloquiis, qvae ita se habeant, de cantico potius qvam de altero genere cogitandum videri, nisi si haec altera explicatio certis qvibusdam rationibus commendetur. — Sed esse etiam extra cantici fines istiusmodi diverbia huic comoediae in-texta locus ille praefationis ad credendum facile adducit. Qvalia in universum apud Terentium praecipue in principio actuum, post jam ante emissam vocem tibiarum, adhibita putanda sint. In Adelphis vero hos tantum locos ex conjectura indicatos volumus: breve et sollicitum colloqvium in act. 3 scen. 1, qvae scena canticum Getae antecedit atqve metri genere cum eo congruit, et Ctesiphonis Syriqve protervas argutias in act. 4 sc. 1.

Argumenta, de qvibus admonuimus, qvinque canticorum eam habent „seriam gravitatem“ (vid. p. 31), ut cum iis vox musicae gravis, qvae „seriam comoediae dictionem“ comitata esse traditur (vid. p. 6), sed tibiis Sarranis, qvae in omnibus didascaliae exemplis huic comoediae tribuuntur, fuisse vel propter hujus fabulae rationem cum indicio illo de tibiarum gravis soni in comoediis usu comparatam putanda jam nunc videtur, omnino concinuerit. Neque aliter judicari debet de cantu tibiarum ante novos actus audito. In primi priore scena Micio de filio adoptivo domum nondum a coena reverso admodum sollicitus est et sua ac fratris in filiis educandis consilia diversa enarrat, qvod idem argumentum ab eo in altera scena cum altercante fratre Demea tractatur. In secundo actu continentur initio Sannionis, e cujus domicilio tunc ipsum psalteria vi abducta est, clamores fidem popularium implo-

rantis et deinde scenae turbulentae hanc raptionem secutae cum canticis Sannionis et Ctesiphonis; in actu tertio ante Getae canticum tristis matris, quae salutis filiae timet, et eam consolantis nutricis sermo ac postea querimoniae et turbae variae. In quarto quidem seria et joca se excipiunt: ubi primo licentia Syri et Ctesiphonis prodit, mox autem hujus timor, indignatio Demeae, tum vero, praeterquam quae ludit semper Syrus et interdum Micio jocatur, seria in animis et factis omnium gravitas. Quintus initium capit a cantico illo Demeae. Haud parva est vis ridiculi in hac fabula, non solum in actibus duobus ultimis, sed jam a principio, inest vero in rebus et personis depictis, quales eas lector videt esse, non in hominum ipsorum mentibus aegritudine, ira, timore, temeritate, amore perturbatis, si a Syri animo intrepido atque lascivo et ab aequo et facili Micionis senis discesseris. Sicut igitur cantica omnia minime jocosae sunt, sic etiam ceteroquin tibias in rerum turbido statu graves sonos edidisse consentaneum videtur. At Sarranas cave tamen putes triste et lugubre aliquid semper sonuisse. Quas ad aestimandas praeclarum adjumentum offert didascalia ab Angelo Majo in codice Mediolanensi reperta et Ritschelii acumine (quamquam non de tibiis sonis) illustrata Stichii Plautinae, quam comoediam Marcipor Oppii modulatus est *tibiis Sarranis totam*. In cujus prima scena actus primi, in qua sorores desiderium suum maritorum jam triennium absentium expromunt (v. supra p. 26), gravitatem Sarranarum usurpari potuisse non est quod post superiora verba nostra demonstratur. Sed quomodo eadem tibiae inter omnes actus sonum fundere gravem potuerint, quomodo iisdem certissimum canticum Pinacii (v. f. 274—312) comitari, quo denique modo in comissatione Sagarini et Stichii (act. 5 sc. 4, 5), ubi praesens tibicen pluries commemoratur, locum habere licuerit, non percipitur, nisi si reputemus, quam bene nostris temporibus gravis sonus, quem *bas* svecice dicimus, ad res laetas et ad maxime ridiculas, velut quae dignitatem affectatam, gloriationem, magniloquentiam exhibent, quadret. Id vero si recordatus sis, nihil hac soni gravitate accommodatius fuisse dixeris et incessui ac verbis Pinacii, laetissimum ob nuntium, cujus scientiam solus in pectore gerat, immani atque coelum contingente superbia capti, et pompae illi comissantium. Ita omnis difficultas evanescit, neque erit cur quisquam ad contrariam istam opinionem, Sarranas acuminis levitate insignes fuisse, refugiat. Quae tibiae quia in Donati de comoedia commentariolo sinistris adjunguntur nec vero plane eadem dicuntur esse (v. supra p. 18), judicandus sum Sarranis sonos praecipue magis minusve graves recte ascribere, sed ita, ut copiosiores et diversarum modulationum capaciores quam pares sinistrae, quae, quantum e Terentii fabulis perspicitur, omnino maestum et

triste sonabant, ac dissimillimis rerum conditionibus animorumque motibus varie exprimendis idoneae Sarranae fuerint. Qvales si non fuissent, profecto nulli fabulae Plautinae atque nulli comoediae toti aptae esse potuissent. Et sane nihil minus decuit, quam ut maesta qvaedam tristitia musicae actibus Adelphorum praecineret. Verum nimii fuerunt homines docti in tibiatarum scenicarum generibus sic sibi opponendis, qvasi nullum genus ipsum in se habuisset aliquod subsidium ad quid contrarii transeundi. Salmasius igitur non aliter severiora et laetiora in Adelphis cantu tibiatarum conjungi potuisse neque mutatos modos, qvos dicit Donatus, aliter intelligi posse putat, quam ut affirmet „certo certius esse Adelphos Terentii actam esse Lydiis simul et Seranis, hoc est paribus dextris et sinistris“ (ad Script. hist. Aug. p. 495). Cui in hac re, ut jam supra commemoravimus, Boeckhius, summus auctor verae sententiae de tibiatarum dextrae et sinistrae sonis, non repugnat. Inter eos autem, qvi nuper didascalias Terentianas explicandas susceperunt, Wilmannsius, qvi opiniones Pseudodoni et Salmasii de sonis tibiatarum amplectitur, duabus dextris, qvas graves cogitat, Adelphos esse actam credit, „pro canticorum natura“, (de qvibus nihil affert singillatim), inter praefationes fabularum et libros Terentii dijudicandum esse censens (p. 47). Kohlius, qvi de tibiatarum vi et differentia alioquin auctoritate Boeckhii, nihil ipse addens argumenti idonei, contentus est, de Sarranis ducem deserit propter Adelphos, cui comoediae Sarranas adjudicat solas, eas vero pares dextras eademque acutas fuisse ac sonum „exsultantem et laetum“ edidisse arbitratur (p. 35), ut ne qvaesivisse qvidem videatur, qvae essent et qvalia cantica. Dziatzkius denique omnino codicibus Terentii plus fidei quam Donati verbis habendum illosque de tibiis seqvendo existimat, sed, Sarranae qvales fuerint, in incerto relinquit (p. 594 sqq.). Evidem, qvoad attinet ad tibias Adelphorum, libris Terentianis fidem sine ulla dubitatione adjunxerim; qvid autem de erratis in praefationibus Donati et in ejusdem de comoedia libello commissis sentiendum sit, dicam aptiore loco ad Eunuchum.

II. Non minus, quam in Adelphis, libri Terentii in Eunuchis, dum inter se conspirant \*), cum praefatione Donati de tibiatarum genere discrepant. Nam illi fabulam *tibiis duabus dextris* actam esse auctores sunt, in hac vero scriptum est: *tibiis dextra et sinistra ob jocularia vel multa \*\*)* *permixta gravitate*. Supra allata et explicata sunt, qvae de diverbiis et canticis in eadem praefatione leguntur.

\*) Cfr. Geppertus l. c. p. 552 sqq.

\*\*) Klotzius *vel multa* secundum editiones principem et Venetam anni 1485; vulgo *multa*.

Canticis investigandis hic quoque Wolffius satis bene praeiit, ut non jam nova reperire, sed ad reperta illustranda tamen nonnihil novi disputare atque etiam quoddam non recte agnitum exterminare liceat. Primum canticum agit Gnatho parasitus in act. 2:i sc. 2:ae v. 1—22 (v. f. 232—253) et deinde, post Parmenonis servi, qui illum non animadversus audit, interjectum diverbium versus unius, in v. 24—33 (v. f. 255—264). Id, quod interponit Parmeno versu integro: *Scitum hercle hominem! Illic homines prorsum ex stultis insanos facit*, cur pro modulato ad tibias diverbio habeatur, ratio singularis quaedam et necessaria non apparet, sed exemplorum collatione aliorum id concludi debere videtur. Intercapedinem hoc brevi soliloquio factam secuta certe est mutatio modorum ipsius cantici: hoc enim postquam ante septenariis trochaicis processit, jam continuatur iambicis septenariis, aliquanto, quam illi sunt, alacrioribus et hilarioribus: quibus parasitus magnam sibi in macello a venditoribus praestitam observantiam et novam sectam Gnathoniorum ibi a se conditam gloriatur, cum in superiore parte cantici, quid stultus et intelligens differrent, exemplis declaravit. — Tum in act. 2:i sc. 3:ae v. 1—12 (v. f. 292—303) inest cum intertexto longiore Parmenonis diverbio canticum Chaereae, quod in hunc numerum retulit, etsi dubitanter \*), Wolffius. Breve hoc quidem est, sed certum ideo canticum, quod et positum est in proxima vicinia perlongi, quod est Gnathonis, et in actu ex nostra sententia quarto gemellum sibi habet alterum ejusdem Chaereae proprium, quod item non amplius octo versibus comprehenditur; in quo ut adolescens, voluptate amoris fruitus, gaudio triumphat, ita in hoc priore se praebet perditae incensum aspectu subito pulcherrimae virginis, quam ex oculis amissam quaerit. Concesso autem, quod concedendum est, etiam hoc soliloquium Chaereae canticum esse, dignum videtur, ad cujus rationem lectores attendant, insertum diverbium Parmenonis. Etenim in his:

CH. *O faciem pulchram! Déleo omnis dehinc ex animo mulieres:  
Taedet cotidianarum harum formarum. PA. Ecce autem alterum!  
Nescio quid de amore loquitur: o infortunatum senem!  
Hic uerost, qui si occéperit,  
Ludum iocumque dicet fuisse illum alterum,  
Praeut huius rabies quae dabit!*

ultimum verbum Chaereae commiscetur elisione cum primo Parmenonis, et hujus diverbium ab iambicis octonariis in eam varietatem metri abit, ut haec

\*) V. tabulam canticorum in extremo libro ejus adjectam; ubi etiam signum interrogationis apposuit indicato a se in prima scena Adelphorum cantico, de quo supra diximus.

res cum illa altera ostendat huic quoque diverbio succinere tibias perrexisse, praesertim cum cantici tantum duo versus restent, ad quos solos illae, si ante obmutuissent, ab integro canere vix potuerunt. Facile vero ad suspicandum est etiam cantici ipsius modos mutatos esse, ubi post diverbium dira execratio a desperante adolescentulo emittitur, reversis tamen iisdem octonariis iambicis.

Priusquam in commemorandis canticis hujus comoediae longius progrediar, discedam parumper ad aliud, quod tamen etiam ad illud pertinet. Initium actus 4:i non recte ponunt cum libris et Donati argumento ad versum fabulae 615. Ita enim referunt ad eundem actum 3:um et Chaereae veste eunuchi induti introitum in aedes Thaidis (post v. 493) et ejusdem, postquam puellam oppressit, exitum in publicum (ad v. 545), intra quod tempus, ut nunc actus descripti sunt, sine ulla intermissione versus quinquaginta pronuntiantur, dum in tantillum spatium conjiciuntur omnia, quae in interiore domo ante exitum suum facta Chaerea narrat Antiphoni (v. 576 sqq.), ductum se esse custodem in conclave ad virginem, post decessionem Thaidis balneum puellae adornatum esse, hanc ad lavandum arcessitam isse, lavisse, redisse, tum in lecto collocatam, flabello ventulum ei faciente falso eunuchō, obdormivisse, interea lavatum abiisse etiam ancillas sequē tandem solum cum dormiente puella relictum esse, quaeque sequuntur reliqua. Ea omnia non aequē fere brevi tempore facta, ac narrata, proponere potuit Terentius, cujus arte dignum neque hic neque alibi omnem temporis computandi curam adeo negligere fuit. Nam quod ad Heautontimorumeni v. 168 sqq., 502 sqq., 557 sqq., 948 sqq., ad Andr. v. 901 sqq., ad Hecyr. v. 721 sqq. paulum temporis datum est ad intrandum in domum proximam et ad inde redeundum atque ad homines e vicina domo evocandos, et quod inter Andriae v. 467 et 481 Glycerio affuisse obstetrix (*temulenta et temeraria* v. 229) satis habet, inter Adelph. autem v. 586 et 713 Demea urbem perreptavit, haec aut suo quidque loco defendi et vel celeritate parata ac saepe impatientia hominum vel rursus gestus mora et ambulatione in scena opperientium satis explicari aut saltem facile ferri et praetermitti possunt\*), neque sunt comparanda cum dispositionis rerum hoc portento scriptori multum Plauti dissimili tributo, qui hoc loco accurata narratione rem secuta omnem spectatoribus occasionem de

---

\*) Modum excedit in negligentia hujusmodi rerum veteribus ascribenda Benfejus ad Heaut. V. 2. 1, et fugit eum relatio pronominis *harum* in Andr. v. 904, quod ad superiorem quandam longam orationem Pamphili extra scenam habitam se referre temere contendit. — Cfr. autem Bentlejus ad Heaut. V. 3. 12 et Hermannus l. c. p. 292.

longitudine temporis semet fallendi eripuisset. Intactum mendum reliquit Fleck-eisenus, qvi actibus recte distribuendis alia absurda sustulit. Sed hoc quoque vitium perfacile tollitur, si initium actus 4:i repetitur a v. 539. Ubi etiam regula adhiberi potest, quam Donatus posuit in argumento Andriae: *Est igitur attente animadvertendum, ubi et quando scena vacua sit ab omnibus personis: — — — ibi actum esse finitum debemus agnoscere.* (Cfr. p. 22 supra). Nam ad scenae superioris versum paenultimum Chremes, post ultimum Dorias et Pythias discedunt. Neque erit, quod cuiquam displiceat brevis actus 3:ii, cui sic versus modo supersunt 148, quemadmodum Adelphorum secundo sunt 133 et Hecyrae eidem actui 83.

Redimus ad cantica. Nullum est in actu tertio. Sequitur in quarto illud, de quo mentio jam facta est, Chaereae, quod continetur hujus actus scenae 2:ae (adhuc appellatae 5:ae act. 3:ii) versibus 1—8 (v. f. 549—556). A trochaicis septenariis duobus orsum, mox in iambicos primum septenarios, deinde octonarios transiens, victoriam cantat tanta alacritate, ita refertum felicitate amatoria et gestui acerrimo opportunitatem offerens, ut, etsi breve est, minime ambiguum videatur, quin sit canticum. Et dixit praeter Wolffium Benfejus. — Sed sicubi admodum breve canticum allatum est a Terentio, proxime aut antecessit aut sequitur aliud, et sic hujus carminis brevis nuntiat aliud quoddam non longe abesse. Ideo quoque canticum existimandum id nobis videtur, quod in act. 4:i sc. 3:a (vulgo 1:a), in v. f. 615—628, Wolffius non sine aliqua dubitatione notavit, Grysarus vero ob eam rem, quod non est personae in fabula eminentis hoc soliloquium Doriadis ancillae, canticum esse negat (p. 370). Supra monitum est contra legem illam a Grysaro propositam, quod monendum erat, ac ne in hac quidem comoedia canticum nisi unius est de tribus actoribus principibus\*). Wolffius quidem id dicit (p. 47) „obstare, quod (nihil nisi) expositio esse videatur rei apud militem gestae“ Doriadis sermo: at vero id potius svadet, ut cantico Chaereae adjungatur et in eodem reponatur genere: namque ut Chaerea in superiore scena cantico, quid intra aedes Thaidis factum esset, spectatoribus praenuntiabat, donec singula accommodatius persequi colloquio cum Antiphone inciperet, sic cantico ea, quae eodem tempore ab alia parte extra scenam in coena militis acta erant, ancillae loqvacitatem spectatores certiores facientem poeta induxerat, qvi ad res, quae in scena non aguntur, gratiore modo narrandas ter in Hecyra forma cantici, bis feminae tributi, usus est. Persvadent denique hoc

---

\*) De his in praefatione Donatus ait: *In hac comoedia qui personam Parmenonis actor sustinet, primas habet partes: secundae sunt Chaereae: tertiae ad Phaedriam spectant.*



esse canticum rationes, quae Wolffium non fugerunt, metrum versibus trochaicis et iambicis mira varietate compositum, quod conturbatum animum ancillae depingit, et „oratio vehementiorem gestum postulans“ trepidantis per scenam mulieris, cuius gestu quomodo etiam ad homines, de quibus verba fiunt, denotandos, qui verbis saepe obscurius distinguuntur, opus fuerit, intelligi sane potest. — Canticorum numerum Wolffius auctum voluit quinto quodam, quod nullum est. Nam sive metrum spectamus, quod meros senarios iambicos exhibet, sive orationem sedato gradu incedentem et mentem loquentis maxime tranquillam, neque gaudio elatam neque tristi ullo motu percitam, cuius eam ipsam tranquillitatem poeta opposuit furori Pythiadis \*), nihil magis a cantu alienum aut minus eam actionis vehementiam, quae canticorum erat, desiderans inveniri possit, quam soliloquium Parmenonis in v. f. 923—940 (act. 5 sc. 4). Ab aliis quibusdam hominum secum loquentium sermonibus rectissime Wolffius naturam cantici abjudicat. Cantica igitur sunt huius fabulae quattuor, eaque satis concinne distributa, duo, quae proxime inter se absunt, in actu secundo et item duo vicina in quarto.

Paucis respondeatur roganti, si quis erit, potiusne forsitan in his, ut etiam nobis visa sunt, canticis alterum, quod nos agnovimus, soliloquii ad tibias prolati genus lateat. Plane idem, quod paulo ante (p. 39) de Sannionis in Adelphis cantico dictum est, de Doriadis respondemus: etenim ne mente quidem comprehendere ulla potest ratio, quare huius ancillae hic sermo tibiarum amplo comitatu celebratus sit, nisi ea, ut locus daretur rerum repraesentationi pantomimicae, eique ad risum movendum hoc quoque loco peridoneae. Ceterum super canticis Eunuchi, qualia in hac fabula „saepe“ et quidem „mutatis modis exhibita“ esse praefatio docet, eadem, quae de Aeschini et Demeae diximus p. 40, repetere jam sufficiat. Hoc tamen praeterea addimus: dum in cantico Gnathonis et in priore Chaereae hi tralaticio canticum agentium more tam surdos et caecos se praebent, ut neque verba, quae a praesentibus interponuntur, audiant neque homines videant ante canticum ad finem perductum, posterius Chaereae non habet ullum diverbium interjectum, sed tali modo antecedentibus annexum est, ut hic locus non minorem caecitatem surditatemque illam ostendat. Non tam ut id eluceat, quam ut exemplum, sicut nobis quidem videtur, haud dubium diverbii extra canticorum terminos ad tibias pronuntiati, nunc afferamus, versus fabulae 539—548 (scenam 1 act. 4) hic subjicimus:

---

\*) Itaque haec, ut primum eum aspicit, indignabunda exclamat: *Vide, ut otiosus il, si dis placet* (v. 919).

*Heri aliquot adulescētuli cōtmus in Piraéo,  
In hūc diem ut de sūmbolis essémus. Chaeream ei rei  
Praefécimus: dati anulī: locus, témpus constitutumst.  
Praetériit témpus: quo in loco dictumst, parati nīl est.  
Homo ipse nusquamst: néque scio quid dicam aut quid coniectem.  
Nunc mi hóc negoti céteri dedére, ut illum quaeram,  
Idque ádeo uisam, si domist. quis nam hinc ab Thaïde éxit?  
Is ést an non est? ipsus est. quid hoc hóminis? quid hoc ornátist?  
Quid illúd malist? nequeó satis mirári neque concere:  
Nisi, quidquid est, procul hinc lubet prius quid sit sciscitári.*

Verba sunt Antiphonis adolescentis. Ipsa multas ob causas canticum haberi non possunt, ut quod is, cujus sunt, se ibi non solum esse jam inde a versu 7 scit, de mira ejus specie, quem contuetur, loquens, cum hic e contrario, etsi caute omnia circumspectat \*), alterum non conspicatur, in gesticulando jam occupatus, canticum acturus. Sed hoc canticum orationem Antiphonis excipit, et tibiae actui e nostra explicatione novo praecinuerant, et ab Antiphone septenarii veloces atque canori pronuntiati sunt. Ad hos igitur vocem tiliarum intermissam tacuisse non est verisimile. Ac brevis illa cantici octo versuum etiam hinc declaratur: nimirum satis diu tamen tibiae sonuerunt. — Plura huic comoediae ad tibias modulata diverbia esse praefatio fabulae indicat, et verba mendosa: *Diverbia multa saepe pronuntiata sunt*, quae sic correximus, ut *modulata* pro *multa* scribendum putarimus, non de iis diverbiis solis, quae intra vel juxta cantica sunt, dicta esse videntur, quia ante mentionem canticorum, quae post fit, allata sunt, nisi etiam hic ordo verborum mendosus est. Sed etsi conjectari nonnihil potest de prima scena actuum 2 et 3 et de ultima actus 4, tamen manum jam, ut ajunt, de tabula!

Nunc de tibiis. Est hoc inter argumenta Boeckhii, quibus dexteram acutam ac laevam et sinistram graviter sonuisse disputat, quod Eunuchus, comoedia maxime jocularis, cui codices Terentiani duas dexteram attribuunt, maxime hilares tibias requisiverit (l. c. p. 168). Quo nihil verius. Boeckhium Kohlius sequitur et Donatum, cujus praefatio tibiis dextra et sinistra hanc fabulam actam esse pro certo affirmat, erroris accusat (p. 33 sq., 54 sq.). Wilmannsius, cui dextrae tibiae graves et sinistrae acutae, hilares, jocosae videntur, propterea non potuit facere, quoniam de tibiis hujus comoediae Donato potius quam didascaliae fidem tribueret (p. 44 sq.). Dziatzkius e contrario libris

\*) Hic versus cantici primus est:

*Nūmquid hic est? nēmost. numquid hinc me sequitur? nēmo homost.*

Terentii credi debere disserit, ab ipsis tibiis autem, quas inter gravitatis et acuminis discrimen non statuit, nullum argumentum petit (p. 594 sqq.). Una est res, cujus ratione habita id, quod codices Terentii de Eunuchi tibiis annotatum habent, mancum videatur. Etenim post illud *tibiis duabus dextris* deest in didascalia vox *tota*, quae addita significat, ut ex titulis hujus generis, qui supersunt, atque etiam e verbis praefationum Donati satis intellectum est, fabulam eo, quod nominatur, genere tiliarum solo modulata fuisse \*). At sine dubio excidit hoc ipsum additamentum usitatum, neque nomen aliarum tiliarum, quae praeter duas dextras adhibitae essent. Supplementum enim non continetur ullum in Donati „tibiis dextra et sinistra“; quae, insolito modo ita appellatae, eadem sunt, quas veteres *impares* nuncupaverunt. Eunuchum tibiis duabus dextris totam actam putari neque cantica vetant neque reliquae partes comoediae, modo in fabulis comicis vim contrariam illi, quae in scripto Donati de comoedia dextris tibiis tributa est, earum fuisse judicemus. Primum canticum et quartum ridicula sunt, et quamquam, quae de Sarranis in Stichio Plauti usurpatis diximus, ea fidem facere videntur modos his in canticis duobus etiam ad eas tibias fieri potuisse, tamen nulla ratio est dubitare, num laetum et rebus jocularibus aptum dextrarum acumen in eadem convenit. Qui vero dubitationi locus erit in canticis altero et tertio? Quorum huic, — quod conjunctum est cum diverbio modulato, quod praecedit, Antiphonis, — sane ad nullum aliud tiliarum genus, nisi quod levitati et laetitiae maxime omnium accommodatum esset, modis semet dignis exsultare licebat, illud autem sagitta Amoris recens vulnerati adolescentuli non graviore curas aut justiores imprecationes proponit, quam quod semel visam puellam statim e conspectu amisisset. Ac si actuum principia et ceteras partes contemplamur, ad risum facta se omnia ostendunt: nusquam in discrimine versatur humana felicitas: de meretricis amore donis inter se contendunt Phaedria, in quo amor numquam serio repudiatus cum virili contumacia certat, et miles ignavissimus: clamores tolluntur propter falsum eunuchum, sed ii ipsi ridendi. Sic sunt omnia; quae longius persequeremur singillatim, nisi supervacaneum id jure videretur. Ne multa, difficilius est perspectu, ubinam ea sit „gravi-

\*) Ritschelius (*Parerg.* p. 265 sqq.) formam accusativi *totam*, quam habet Stichii didascalia, et propter quam ibi sine dubio recte supplevit *modulatus est*, veram esse putat etiam in Terentii fabularum titulis. Sed persvadet Dziatzkius (p. 592 sqq.) in his, in quibus *modos fecit* scribi semper oporteat, novam sententiam, brevissime, ut fit in didascaliis, prolatam et olim, ut videtur, in nova linea scriptam, incipi post nomen ejus, qui modos fecerat; ut in Eunuchi titulo, addito vocabulo quod deest, legendum sit: *Modos fecit Flaccus Claudii Tibiis* (Bembinus TIBIS) *duabus dextris tota* (i. e. acta est).

tas“, qva jocularia permixta putavit is, qvi apud Donatum tibiae impares huic comoediae addixit, qvam errata ejus et hic et alibi non modo agnoscere, sed qvodam etiam modo interpretari.

Si necesse nobis esset credere Aelium Donatum ipsum qvarto seculo ea omnia ita scripsisse, qvae sunt de tibiis in ejus praefationibus et in ejusdem de comoedia commentariolo, auctoritas hujus scriptoris tantum in his rebus valere debere videretur, qvantum plerumqve valuit. Namqve etiam ultimis Romanae antiquitatis temporibus qvin tibiae cum suis proprietatibus atqve differentiis in usu fuerint, nihil id dubitationis habet. Qvod cum ita sit, non mihi qvidem hoc assumpserim, ut contendam scriptorem, qvi illis temporibus multa de tibiis attulerit, diversitates earum principales ignorasse, qvamvis frequententer non modo in vita publica, sed etiam in privata Romanorum adhiberentur. Erratum autem de tibiis esse in scriptis nomen prae se ferentibus Donati e verbis ei tributis et supra saepius prolatis evincere jam eo argumento licet, qvod in illis verbis ea „gravitas“ (soni, qvi *bas* nominatur), qvae generatim ad „seriam comoediae dictionem“ et nominatim ad „seriam gravitatem“ fabularum Terentii affuisse dicitur, tibiis dextris, „id est“ — hoc enim additur — „Lydiis“ adjudicatur, Lydias vero voce acutissima usas esse certo demonstratum est (p. 15 sq.). Et hoc concesso illud seqvitur, de discrimine dextrarum et sinistrarum simul falso judicatum esse et contraria pro veris ducenda. Qvod si forte nunc commemoratio Lydiarum et in libello de comoedia, ubi sunt qvae eam non habeant libri MSS., et in praefatione Adelphorum aliena manu adjecta et expellenda videbitur: at tamen sani judicii posthac non erit verbis praefationum credere de tibiis Adelphorum et Eunuchi, spreto librorum Terentii omnium consensu, qvi si earum comoediarum tibiae recte nominant, ex Eunucho clare elucet, qvales dextrae fuerint, et idcirco etiam, qvales e contrario sinistrae: illas in comoediis laetitiae et joculari licentiae aptas eamqve ob rem — nam apud Donatum hoc conjungitur — acutas fuisse, has vero contrarias. Sed, ut eo, unde egressa est oratio, revertatur, qvemadmodum in Donati commentariis ad versus Terentii saepe diversi scriptores facile dignoscuntur, qvi dissimili ratione eandem rem dijudicant, ita in praefationibus non omnia sunt Donati. Hujus in his verba de canticis et diverbiis nonnumqvam tam esse ab aliis mutata, ut novam vel potius nullam sententiam acceperint, in hac ipsa commentatione jam ostendisse mihi videor. Atqve omnino canticorum memoria in Donati opere vel prope oblitteratam vel tamqvam e longinqvo revocatam se praebet. Ut enim is, cujus sunt haec, qvalia nunc habentur, de Phormione in ejus fabulae praefatione: „totaqve diverbiis facetissimis et gestum desiderantibus scenicum et svavissi-

mis ornata canticis *fuit*“, de iis, quae quondam fuissent nec jam homines nossent, locutus videtur, sic ea, quae in commentariis ad locos, qui cantica continent, annotata nunc leguntur, actionis acris et mimicae mentionem interdum facere solent (velut ad Andr. v. 183, Eunuch. v. 232 sqq. et 549, Adelph. v. 299), sed nullum ibidem verbum de cantico. Et ubi tamen semel in commentariis relicta mansit cantici vel monodiae nominatio (ad Hecyr. v. 816), annotatum est ad hujus cantici versum ultimum: „Hoc *eo tractu vocis* et ea aequanimitate *dicendum*, quali“ e. q. s., ut videatur, qui id consilium dedit, recitationibus scholasticis potius quam arti histrionali consulere voluisse, canticorum vero in scena agendorum rationis veteris scientiam nullam praebeat. Nec plus de diverbiis cantico insertis quam de cantico norat, qui ad interlocutionem cantici certissimi (ad Eunuch. v. 254) hanc stulte posuit annotationunculam: „Mire Terentius longae orationi interloquia quaedam adhibet, ut fastidium prolixitatis evitet“. Cum ita se habeant apud Donatum ea, quae ad cantica attinent, nonne, quae ad tibias, in eadem ratione esse possunt? Quorum si quid pugnat cum rebus evidenter aliunde exploratis, non debet his opponi Donati auctoritas, neque id ipse sic dixisse, sed aliquis eorum, quos commentariis ejus recoqvendis operam dedisse videmus, censendus est. Cantica singula potius jam ipse Donatus saepe ignoravisse et de his carminibus deque rationibus scenicis eo pertinentibus ita semper, ut de rebus a sui temporis usu alienis, locutus esse credi sane potest. Nam etiamsi fabulas comicorum palliatis seculo quarto et quinti initio agi nondum desitas esse testimonia exstant\*), haec actio tamen mutata fuit, et canticorum tunc talis fere, qualis ceterarum fabulae partium, fuisse videtur\*\*). — Non fortuitis tantum erroribus a librariis perturbata, sed correctionibus de industria tentatis corrupta haec sunt, de quibus nunc agitur; ubi etiam licet suspicari, quae causa fuerit et ratio emendationum falsarum. Qui enim illud de Eunucho sic scriptum reliquit: „Acta est — — — modulante Flacco Claudii *tibiis dextra et sinistra ob jocularia vel multa permixta gravitate*“, is dextras graviter, id quod idem ad Adelphos indicavit, et sinistras contra acute et hilariter sonuisse se compertum, nescio unde, habere credidit: is igitur cum tibias duas dextras Eunucho tribui legisset, nec vero jocularis comoediae ratio iudicium

\*) V. ea in Friedlaenderi *Darstellungen aus der Sittengeschichte Roms*, II. p. 306 ed. 2, ann. 1.

\*\*) V. supra p. 23 et ibi annot. 4. Cfr. vero etiam Wolffius p. 20 sq., ubi, verba Diomedis, quae sunt in extrema parte capitis de poematibus p. 492 Keil., interpretans, comoediam hujus grammatici tempore „ad recitationem fere solam relapsam esse, ab omni cantu et pantomimica gesticulatione abalienatam“, jure opinatur.

ejus fugere posset, confidenter verba mutavit; addiditque explicationem, quae „gravitatem“, quae nulla est, aliquam tamen atque adeo multam huic comoediae esse, cui ideo duas dextras ascriptas opinabatur, facile concedens, propter jocularia etiam sinistra opus fuisse narrat. Et idem sine dubio homo ad *Adelphos*, sua de tibiis sententia ductus, quam etiam hic explicatam voluit, verba haec scripsit: „Modulata est autem *tibiis dextris, id est Lydiis, ob seriam gravitatem*, quae fere in omnibus comoediis utitur hic poeta“. Etenim, sive ille seriam gravitatem canticorum hujus fabulae ipse animadvertit, sive, ut propter verba ibidem sequentia credibilis est, a Donato jam commemoratam vidit, Sarranis eam exprimi non potuisse cum sibi persvasisset, iis tibiis dextras vel *Lydias* substituit. Restat dicere de his in Donati de comoedia scripto, in quibus menda inesse Boeckhii ingenii acies intellexit: *Dextrae autem et Lydiae sua gravitate seriam comoediae dictionem pronuntiabant. Sinistrae et Serranae acuminis levitate jocosum in comoedia ostendebant*. His etiam verbis ista praefationum ad Donatum auctorem referri visa sunt; at nihil minus concedendum est. Una cum praefationibus et commentariis Donati ad tempora recentiora pervenit hoc ejusdem quod inscribi solet de comoedia (vel etiam de tragoedia et comoedia) fragmentum, idque, nunc mutilum, totius operis Donati de Terentii fabulis prooemium fuit, ad quod ideo lectores delegantur in praefatione sive argumento *Adelphorum* hoc loco (p. XVIII edit. Klotz.): „Protasis est turbulenta, epitasis clamorosa, catastrophe lenis, quarum partium rationem diligentius in principio proposuimus, cum de comoedia quaedam diceremus“. Locus indicatus hic est: „Protasis est primus actus initiumque dramatis, quo pars argumenti explicatur, pars reticetur ad populi expectationem tenendam. Epitasis est“ e. q. s. \*). Itaque nullius est audaciae sic sentire, emendatorem eum sane audacissimum, qui duos illos locos in praefationibus corrigere sibi visus est, simul tertium in eodem libro ita mutavisse, ut ea, quae de sinistris et Sarranis dicta erant, ad dextras et *Lydias*, eaque, quae de his, ad illas traheret; quam ipsam permutationem hoc loco factam esse vidit, sed negligentiae in excerptando admissae assignavit neque ullo modo cum duobus praefationum locis composuit Boeckhius \*\*). Donati autem

\*) His verbis inter se conjungi, uni auctori vindicandos, commentarios Donati et libellum de comoedia inscriptum vidit jam Schopenus in Museo Rhen. anni 1827, p. 155.

\*\*) Dicit enim p. 166 ante libelli de comoedia verba a se prolata: *Gegen die andere Meinung des Salmasius, dass nämlich die tibia sinistra den Discant, die dextra den Bass spiele, oder jene höher, diese tiefer gehe, lassen sich sehr gegründete Einwendungen machen, da sie einzig auf dem Zeugnisse des vielfach verderbten und von Unwissenden interpolirten Donatus de tragoedia et comoedia beruht*; et post haec verba nihil addit prae-

et hic et alibi in iis, quae ei tribuuntur, re vera ab initio omnia fuisse, quae postea additionibus variisque mutationibus adulterata sunt, cur negandum sit, non perspexerim. Ad eum igitur scriptorem et, quantum fieri possit, ad verba principalia gravissimus locus revocandus sic videtur: *Agebantur autem tibiis paribus aut imparibus et dextris aut sinistris. Sinistrae et Sarranae sua gravitate seriam comoediae dictionem praenuntiabant* \*). *Dextrae autem et Lydiae acuminis levitate jocus in comoedia ostendebant. Ubi autem dextra et sinistra acta fabula inscribatur, mistim joci et gravitates denuntiabantur* \*\*). Ceterum pravae istae trium locorum correctiones, primo, opinor, ut assolebat, modestius inter lineas vel in margine scriptae, quomodo in novis exemplaribus verba Donati expellere iisque succedere potuerint, nemo, qui studia critica in litterarum antiquarum monumentis exercuit, nescit. Quis ille corrector et quo tempore fuerit, ignoramus; tum vero eum vixisse, cum tibiis veterum notitia quaedam jam tantum apud doctos remaneret, et propterea fortasse Calliopii aequalem fuisse jure statuendum est \*\*\*).

III. Transgredimur ad Phormionem. In codice Bembino desunt huius comoediae titulo, cujus mancae reliquiae supersunt, omnia de tibiis; Calliopiani *tibiis imparibus totam actam* narrant omnes, quotquot consulti sunt, exceptis tribus \*\*\*\*); in Donati praefatione haec sunt: *Haec acta est* — — —

---

ter illud: *Wie leicht konnten hier beym Excerptiren von einem Unkundigen die Worte vertauscht werden!*

\*) Ita (*praenuntiabant*, non *pronuntiabant*) hic scribendum esse conjeci supra p. 30.

\*\*) Imperfecto tempore verborum Donatus uti pergit, ubi non jam de musicis exercitationibus ante actionem fabulae institutis, sed de librorum editorum titulis, quid de genere musicae olim, cum in ludis scenicis comoediae florerent, intelligentibus promiserint, loquitur. In hoc nihil est, quod offendant. Sed quoniam Terentianarum fabularum tituli non illud confirmant, *dextra et sinistra actas inscribi* solitas esse fabulas imparibus actas tibiis, et illius Pseudodonati id est, ut supra ostendimus, quod in praefatione Eunuchi haec comoedia *tibiis dextra et sinistra acta* dicitur, magnopere verendum est, ne ejusdem hominis manus aliquam mutationem importaverit huic quoque parti; quo loco tamen, si scriptum esset: *Ubi autem imparibus, id est dextra et sinistra, acta fabula inscribatur* e. q. s., omnia incorrupta viderentur.

\*\*\*) Si cui minus placuerit explicatio hic a nobis proposita, alia explicandi via et fortasse faciliior se ostendet sic sentienti, forte primum ac sine voluntate verba a librario transposita esse in prooemio de comoedia scripto, deinde convenienter sententiae ibi ita ortae emendatorem aliquem consulto et causa adjecta bis in praefationibus comoediarum ea mutasse, quae cum definitionibus Donati in principio operis allatis pugnare arbitraretur.

\*\*\*\*) In uno legitur *tibiis parilibus*; duorum librariorum auctoritas Donati commovisse videtur, ut scriberent *tibiis serranis imparibus*; in ceteris est *tibiis imparibus* vel *imparilibus*. Cfr. Geppertus l. c. p. 560—563.

*modos faciente Flacco Claudii filio \*) tibiis Serranis, totaque diverbiis facetissimis et gestum desiderantibus scenicum et suavissimis ornata canticis fuit.*

Circumspicientibus nobis, quae essent cantica, primum eorum, quod nec Wolffius nec alii commemorarunt, satis manifestum visum est. Continent id cum immixto diverbio versus fabulae 179—192 vel v. 1—15 scenae 2 actus 2 (ex actuum recta descriptione recentiore, antea sc. 4 act. 1). Agit hoc canticum Geta servus, qui, cum necopinato herum reducem in portu conspexit, per scenam accurrit et interdum gradibus sustentis angorem et timorem enuntiat. Eum postquam se proripientem Antipho vidit et sollicitus Phaedriae monstravit (v. 177 sq.), canticum incipit, quod hic ponimus una cum versibus, qui proxime sequuntur, duobus.

- GE. *Núllus, Geta, nī iam áliquod tibi consílium celere réperies:  
Íta nunc inparátum subito tánta te inpendént mala:  
Quae néque uti deuitém scio neque quó modo me inde éxtraham:*
4. *Nam nón potest celári nostra diútius iam audácia. \*\*)*
6. AN. *Quid nam ille commotus uenit?*
- GE. *Tum témporis mihi púntum ad hanc rem est: érus adest. AN.  
Quid istúc malist?*
- GE. *Quód quom audierit, quód eius remedium inueniam iracúndiae?  
Lóquar? incendam: táceam? instigem: púrgem me? laterém lauem.*
10. *Heú me miserum: quóm mihi paueo, tum Ántipho me excrúciat  
animi:  
Eius me miseret, ei nunc timeo, is nunc me retinet: nam ábsque  
eo esset,  
Récte ego mihi uidissem et senis essem últus iracúndiam:  
Áliquid conuasássem atque hinc me cónicerem protinam in pedes.*
- AN. *Quam nam hic fugam aut furtúm parat?*
15. GE. *Sed ubi Ántiphonem réperiam? aut qua quaérere insistám uiam?*
- PH. *Te nóminat. AN. Nesció quod magnum hoc núntio expectó ma-  
lum.*
- PH. *Ah, sánun es? CE. Domum ire pergam: ibi plúrimumst.*

\*) Proximum verbum perperam apud Donatum additum esse constat. Atque Flaccum Claudii non libertum, ut vulgo dicitur, sed servum Claudii fuisse perspexit Wilmannsius et demonstravit p. 35 sq.

\*\*) Versum quintum (*Quae si non astu prouidentur, me aut erum pessum dabunt*), qui Andriae est versus 208, huc in libris transpositum exterminavit Fleckeisenus, cujus recensionem in versibus Terentii afferendis, ut ante dictum est, accuratissime sequi constituimus.



Antipho et Phaedria, qui stant in pulpito, verba Getae advenientis aut nihil audiunt (vid. v. 6 et 7) aut parum (v. 14 et 16); nam primo tantum gestum ejus vehementem interpretantur et postea imperfecto modo auribus verba excipiunt, quae a principio spectatoribus clare sonuerint necesse est. Quomodo illud fingi poterat verisimiliter? Primum sic, opinor: procul servus in magna scena tum currentem, tum subsistentem gestumque agentem se ostendebat. Magnitudo autem scenae theatri Romani quae fuerit jam Terentii temporibus, in hac ipsa parte hujus fabulae satis arguitur; nam Demipho senex, qui paulo post, ad v. f. 215, in conspectum venit colloquentibus Getae et Antiphoni et Phaedriae ambulans *in ultima platea*, non ante in pulpitum ascendisse indicatur quam ad v. 231\*). Jam porro quo tandem modo cum satis magna veri specie adolescentes, dum Geta appropinquat, ea, quae spectatores auribus percipiebant, suis non accipientes induci potuerunt? Et quomodo spectatores, ad quos omnis sermo e proscenio emitti solebat, haec eadem verba ex ultima scena, si in ea dicta essent, exaudivissent? Non ibi sunt pronuntiata ab histrione, verum hujus loco, in gestu occupati, cantor ea ad tibicinis modos cecinit. Ita demum intelligitur non audire juvenes fingi potuisse, ad procul gesticulantem histrionem conversos, spectatoribus clare audientibus. Itaque hoc est canticum. Cui simillimum illud est, quod supra ex Adelphis, cujus fabulae primum est, attulimus, quod dum se canere simulat servus e longinquo adveniens, nihil satis audiunt Sostrata et Canthara: quare id canticum esse jam novum testimonium accessit. Hoc autem in Phormione primum quas etiam intextas habet diverbii partes, eas quoque ad tibias pronuntiatas esse satis evidens fit ad v. 7, intra quem postquam decantatus fuit nuntius terribilis: *erus adest!* et astiterat in horrenda timoris specie defixus Geta, vix tibiis conticescendi spatium datum est, versu nondum finito, priusquam jam Antiphoni, gestus aspectu paventi, exclamandum esset: *quid istuc malist?* Sed non satis liquido dici potest, quem ad locum canticum continuatum sit, quod tamen non ultra versum 15 progressum est. Brevitas cantici autem hic quoque est indicio aliud mox sequi. — Hoc quidem Wolffius observavit, qui in Phormione duo cantica reperit. Inest in act. 2:i sc. 3:ae (olim falso 1:ae) v. 1—16 (v. f. 231—246), qui praeterea diverbium habent intermixtum; iique etiam versus hic afferendi sunt:

DE. *Itane tandem uxorem duxit Antipho iniussu meo?*  
*Nec meum imperium: ac mitto imperium: non simulatam meam*

\*) Hunc senem canticum suum totum egisse in proscenio vel ex eo apparet, quod dicta ejus omnia audiunt, qui occultati auscultant, Geta et Phaedria.

*Reueréri saltem! nón pudere! o fácinus audax, ó Geta*  
*Monitór! GE. Vix tandem. DE. Quid mihi dicent aut quam cau-*  
*sam réperient?*

5. *Demíror. PH. Atqui réperiam: aliud cúra. DE. An hoc dicét*  
*mihi:*

*„Inuítus feci, léx coëgit“? áudio, fateór. GE. Places.*

DE. *Verúm scientem, tácitum causam trádere aduorsáriis,*  
*Etiámne id lex coëgit? PH. Illud dúrum. GE. Ego expediám:*  
*sine.*

DE. *Incértumst quid agam, quía praeter spem atque incredibile hoc*  
*mi óbtigit:*

10. *Ita sum inritatus, ánimum ut nequeam ad cógitandum instituere.*  
*Quam ob rem ómnis, quom secúndae res sunt máxume, tum má-*  
*xume*

*Meditári secum opórtet, quo pacto advorsam aerumnám ferant.*

*Pericla, damna péregre rediens sémper secum cógitet*

*Aut fili peccatum aut uxoris mórtē aut morbum filiae,*

15. *Commúnia esse haec, néquid horum umqvam áccidat animó nouom:*  
*Quidquid praeter spem euéniat, omne id députare esse in lucro.*

Demiphonis oratio laesae majestatis et graviter commotae irae paternae imaginem exhibet cantico et pantomimica arte profecto dignam. Diverbium vero, ludificantis contumaciae et audacis consilii plenum, quod iis locis allatum est, ubi tacitum parumper vel minantis vel meditabundi aspectum praebere irati et solliciti patris et heri fuerit, tam crebro est tam brevibus cantici partibus interpositum, ut pro cantico tamen hoc putare non possemus, nisi jam supra exstarent exempla verborum cantici et diverbii per elisionem vocalis conglutinatorum, sicut hic (v. 5), isque proximus contextus et membratim concisum dicendi genus explicationem in eo haberent, quod hujus quoque cantici diverbia ad tibiarum modos nusquam interruptos haud dubie dicebantur \*). — Nec minus ad tibias diverbium pronuntiatum est alterius cantici a Wolffio monstrati, quod cum interlocutionibus continetur act. 4:i sc. 6:ae (olim non recte

\*) Non sufficit explicatio Wolffii, gestu effectam retardationem et moram causam praetextentis, cujus ex. gr. hoc de cantico omnia verba afferamus: „Contra canticum esse dixerim orationem Demiphonis 2, 1, vss. 1—16, irascentis de filii nuptiis se inscio factis et secum deliberantis, quid filius sit incepturus. Interjiciuntur verba Getae et Phaedriae a sene non conspекtorum, sed audientium, quae ipse loquitur. Plurimus hic necessarius erat gestus, ne breviora haec verba putes“.

habitae act. 5:i sc. 1:ae) versibus 1—11 (v. f. 728—738). Verba Sophronae nutricis, quibus saepius interloquitur, dum mulier eum non videt, Chremes, num sint canticum, dubium videtur Grysaro (p. 370) propter eandem rationem, quam in personarum fabulae inferiorum canticis bis supra attigimus \*); hoc vero soliloquium, gravissimo loco prolatum, ad nodum fabulae solvendum viam parat et omnibus numeris, qui necessario sunt spectandi, justum canticum se ostendit: modo ut concedatur, id quod lectores moniti haud repugnanter facient, tibias interlocutionum brevium, passim in mediis sententiis et in ultimi versus fine intextarum, non minus quam ipsius cantici comites fuisse.

Brevitas hujus cantici, prope quod nec ante nec post est aliud, in propinquo saltem cantu tibiarum quasi compensata est, quoniam ultimam scenam actus 4:i hoc canticum introducit. Praeterea autem cantum inter actus secutum excepisse videtur diverbium ad tibias pronuntiandum. Digna enim tibiis haec erat, quae a Demiphone sene, postquam fraude a Geta circumventus argentum Phormioni expendit, expromitur sapientia, assentante Geta servo cum occulta irrisione:

- DE. *Nostrápte culpa fácimus ut malós expediat ésse,  
Dum nímium dici nós bonos studémus et benignos.  
Ita fúgias ne praetér casam, quod áiunt. nonne id sát erat,  
Accipere ab illo iniúriam? etiam argéntumst ultro objéctum,  
Vt sit qui uiuat, dum áliud aliquid flágiti conficiat.*
- GE. *Planíssume.* DE. *Eis nunc praémiumst, qui récta praua faciunt.*
- GE. *Veríssume.* DE. *Vt stultíssume quidem illi rem gesserimus.*

Nec minus decebat ad tibias jam exterreri a Geta senem, donec ad mala praecavenda de scena abeat (v. 8—12); quo facto servus secum haec deliberrat, quae non canticum, sed continuatum diverbium modulatum esse possunt:

*Argéntum inuentumst Phaédriae: de iúrgio silétur:  
Prouisumst, ne in praeséntia haec hinc ábeat: quid nunc pórró?  
Quid fiet? in eodém luto haesitás: uorsura sólues,  
Geta: praésens quod fuerát malum in diem ábiit: plagae créscunt,  
Nisi próspicis. nunc hinc domum ibo ac Phánium edocébo,  
Nequid uereatur Phórmionem aut hulus oratiónem.*

\*) De hujusce fabulae personis Donatus narrat: *Primas in ea partes, ut ipse poeta professus est* [prolog. v. 27], *tenet Phormio; secundas Geta, tertias Demipho; subinde ceteri, prout cujusque actus ostendit.*

Itaque versus hujus fabulae 766—783 ad tibicinis cantum pronuntiati videntur, praesertim cum in principio novi actus positi sint. — Quid vero sentiendum est de eo loco, ubi Geta rursus in scenam e domo herili exiit, superfundente se ejus laetitia ob res heri minoris subito felices factas, praesentibus, sed ab eo non aspectis Antiphone ipso et Phormione? Cantici et interlocutionum rhythmica modulatione expressarum simillima omnia videntur in his:

- GE. *Ó fortuna, o fórs fortuna, cuántis commoditatibus,  
Quám subito meo ero Antiphoni ope uóstra hunc onerastis diem!*  
AN. *Quid nam hic sibi uolt?* GE. *nósque amicos eius exonerastis metu!*  
*Séd ego nunc mihi céssó, qui non úmerum hunc onero pállio*  
*Átque hominem propero inuenire, ut haéc quae contigerint sciat.*  
AN. *Núm tu intellegis, híc quid narret?* PH. *Núm tu?* AN. *Nil.* PH.  
*Tantúndem ego.*

At tanta hujus loci est breuitas, ut de cantico non possit cogitari, nisi accedant, quae rem firment. Illud continuo sequitur:

- GE. *Ád lenonem hinc ire pergam: ibi nunc sunt.* AN. *Heus, Geta.* GE.  
*Ém tibi.*  
*Núm mirum aut nouómst reuocari, cúrsu quom institeris?* AN. *Geta.*  
GE. *Pérgit hercle: númquam tu odio tuó me uinces.* AN. *Nón manes?*  
GE. *Vápula.* AN. *Id quidem tibi iam fiet, ntsi resistis, uérbero.*  
GE. *Fámiliariórem oportet ésse hunc: minitátur malum.*

Audit Geta vocantem, sed retro respicere non curat, alienum aliquem sibi currenti illudere putans \*), subsistens tamen interdum, ut verba gestu exprimat. Sed tandem se convertit et herum procul visum (hunc vero eum sequentem cogitemus) agnoscit et advocat, et sibi occurrunt ambo; quo pertinet hic versus:

- GE. *Séd isne est quem quaero án non? ipsust: cóngredere actutím.* AN.  
*Quid est?*

Longe in magna scena servum se proripuisse, antequam oculos retorqueret, intelligi debet; quam ob rem de eo admonentes, quod nuper ad canticum primum hujus fabulae notavimus, hoc quoque ejusdem Getae canticum esse contendimus. Nam quod servus, dum currit, vocem alterius exaudit, id notioni

\*) Benfejus annotavit ad h. l.: *Slaven, welche eilig wohin laufen, durch Rufen zu wehren scheint eine neckische Sitte der Griechischen Jugend gewesen zu seyn.*

cantici adversari non videtur, quandoquidem hos esse inanes clamores pueri de via alicujus sibi persvadet Geta et secum magis quam cum altero, quem non videt, loquens stomachatur. Sed sejungimus versum proximum a canticis, cujus ita et interlocutionum fiunt versus 1—11 scen. 6:ae act. 5:i (v. f. 841—851). — Et breve tamen hoc canticum est. Verum totam, quae deinde in ea scena affertur, narrationem Getae et verba audientium, quoad solus relinquitur Phormio, ad tibias pronuntiata esse suspicamur. Quid, quod etiam perpaulo ante idem canticum tibiae forsitan cecinerint in soliloquiis Antiphonis et Phormionis (v. f. 820—828 et 829—832), quae non esse cantica, quod actioni pantomimicae occasionem nullam dederunt, pro certo affirmamus. — Porro tiliarum cantus neque abfuisse videtur a colloquio Antiphonis et Phaedriae metri varietate et affectus vi conspicuo in v. f. 153—178 (act. 2:i scena 1, quam prius canticum Getae subsequitur), neque a Phormionis et Getae diverbio in v. f. 315—347 (act. 3:ii sc. 1), quo loco audacem et sollertem lentitudinem suam spectatoribus primum in conspectum dedit Phormio parasitus, persona partium primarum, cui nullum canticum est. Hoc breviter, ut de hujusmodi diverbiis dicere soleo, indicavi, probaturos tamen esse non despero, qui locos consideraverint. — Sed nondum requiescere nos sinit canticorum in hac comoedia et diverbiorum modulatorum quaestio. Utrius generis (an fortasse neutrius) hoc Antiphonis secum colloquentis esset (v. f. 465—470, act. 3:ii sc. 4:ae v. 1—6), difficile dictu nobis visum est:

*Enim uero, Antiphó, multimodis cum istoc animo es utuperandus:*

*Itane te hinc abisse et uitam tuam tutandam aliis dedisse!*

*Alios tuam rem credidisti magis quam tete animum aduersuros?*

*Nam ut ut erant alia, illi certe, quae nunc tibi domist, consuleres,*

*Nequid propter tuam fidem decépta poteretur mali:*

*Quotius nunc miserae spes opesque sunt in te uno omnes sitae.*

Geta, qui ante in scena est, prospicit et versu superiore nuntiat introitum in scenam Antiphonis, sed sic fit saepe etiam, ubi canticum non agetur, neque caecitas illa, quam diximus, canticum agentis necessario tribuenda hic est Antiphoni, qui cum Getam praesentem animadvertit, id ita declaratur (v. 471 sq.):

GE. *Et quidem, ere, nos iam dudum hic te absentem incusamus, qui abieris.*

AN. *Te ipsum quarebam.*

At vero, quemadmodum haec profecto in canticum quadrant, sic fuit sane gestui pantomimico locus in verbis Antiphonis, quae cum illis Ctesiphonis in

Adelphis (v. f. 254—259) comparanda atque nomine cantici et ipsa appellanda videntur; hoc autem ita putamus, ut opinemur tibias, si non ad reliquam partem hujus scenae brevioris, at pariter ad priorem sequentis, magna concitatione animorum insignem, sonos fudisse (ad v. f. 485—503, donec etiam alios adesse viderunt Phaedia et Dorio). — Jam hoc e superioribus efficitur, *diverbia* intelligenda videri *ad tibias modulata* in his verbis e Donati praefatione ante allatis: *totaque diverbiis facetissimis et gestum desiderantibus scenicum et suavissimis ornata canticis fuit*.

Primum autem horum verborum *tota* errore mali correctoris a commemoratione tibiarum, quae proxime antecedit, ad sequentia tractum est, quemadmodum evenit et saepissime in didascaliis fabularum Terentii, ubi ideo legitur: *tota Graeca Menandru*, quaeque sunt cetera similia, et in Donati praefationibus Andriae et Hecyrae, quarum haec habet: „Modulatus est eam Flaccus Claudius *tibiis paribus*. *Tota* Graeca est“ e. q. s., illa autem: „Modos fecit Flaccus Claudii filius *tibiis paribus* dextris et sinistris. Et est *tota* Graeca“ e. q. s. *Tota*, pro qua forma codices saepe in didascaliis *totam* offerunt, ad tibiarum mentionem proxime ante factam recte pertinere primus dixisse videtur Ritschellius l. c. p. 263 sqq. \*), et hoc idem de verbis praefationis Phormionis fabulae suspicatus est, erratum ipsi Donato ascribens, Dziatzkius (p. 592 ann. 22). In hac praefatione superiora ejusdem sententiae illa sunt: *Haec acta est ludis Megalensibus, Lucio Cornelio Merula aedili curuli et L. Postumio Albino, agentibus L. Cassio Attilio et L. Ambivio, modos faciente Flacco Claudii tibiis Serranis, totaque* e. q. s. Quorum pars ea, de qua hic nobis quaerendum est, in integrum sic restitui facillime potest: *Haec acta est ludis Megalensibus, — — — modos faciente Flacco Claudii tibiis Serranis tota* \*\*). Verum enim vero is, quem ita scripsisse arbitramur, et qui in ludis et aedilibus ceterisque, quae deinceps commemorantur, rebus enumerandis tralaticium harum rerum in didascaliis ordinem secutus est, didascaliae exemplum, quod sequeretur etiam in eo, quod de tibiis dicit, ante oculos videtur habuisse; eamque ob causam multo plustribuendum est hoc loco testimonio de tibiis Serranis, quam in Adelphorum praefatione mentioni dextrarum vel Lydiarum et in Eunuchi tibiarum dextrae et sinistrae sive imparium, quibus ambobus locis corrector aliquis, nisi nos omnia fallunt, suo arbitratu annotationem inseruit, cui veriora verba cesserunt. Nam ut illic prava mutatio pluribus signis indicata est, ita hoc loco nullis. Neque enim

\*) Cftr. etiam Geppertus p. 561 et alibi atque Dziatzkius p. 582 et 592 sqq.

\*\*) Aliter Dziatzkius l. c.

hic reperitur addita explicatio, quare, quod fabulae attribuitur genus tibiaram, ad eam accommodatius habendum sit quam aliud; et vero, si cui tamen idem corrector videatur non minus facile hoc loco alias tibias substituere potuisse, ipse imparibus, quas libri Calliopiani nominant, silente de tibiis, ut ante relatum est, Bembino, Sarranas praeferens, haec opinio eo refellitur, quod ex ejus correctoris sententia Sarranae „acuminis levitate jocum in comoedia ostendebant“, easque hanc ob causam ille non aptas Adelphorum canticis existimavit, ea vero cantica, quae in Phormione sunt Getae et Demiphonis in actu secundo et Sostratae in quarto, ne quid nunc de ceteris moneamus, a ludo et joco tam longe abesse, quam timorem et iram et maerorem, si aliquid habuit iudicii, viderit necesse est. Sive igitur is, etsi ei Sarranae in hac comoedia non minus, quam in altera, displicere debuerunt, tamen nihil hoc loco mutavit et in eo sibi non constitit, sive correctionem ab eodem factam delet dies (quippe mutationi fidem hic non faciente ulla ratione subjecta), ab ejus manu in praefationem Phormionis profectum non videtur nomen Sarranarum. Testimonio de his tibiis fabulae hujus propriis nullum quidem firmiter accedit a duobus libris recognitionis Calliopianae, in quos earum tibiaram mentionem e Donati codicibus translata esse, recte, ut videtur, iudicatum est (v. supra p. 52 annot. 5), sed nonnulla et non reticenda commendatio ex eo, quod, dum ad unum omnes codices Calliopiani Phormionem ludis Romanis actam esse tradunt, libro Bembino, auctori omnium gravissimo\*), inter pauca, quae e didascalis in eo restant, ludis Megalensibus hanc comoediam actam memoranti, cum Donato convenit, quare ex eodem fonte, unde haec res communiter petita, etiam id, quod de tibiis apud Donatum est, derivatum esse potest. Jam si quaeritur, utrae tibiae — impares, quarum modis „mistim joci et gravitates“ expressa esse narrantur, quam rem exemplum in Heautontimorumenos mox ostendet, an Sarranae, quae „sua gravitate seriam comoediae dictionem“ prosequerentur et ceteroquin in iis, quae de Adelphis disputavimus, satis descriptae sunt — canticis Phormionis potius congruere videantur, quo pacto his bene adhiberi tibiae impares potuerint, non perspicitur, Sarranas ubique consentaneas fuisse perspicuum est. Etenim primum canticum ab hilaritate et joco tam alienum est, ut nihil possit supra; neque aliter alterum se habet ipsum, quamquam diverbia ei inserta cavillationis plena sunt, ut tamen quivis debeat arbitrari non has tam breves interlocutiones aliis

---

\*) Erratum Gepperti, qui didascalias in codice Bembino neque eadem manu, ac ceteras codicis partes, neque iisdem litteris lapidariis, sed inclinatis minusculis scriptas esse ait (p. 572), correctum est post librum denuo inspectum ab aliis; cfr. Wilmannsius p. 3.

tibiis eguisse, quam canticum, huic autem, ut incedit graviter atque minaciter, idoneas, si ulli, Sarranas fuisse, non item alteras, quae, quandoquidem in scena unus tibicen sive pythaulus adesse solebat, qui, quo major vis soni esset, duas simul tibias inflabat, non ita videntur serius cum joco miscuisse, ut nunc illud solum cum sua gravitate sonaret, nunc hic per se separatim luderet, sed, quod etiam ex *Heautontimorumenos* apparebit, medium inter duo contraria tenuisse, utriusque significationis hoc modo participes; in eo autem cantico, quod *Sostratae* est, questus et lamentatio hujus, quae maesta et spe orbata progressa est, et in *diverbiis* interpositis admiratio dubitantis *Chremetis*, qui nutricem filiae subito videt et tandem agnoscit, proponuntur, quae omnia sunt minime jocosa, sed contra quam maxime severa et seria. Ex iis vero canticis brevibus, quorum unum tribuimus *Antiphoni* in actu tertio et alterum *Getae* in quinto, illud solliciti et anxii animi est, hoc e contrario gaudio abundantis, et utriusque *Sarranae* convenerunt, quibus non solum in tristibus rebus, verum etiam in laetis utebantur, ut declarant, quae supra explicata sunt de harum tibiis usu in *Sticho Plautina*, qua in comoedia cantico *Pinacii* servi, laetissimum nuntium apportantis, conspicua similitudo est cum brevi hoc *Getae*. Denique *diverbia* ad tibias modulata, quae indicavimus, etiamsi tibiis imparibus apta, at etiam *Sarranis* fuisse dicenda sunt. De qua re deque musica ceteroquin in *Phormione* prolata nihil addimus, ne in quaestione tali plura dicamus, quam necesse est. Superiora sufficiant ad illud probandum, verisimilius videri, quod de tibiis hujus fabulae *Donatus* habet, quam quod libri e *Calliopii* recognitione, quae ad nonum seculum refertur, pendentes offerunt. Aliter, ac nos, viri docti omnes, quorum sententiam vidimus, de hac re judicarunt, qui *didascaliae Calliopianae* quam *Donato* credere maluerunt propter varias ac diversas rationes, quas enumerare non attinet\*), sed communiter ob eam causam, quod de canticis hujus comoediae aut nihil aut non satis accurate quaesiverunt. — Unum restat, quod breviter eloquamur. Huic fabulae aliis temporibus alias tibias fuisse quispiam conjectaverit, et eo magis quod in narratione *Donati* atque etiam in *didascaliae* reliquiis libri *Bembini* memoria duarum actionum fabulae, quarum prior anno u. c. 593, posterior a. 613 fuit, continetur\*\*). Nec vero adhuc hac via inter *Donatum* et *Terentii* codices de tibiis *Phormionis* dijudicare doctis placuit, idque jure. Causae autem, cur ita sentiendum sit, generales — ne quid sin-

\*) Cftr. praeter editores *Boeckhius* p. 169, *Benfejus* p. 69, *Wilmannsius* p. 47, *Dziatzkius* p. 72, *Kohlius* p. 55.

\*\*) Cftr. de his rebus *Geppertus* p. 561 et *Dziatzkius* p. 70—72.



gillatim de hac comoedia adjiciamus — prorsus eadem sunt, quarum ratione habita negandum est tibiatarum genus Heautontimorumenos semel ab artifice musico datum postea mutatum esse; quam ad fabulam jam transimus.

IV. Heautontimorumenos acta est, secundum codicem Bembinum, *primum tibiis imparibus, deinde duabus dextris*; eodemque redeunt, quae sunt in libris Calliopianis vetustioribus, *prima* pro *primum* habentibus, nullius vero momenti sunt majores varietates junioribus eorum per grammaticos et librarios illatae \*). Donati praefationem et commentarios ad hanc fabulam non exstare notum est.

Cantica sunt duo, quorum utrumque a Wolffio notatum et extra omnem dubitationem, etsi hic quoque tacent editores et interpretes, ponendum est. Prius comprehenditur actus 1:i scena 3, quae ultima est (perperam a plerisque vocatur act. 2:i sc. 1), i. e. versibus fabulae 213—229, posterius act. 3:ii sc. 6 (quae male \*\*) plerumque inscribitur IV. 2), h. e. vers. f. 668—678. Agit illud Clitipho adolescens, hoc Syrus, audax et astutus servus. Utrumque versuum iambicorum octonariorum et sine interlocutionibus est. Plura non sunt cantica in hac *stataria* (prolog. v. 36). — Neque nisi unum diverbium modulatum annotabimus, etiamsi, id quod vix dubitamus, plura sint. Postquam Clitipho canticum egit, quo in extrema protasi statum rerum ad amorem hujus adolescentis attinentium exponi poeta voluit, et, cum juvenis abiisset, tibicen assis tibiis paulisper cecinit, novi actus hoc factum est initium (in v. f. 230—234):

CLIN. *Si mihi secundae res de amore meo essent, iam dudum scio  
Venissent: sed vereor, ne mulier me absente hic corrupta sit.  
Concurrunt multa eam opinionem quae mihi animo exaruant:  
Occasio, locus, aetas, mater quotus sub inperioſt mala,  
Quoi nil iam praeter pretium dulcest.* CLIT. *Clinia.* CLIN. *Ei  
miseró mihi.*

Breve canticum in verbis Cliniae inesse opinarer, nisi ea ratio, quae versus quintus subito in exclamationes revenientis Clitiphonis et exterriti ab eo Cliniae abit, hanc opinionem refellere videretur. Sed sine tibiis, cum hae ipso temporis momento praegrediente sonuissent, hoc soliloquium quarentis allatum esse non crediderim.

Omnis quaestio reliqua erit de tibiis et de ratione inter eas et cantica

\*) Quibus modis hae omnes discrepantiae ortae sint, Geppertus p. 557 sq. monstrat.

\*\*) Cftr. Kayserus l. c. p. 284.

ceterumque argumentum intercedente. Fuerunt, qui didascaliae de tibiis verba ita intelligenda putarint, ut fabulam, cum primum ageretur, tibiis imparibus, cum autem posteriore tempore, duabus dextris actam esse interpretati sint \*). At plurimi \*\*) verius judicarunt illas tibias in priore, has in posteriore parte comoediae adhibitas dici et ejusmodi immutationem contrariam ei rei fuisse, quam in aliis didascaliis per *tota* vocabulum (vel *totam*) tibiarum nomini additum significari etiam supra vidimus. Unum hominem Flaccum Claudii huic fabulae atque item ceteris omnibus Terentii, ad quas exstat etiam testimonium Donati, modos musicos fecisse inter libros Terentianos convenit. Musicae autem genus ab artifice ad fabulam accommodatum ab eodem aut ab alio postea cum novo quodam commutatum esse neque per se verisimile neque usquam memoratum est, et tali opinione adversantur verba Donati in scripto de comoedia et Ciceronis Acad. II. 7. 20, quae ante proposita sunt (p. 29). Itaque hinc jam apparet veram eam esse, quam sequimur, interpretationem didascaliae Heautontimorumeni. Sed fac tamen Flaccum Claudii post fabulam primum actam modorum suorum poenituisse novasque ei tibias rejectis veteribus substituere placuisse: suspicari certe posse debebamus, quam ob causam pro tibiis imparibus, quibus hanc comoediam totam modulatus esse credi sane posset, hilaritatem dextrarum postea ubique, quamvis in principio reluctantante argumento et quidem etiam in cantico primi actus sollicitudine satis referto, allaturus fuisset. At enim dextras tibias intellexerunt graves, severas, tristes, qui plurium actionum rationem in didascalia haberi dixerunt. Fateor; sed posteriori hujus comoediae parti alacritate exsultantes sonos tibiarum, priori autem severiores vel eos, quibus, ut ait Donatus, „mistim joci et gravitates“ exprimebantur, consentaneos fuisse nunc docebo. Impares enim tibiae aptissimae videntur, si respicitur actus primus, in quo poenitentia et labores patris semet punientis exhibentur, mox autem inexpectatus domum reditus, patre insciente, Cliniae, filii desiderati, consolatori maestis parentis narratur, qui denique actus finitur cantico Clitiphonis. Hoc cantico adolescens dissolutus et petulans iniquitates in filios parentum ac nominatim sui in se patris contumacius queritur et de molestia sibi e procacis et magnificae amicae postulationibus atque pecuniae angustiis suis nata adjungit questus, qui item animi habitum depingunt inter gravem aegritudinem et negligentem levitatem medium et ob eam causam congruentem tibiis imparibus. Ubi pri-

\*) Sic Grysaerus l. c. p. 377 sq. et Friedlaenderus in Antiquitatibus Marquardtii p. 542 sq., annot. 3466.

\*\*) Praeter alios Ritschellius l. c. p. 263.

mus actus ad finem perductus est, alterum eadem tibiae commode praeparaverunt, quo in actu Cliniae de fide Antiphilae desperantis magnus, sed vanus pavor et ejusdem post adventum puellae laetitia inter omnia eminent. Verum hunc post actum, cum felices amantes modo convenerunt et in aedibus Chremetis coena jucunde in novum diem producit, cum etiam in eo est ut afflictus senex Menedemus nato ei restituendo omni cura levetur, et ut Antiphila filia Chremetis esse reperiatur, cum sic ab hac parte jam in media fabula tamquam e mari procelloso in portum tranquillum navigatur, nonne tam laetas rerum mutationes inter actum alterum et tertium mutatis tibiis et duarum dextrarum dextris ominibus indicari decuit? Sed eadem tibiae, cum semel successissent, in reliqua fabula, id quod didascalica docet, canere perrexerunt. Et quidni perrexerint? Quae sunt ibi infortunia, quorum causa inter actus retineri non potuerint? Videamus, quomodo res se habeant Clitiphonis, Chremetis, Syri. Hujus postquam doli jam antea prospero successu nexi sunt, nunc novi continenter nectuntur. Induxerat in domum heri amicam Clitiphonis Bacchidem, cujus is aspectu et sermone coram patre decepto fruitur, qua mox in aedes Menedemi traducta plenissime potitus esse narratur (act. 5 sc. 1 v. 29 sqq.). Haec lascivia, sicut ea, quam in Eunuchio item duae dextrae tibiae celebraverunt, haud dubie olim non visa est nisi perridicula. Intendit Syrus etiam fallacias, quibus argentum Clitipho, quod Bacchidi det, accipiat. Accipit a patre, qui paulo post cognoscit se turpiter delusum neque esse Bacchidem amicam Cliniae. Quid sequitur? Senex vehementer ille quidem irascitur et minatur, quemadmodum idem antea uxori, quod dicto audiens sibi non fuisset, paulisper succenset; ac poenam subito justissimam brevi timore, ne expellatur et exheredetur, impudens filius; huic vero mox, deprecantibus pro eo matre et Menedemo, uxorem se ducturum promittenti datur venia, atque ignoscitur etiam Syro non punito, qui numquam animum desponderat. Num igitur hae irae et minae, num hi timores, qui tam cito evanescent, efficere debuerunt, ne tibiae inter actus sonos laetos ederent? Intelligant ii, qui dextras tibias tristes interpretantur, quam valde erraverint, et quantum eos consilium poetae et hujus comoediae ratio fefellerit \*). Superest autem, ut de cantico posteriore loquamur, quod nuper Wilmannsius (p. 42) contra Boeckhium testari tibias dextras graviter, triste, maeste, non contra

\*) Boeckhii de musica hujus fabulae verba (p. 168) afferre juvat: *Der Heautontimoromos, der anfangs natürlich weniger lustig ist, hatte vornenherein die Musik imparium tibiarum, welche aus Discant und Bass zusammengesetzt ist; hernach wird er mit duabus dextris fortgesetzt. Also die glückliche Katastrophe sollte mit traurigern Tönen begleitet worden seyn, als der Anfang? Unmöglich! Dextrae müssen höhere Töne haben.*

acute et alacriter sonuisse opinatus est. Syrus, cum Antiphilam parentes filiam agnovissent, veretur, ne non diutius Bacchis pro amica Cliniae haberi possit, et secum deliberans hoc canticum agit:

*Nisi me ánimus fallit, háud multum a me áberit infortúnium:*

*Ita hác re in angustum óppido nunc meae coguntur cópiae:*

*Nisi áliquíd uideo, ne ésse amicam hanc gnáti resciscát senex.*

*Nam quód de argento spérem aut posse póstulem me fállere,*

5. *Nil ést: triumpho, si licet me látere tecto abscédere.*

*Cruciór bolum mihi tántum ereptum tám desubito e faúcibus*

*Quid agam? aut quid comminiscar? ratio de integro ineundást mihi.*

*Nil tám difícilest, quín quaerendo inuéstigari póssiet.*

*Quid si hóc nunc sic incipiam? nil est. quid, sic? tantundem égero.*

10. *At sic opinor. nón potest. immo óptume. eugae habeo óptumam.*

*Retraham hércle opinor ád me idem illud fúgituom argentum tamen.*

Wolffius qvidem Syrum „vehementer aestuantem ingemere et conqueri“ ait (p. 48), sed qvem etiam Wilmannsius „anxium et sollicitum loqui“ dicit, satis is intrepidum se praebet. In ipsis primis verbis (*nisi me animus fallit*) a joculari licentia non abstinet, his verbis contumaciter iterando idem initium sermonis Sostratae, qvo nuntium de filia sibi reddita modo apportavit (vers. f. 614); et quamquam simul fatetur servus infortunium prope esse, nisi provideat, tamen de salute adeo non desperat, ut ipsa magnitudine periculi ad majora audenda excitetur et imminente discrimine ne possit qvidem a se impetrare, ut argentum illud fugitivum retrahere conari desistat. Non metu ille ac timore, sed audax consilium persequendi et novas rationes excogitandi studio cruciatur (v. 6 sqq.). Dixerit fortasse aliquis rem in hoc cantico parumper ad impares tibias rediisse; sed quam ob rem duae dextrae, quae inter actus posteriores machinationibus Syri et earum eventis acuto sono praeludebant, non etiam hoc loco consultantí secum machinatori succinere bene poterint, eo minus apparet, qvòd paulo post videbimus in alio cantico deliberationes callidi servi ad easdem tibias astute habitas.

V. Ad Andriam codex Bembinus, in qvo desunt omnia ab initio usque ad v. f. 786, nullam didascaliam habet, neque e libris Calliopianis habere ullus dicitur praeter unum Parisinum isque recentiore manu e Donati praefatione adscriptam \*). Itaque solus auctor hic est Donatus; cujus illud ad quaestionem nostram pertinet: *Modos fecit Flaccus Claudii filius tibiis*

\*) Cfr. Geppertus p. 575 sq.

*paribus dextris et sinistris. Et est tota Graeca cet. — — — Diverbiis et \*) canticis lepide distincta est.*

Hoc loco quaerendum sit, num satis fidei in hac re operi Donati soli adjungi possit, cum id de cantu tibiaram in Adelphis et Eunucho tam falsa tradiderit. At in eodem opere e fonte vetusto verum de tibiis Phormionis haustum esse nobis visum est, neque de Hecyrae quidem „tibiis paribus“ ei non convenit cum libro Bembino et cum Calliopio. Ac quoniam omnis error illius, per quem narratio Donati ad Adelphos et Eunuchum corrupta est, in hoc consistit, quod opinio ejus hominis proprietates tibiaram dextrarum et sinistrarum inter se permutavit, illum corruptorem sicut ad Hecyrae „tibiis pares“, quae verba separatim per se quodque eorum generum adhibitum significant (cfr. p. 19 supra), falsa ejus sententia de horum generum sonis, cum tamen fabulae utrumque genus assignatum videret, ad mutandum non commovit, ita ob eandem causam id, quod de Andriae tibiis paribus relatum erat, non magis debuit offendere. In praefatione autem hujus comoediae, quae ordine prima omnium in libris est, ideo, ut jam ante diximus, Donatus addidisse videtur explicationem „dextris et sinistris“, quae, rem dilucide explanans, immerito nuper contra Donatum et ejus fidem turbas movit \*\*). Nemo vero dubitaverit, quin in universum ea, quae de Andria fabula acta Donatus in praefatione attulit, auctorem habuerint didascaliam, in qua — id quod de omnibus ejusmodi exemplis, ut paulo ante memoravimus, aliorum intelligentia vidit — ad tibiis pertinens vox *tota* errato postea relata est ad mentionem fabulae poetae Graeci. Itaque verba didascaliae, unde orta sunt Donati de

---

\*) Pro hoc et male est in quibusdam editionibus *aut*, quamquam elementis suis convenientius cum initio, unde incipit mendosum illud *autenticis* (v. annot. Klotzii p. 3 vol. 1) vel *authenticis* (*diverbiis authenticis*), quod in omnibus libris scriptis esse dicit Lindenbruchius in editionis Westerhovianae, quam Stallbaumius curavit, vol. 6 p. 199. Conjicio scribendum esse *diverbiis autem et canticis*.

\*\*) Ea jam ante commemorata spectamus, quae Dziatzkius non bene neque probabiliter disserit p. 595—597, — (quae Kohlius p. 59 et 55 de erroribus a Donato commissis somniavit, ne digna quidem sunt, quae respiciantur) —; quamquam ille Donato verba vitiosa *tibiis paribus dextris vel sinistris*, ex uno codice Parisino sumpta, tribuere mavult. Ceterum vir doctus in titulo, unde relatio Donati originem duxit, *Tibiis (tibiis) paribus tota* fuisse jam dicit, et sic est etiam in editione Fleckeiseni. Quod vero — ut reliqua Dziatzkii, quae ante attigimus, hic omittamus — negat ita scribi potuisse de duarum dextrarum totidemque sinistrarum vicissitudine, brevitatem significationis, cum aliarum partium horum titulorum breviloquentia congruentem, declarandam ante eodem loco (p. 19) suscepimus, neque illud *tota* non recte se habet, additum ut indicaret nullas tibiis praeter duo genera alternis adhibita huic comoediae esse.

modis musicis hujusce comoediae, haec fuerunt: *Modos fecit Flaccus Claudii Tibiis paribus tota.* (Graeca Menandru).

In Andria duo cantica clarissimis indiciis perfacile agnoscuntur, nec plura esse putat Wolffius, eademque Benfejus quoque et Gryсарus commemorant. Eorum prius, metro valde vario iambico et trochaico conspicuum, quod agit Pamphilus, juvenis curis amoris gravibus afflicto, in se continent act. 2:i sc. 4:ae (ut recte disposuit Fleckeisenus, — ex vetere ratione act. 1:i sc. 5:ae) versus 1—29 (v. f. 236—264), in quibus est etiam diverbium quater immixtum Mysidis ancillae, quae cum quartum secum loqui coepit in posteriore parte versus 29, porro verba facere pergit, donec post v. 31 tandem auditam et visam juvenis affatur. De quo cantico illud monendum est, post secundum et tertium diverbium modos ipsius cantici fortasse una cum argumento et metro mutatos esse, diverbia autem omnia cum membris cantici tam prope connexa esse (cfr. inprimis v. 16), ut etiam haec diverbia ad tibiae modulata fuisse intelligatur; neque prius illae siluisse videntur quam ad v. 32. Alterum horum canticorum \*), e versibus dactylicis, creticis, bacchiacis aliorumque varietate compositum, quod Charini adolescentis querelas amatorias sine ulla interlocutione proponit, comprehenditur act. 4:i sc. 1:ae versibus 1—17 (v. f. 625—641). Jam quia haec ambo cantica summam desperationem animi, maestitiam indignationemque exprimunt, et modi musici eorum ab omni hilaritate longe abfuerint necesse est, idcirco tibiae pares sinistrae utrique convenerunt. Verum nulli igitur hujus fabulae cantico pares dextrae, nisi numerus canticorum major fuit. Quae plura esse significat Donatus, si quid momenti ejus voci tribuitur, hanc comoediam „diverbiis et canticis lepide *distinctam*“ dicentis. Atque insuper unum hujus generis carmen, vividis octonariis iambicis constans, verba Davi acriter incitato animo secum consultantis in act. 2:i sc. 2:ae (vulgo act. 1:i sc. 3:ae) v. 1—9 (v. f. 206—214), animadvertit Gryсарus (p. 369) et jam ante eum Benfejus (ad locum Terentii). Recte agnitum est; sed ne hoc quidem canticum — de quo commentarius Donati: „Hic brevis et comica deliberatio est, magna expectatione populorum rerum imminentium commotura, metu et cura aestuantis Davi consideratione proposita“ — eam habet vim ridiculi, ne dicam eam hilaritatem, ut, solum per se spectatum, tibiis dextris satis respondisse dicendum sit. Est etiam brevius, mox transiens in sermonem cantui minime aptum, quem pedestribus senariis Davus secum persequitur (v. 215—227). Itaque vere mihi videor sic sentire, hoc brevi cantico continuari aliud ejusdem Davi, qui, cum

\*) In hoc Gryсарus triplicis modorum varietatis locos agnovit et signavit p. 374 sq.

primum ex aedibus exiit domini, quem foris astantem non conspicit, metro concitato et variato, ut canticum accommodatum sit, sensa animi enuntiat, interloquente semel — ut apparet, ad tibias — Simone. Versus huc pertinentes (4—12 sc. 1 act. 2, ante correctionem Fleckeiseni sc. 2 act. 1, — v. f. 175—183) hi sunt:

DA. *Mirábar, hoc si sic abiret: ét eri semper lénitas*

*Verébar, quorsum euáderet:*

*Qui póstquam audierat, nón datum iri filio uxorem suo,*

*Númquam quoiquam nóstrum uerbum fécit neque id aegré tulit.*

SI. *Át nunc faciet, néque, ut opinor, sine tuo magnó malo.*

DA. *Id uóluit, nos sic néc opinantis dúci falso gáudio,*

*Sperántis iam amotó metu, interea óscitantis ópprimi,*

*Vt ne ésset spatium cógitandi ad disturbandas núptias:*

*Astúte! SI. Carnuféx quae loquitur? DA. Érus est, neque prouideram.*

In *astute*, quam exclamationem „et gestu et vultu servili et cum agitatione capitis“ prolatam esse Donatus narrat, clarissimo cum sono tibias conticuisse et reliqua ejusdem versus sine tibiis pronuntiata esse intelligi potest. Hi versus, quibus Davus, servus versutus et callidus, secundas, ut Donatus dicit, in fabula partes tenens, primas tenente Simone, tertias Chremete, primum „insinuat spectatoribus, multa gesturus“ (verba sunt Donati), pauciores tamen viderentur, quam quos canticum esse putaremus, nisi post colloquium Simonis et Davi facetum nec ita longum a servo, solo relicto, continuaretur. Nunc vero qui considerat actum secundum distinctum sic esse: versus 172—174 diverbium, 175—183 canticum cum diverbio, 183—205 diverbium, 206—214 canticum, 215—235 diverbium, 236—266 canticum cum diverbio, 267—300 diverbium, recordari debet illud Donati de hac comoedia: „diverbiis et canticis lepide distincta est“. Jam quaerimus: cum primo in scenam introitu et cum primis meditationibus veteratoris audacis, qui dolos in hac fabula componit, nonne acute sonans alacritas tibiis dextrarum congruisse videatur. Congruit sane, neque cum eo tantum soliloquio, quod attulimus, quo astutum senem haud levior astutia velut ad certamen provocat, verum etiam cum hoc altero servi, firmiter resistere decernentis neque sibi diffidentis:

*Enim uéro, Daue, nil locist segnitiae neque socórdiae,*

*Quantum intellexi módo senis senténtiam de núptiis:*

et quae sunt reliqua. Atque his rebus cum iis, quas ex Heautontimorumenos protulimus, cujus fabulae fallaciarum architecto Syro summa cum Davo simili-

tudo est, comparatis omnino videre licet moris fuisse, ut consiliis callidis et impavidis servorum, unde magnam partem vis comica fabularum pependit, tibiae pares dextrae comites darentur. — Cantica adhuc enumerata nobis quidem videntur nihil habere dubitationis. Minus fortasse certa quaedam alia lectoribus videbuntur. Quo pertinet hoc initium scenae 2 actus 3 (v. f. 338 sqq.):

- DA. *Di boni, boni quid porto! sed ubi inueniam Pámphilum,  
Vt metum in quo nunc est adimam atque expleam animum gaudio?*  
CH. *Laetus est nescio quid.* PA. *Nil est: non dum haec rescivit mala.*  
DA. *Quem ego nunc credo, si iam audierit sibi paratas nuptias,*  
CH. *Audin tu illum?* DA. *toto me oppido exanimatum quaerere.*  
*Sed ubi quaeram aut quo nunc primum intendam?* CH. *Cessas ad-*  
*loqui?*  
DA. *Habeo.* PA. *Daue, ades, resiste.* DA. *Quis homost, qui me . . ? o*  
*Pámphile,*  
*Te ipsum quaero. eugae Charine: ambo opportune: uos uolo.*

Davus, domum recurrens, se jam omni molestia animum Pamphili liberare posse nuntiat, ille autem, etsi procul advenientem jam ante vidit (cfr. v. 335), verba ejus exaudire non magis potest, quam Charinus, dum hic laeti quid evenisse modo e gestu servi conjectat (v. 340); ac tum demum, cum propius Davus venit, — cujus orationi ut in media sententia sermo alienus interjiciatur, eo fit, quod servus nunc cursum persequitur, nunc subsistit et verba facit vel potius loquentem gestu agit, — se aliquid audire significat Charinus (v. 342). Haec simillima sunt eorum, quae supra (p. 54 et 57) in canticis primis Phormionis (v. f. 179—192) et Adelphorum (v. f. 299—319) et in quinto Phormionis (v. f. 841—851) indicavimus, in quibus cantici signa actionis genere expressa cernerentur. Atque illa argumentatio hoc loco idem valet; sed tamen summa eorum, quae secum agit Davus, brevitatis obstare videretur, quominus ea pro cantico haberentur, praesertim cum admodum vicinum in eodem actu tertio aliud canticum non sit, nisi hujus brevitatis aliam quandam rationem, qualem etiam in superioribus agnovimus, eadem scena, ut putamus, redderet. Fuerit enim — sic opinamur — canticum versuum paucorum, modo ne his tantum versibus ejus cantus tiliarum ea in parte fabulae affuerit. Ac minime absurdum est conjicere tibias etiam cecinisse per reliquam partem hujus scenae, in qua colloquium duorum adolescentium et servi, quod paucos cantici versus sequitur, incitata animorum alacritate et vi mimica sermonis ab alia persona ad aliam post breviter dicta saepe trans-



euntis adeo excellit \*), ut actionem desideraverit maxime agitatam, cui tibiae apte intervenerint. Et, quod simul observetur, in scena superiore, quae prima ejus actus est et propterea tibiatarum cantum, si non intra se, at proxime tamen ante se habuit, eidem metro e trochaicis septenariis constanti iambicorum trochaicorumque versuum mixta varietas praecedit et concitatus sermo est. Harum igitur rerum ratione habita canticum breve cum insertis diverbiis modulatis in sex illis versibus scen. 2:ae act. 3:ii, qui sunt totius fabulae 338—343, contineri judicaverim. — Cui cantico atque item toti eidem scenae ut profecto tibiatarum parium dextrarum alacritas, praesertim mutatis interdum modis variata, ita tristis sinistrarum gravitas iis convenit canticis, quae in ultima ejusdem actus parte esse putaverim. Pamphilus initio scenae postremae intrat desperatione rerum suarum captus et ira in Davum, cujus consilium secutus invisas sibi nuptias non prohibuerit, verum accelerarit, et secum queritur, minatur deliberatque, dum Davum quaerit, qui, sibi timens et se occultans, verbis Pamphili dolore interruptis sua ter interponit, donec in oculos adolescentis incurrit. Sunt haec quoque cantici et cum cantico mixti diverbii modulati persimilia, atque talis comoediae pars omnibus numeris justa videntur, sive motus animorum graviores et gestus eam, quam fuisse apparet, vehementiam, sive metrum horum novem versuum, quod e trochaicis octonariis et septenario et iambicis octonariis compositum est, spectamus. Hunc locum (versus f. 607—615) proxime antegreditur scena, in qua Davus, abitu Simonis solus factus, inde ab exclamatione *Nullus sum*, quae abeuntis heri in eodem versu verba excipit, quantum se astutiae, quae tam male ceciderit, nunc poeniteat, ita confitetur:

*Nullus sum!*

*Quid causaest, quin hinc in pistrinum recta proficiscar uia?*

*Nil est preci loci relictum: iam perturbavi omnia.*

*Erum fefelli: in nuptias conieci erilem filium;*

*Feci hodie ut feren, insperante hoc atque inuito Pamphilo.*

*Hem astutias: quod si quiessem, nil evenisset mali.*

Qvos versus consequuntur duo, in quibus se Pamphilum venientem videre et timere Davus dicit, qui quidem, adventum novae personae nuntiantes, extra fines cantici, quae tantum is, qui solus secum esse sibi videtur, peragit, ponendi sunt. In illis vero paucis versibus scenae paenultima actus 3:ii, qui totius fabulae sunt versus 599 (a parte extrema) —604, canticum, quamvis

\*) Benfejus ad hanc scenam annotavit: *Diese Scene ist fast ganz für gute Mimen eingelegt.*

sit breve, esse opinamur; qvo ut infelix exitus fallaciae adhuc a Davo structae agnoscitur, ita primo versu qvoddammodo respicitur ad extrema ejus cantici, qvod ante Davus in actu 2:o egit, qvae verba e recognitione Fleckeiseni haec sunt:

*Si sēserit aut st quam lubitum fuerit causam céperit,  
Quo iure quaque iniuria praecipitem in pistrinum dabit!*

Wolffius utriusque in fine 3:ii actus cantici mentionem facit, sed ut haec soliloquia, qvod justo pauciorum versuum sint, cantica esse neget (p. 47). Sed aut in multis erravimus, aut saepe apud Terentium canticorum brevis propinquitate aliorum ejusmodi carminum suppletur; et propterea hoc loco duo arctis finibus circumscripta, modo duobus autem versibus sejuncta, hac vicinitate sustentantur, praeterquam qvod in primo initio actus 4:i post novem versus sequentis illud, de qvo ante diximus, positum est canticum Charini. Si quis igitur viderit esse in v. f. 599—604 canticum, in v. 605 et 606 diverbium, in v. 607—615 canticum cum diverbio modulato, in v. 616—624 diverbium, denique in v. 625—641 canticum, idem si praeterea meminerit, et qvae de scena 2:a actus 3:ii supra dicta sunt, et qvae de actu 2:o explicavimus, sic demum plenius cognoverit, qvid sibi velit illud Donati, hanc esse fabulam *diverbiis et canticis lepide distinctam*. Quamquam ne sic quidem rem totam perspexerit. Nam verisimile est, etsi plura non sunt cantica, plura esse in hac comoedia diverbia, qvae ad tibias modulata fuerint; et esse sane potest, ut Donatus etiam in hac praefatione *diverbia* dixerit non ea sententia generali, in quam accepimus, sed singillatim talia, qvae rhythmica modulatione ad tibias pronuntiata sint. Qvalia inprimis in actu quinto, cui non est canticum, qvo majore cum pompa exitus fabulae adduceretur, adhibita esse proclive suspicatu est. Sed molesta et odiosa in rebus incertis quaestione supersedemus \*). — Contra post haec dijudicare non est difficile, utrae tibiae, pares dextrae an sinistrae, inter actus cecinerint. In primo actu nihil continetur triste, sed sermo subtilis et perelegans Simonis et Sosiae, quorum huic ille rerum statum enarrat et callidum suum inventum proponit. Hic igitur

\*) Verum tamen in act. 3:ii ea scena, qvae numeranda est 8:a, (in versibus fabulae 481—488), diverbium hujusmodi arguit varietas metri, in qvo quattuor tetrametri bacchiaci praeter morem insunt. In lucem modo editum esse puerum Pamphilo tibiae laetae avo invittissimo et nuntium respuenti cecinerunt. Brevi autem Lesbiae commorationi apud puerperam, de qua re v. supra p. 44, paulo majus temporis spatium conciliatur, si putemus, manentibus, ut manent, in scena Simone et Davo (ne actus finitus videretur), tibias jam ante exitum, Lesbiae canere coepisse.

actus pares dextras post se habuisse videtur, idque hac re confirmatur, quod in secundo, cujus in priore parte astutiae continuantur, Davus post duos versus ad canticum primum agendum aggreditur, cui cantico tibiae dextrae, id quod ostendimus, comitatae sunt. In eo autem actu postquam sinistrae primum auditae sunt in cantico Pamphili, alteris tibiis, actu finito, loco non cesserunt, quoniam hoc inter canticum et finem actus nihil intervenit praeter colloquium pertriste Pamphili et Mysidis, novusque actus a sermone non minus sollicito Charini Byrriaeque et Pamphili incipit. Tum vero inde ab initio scenae 2:ae act. 3:ii pares dextrae redierunt, quae eadem convenerunt ad v. f. 481—488, de quibus vide annot. proxime superiorem. Rursus autem cum sinistras cantica Davi et Pamphili prope finem ejus actus comites habuissent, eas tibias ante act. 4:um, cujus initium Charini canticum est, locum occupatum obtinuisse nemo non concedet. Sed post ultimam scenam actus paenultimi, in qua adventus Critonis felicem rerum omnium finem praenuntiat, pares dextras actui 5:o, ubi catastropha laetae comoediae paulatim explicatur, praelusisse consentaneum atque certum est. Haec ita fuisse nemini accuratius rem reputanti negandum erit; atque ea vicissitudine tibiarum satis superque illud illustratur, quod didascalia habuit: *Tibiis paribus* (dextris et sinistris) *tota*.

VI. Hecyra, ut jam ante commemoravimus, acta est item *tibiis paribus tota*, idque et libri Bembini testimonio et Calliopianorum codicum, aliquando tamen plus minusve aberrantium, indiciis ad hoc idem omnibus aperte revocandis et Donati verbis in *tota* ita, ut Bembini libri, corrigendis et correctis\*), quare jam nihil in hoc est ambigui aut incerti. Apud Donatum etiam illud legimus: *Cantica et diverbia summo in hac favore suscepta sunt*.

In hac comoedia id canticum est, quod unum omnium in Donati commentariis nominatim indicatur. Restat enim haec annotatio grammatici ad v. f. 816: *Reliqua pars argumenti per μονωδίαν narratur*. Hoc propterea haud dubium canticum, ex iambicis septenariis compositum, quod agit Bacchis, complectuntur versus fabulae 816—840 (actus 5:i scena 3:a). Aliud praeterea Wolffius animadvertit, quod inest in act. 3:ii sc. 4:ae (quae vulgo 3:a inscribitur) v. 1—48 (v. f. 361—408), qui sunt trochaici septenarii. Ad rem probandam nihil ille dicit (p. 49), nisi satis longum id quidem soliloquium esse, ut non in eo nimia brevitatis offendat, quemadmodum in aliis quibusdam meditationibus hominum in hac fabula secum colloquentium, quas vel ob eam

\*) Ea verba vide supra p. 59. Ceterum cfr. Geppertus p. 563—566 et Dziatzkius p. 576 sq.

vel ob aliam causam cantica esse negat. Sed comparatio hujus cantici et illius, de quo testatur Donatus, similitudinem quendam intercedere ostendit, quae hoc quoque certissimum canticum esse appareat. Illud Bacchidis vix quisquam, credo, canticum, si nihil monuisset Donatus, sine quadam dubitatione nunc dixisset: nam praeter gaudii ob beneficia sua Bacchidi percepti carmine sane dignam testificationem versatur praecipue in rerum narratione ad nodum fabulae solvendum pertinentium, quas ita spectatores canendo doceri poetae placuit. Atque eum saepius in hac comoedia canticum ad ea narranda, quae non in scena aguntur, sed permagni ad rerum fabulae processum momenti sunt, adhibuisse alter locus demonstrat: ubi Pamphilus nequaquam, ut ait Wolffius, „in deliberationem venit, retineat an repudiet uxorem“, sed de repudianda jam secum ante constituto perlongam et lamentabilem, sed pantomimicae actioni aptam eorum profert enarrationem, quae in domo Phidippi viderat et audiverat. Haec duo cantica fabulae Wolffius adjudicat. Et quoniam ambo longa sunt et satis amplam praebuerunt occasionem artis pantomimicae illius in canticis agendis, quam tanti homines faciebant, expromendae, ille numerus, qui etiam est canticorum *Heautontimorumeni*, sufficere videri possit. Sed tertium nostra sententia iis accedit. Hoc bipartitum est, sicut primum canticum *Andriae*, et prior pars comprehenditur versibus totius fabulae 516—520, qui trochaici sunt — tres octonarii, unus septenarius, item unus dimeter catalecticus —, posterior autem, postquam colloquium intervenit, versibus 566—576, qui sunt octonarii iambici. Verba sunt Myrrinae matronae, cujus orationem sibi supplicis Pamphilus in cantico suo nuper in actu superiore attulit. Matrona hoc loco eadem arcana, quae ab ea Pamphilo commissa hujus canticum spectatoribus prodidit, coram his attingit atque longius persequitur, dum de anulo hic mentio primum fit, quo postea in digito Bacchidis recognito omnes totius fabulae difficultates expeditae erunt. Quas ita solutas esse narrat in suo cantico Bacchis, neque omnium fabulae personarum plures quam tres — Bacchis, Myrrina, Pamphilus — verum rei statum comperiunt: ceterae omnes de eo celantur consulto et celabuntur. Sic cum poeta argumentum hujus comoediae instituerit, statuit etiam iis scenis, quibus occulta paulatim aperiuntur, quo major earum scenarum verbis vis et spectatorum attentio conciliarentur, formam tribuere cantici. Atque ex his scenis, quibus ista arcana enuntiantur, sunt etiam duae breves, quas indicavimus, in quibus secum agit sola Myrrina, et quidem iis agit verbis, ut nullae notae necessariae cantici huic desint. Hae duae scenae recte inscribendae sunt 1 et 3 actus 4:i, qui actus a priore incipit secundum libros scriptos et argumentum Donati, qui hoc loco Varronem auctorem laudat. Sed tamen eas, et

quod interjectum est colloquium, Dacieria et post eam Bothius et alii quidam \*), in quibus ipse Fleckeisenus, ad finem actus 3:ii referunt. Causa mutatae distributionis apparet. Nam quia post partem, quam vocavimus, posteriorem cantici novae personae in scenam prodeunt, vacua post Myrrinae discessum scena indicio esse visa est actus finiti, dum e contrario antea Myrrinae ex aedibus properantis exitum in scenam sine mora sequi debere putant, postquam maritus, cujus compellationem uxor refugiat, domum introiit. At primum novarum personarum adventus nihil testatur, si statim venerunt, Myrrina domum se recipiente et tibiis jam silentibus; deinde Myrrina tum demum aspectum viri vitavit, quem ante sermone retinere et ab aditu cubiculi, in quo erat filia cum infante, prohibere debuit, cum ille

— — *audiuisse uocem pueri uisus uagientis*

et

*ita corripuit dērepente tūcitus sese ad filiam;*

unde ipse dicit, domo rursus exiens:

*Uxor ubi me ad filiam ire sensit, se duxit foras.*

Ac si interiores fabulae rationes spectamus, altera pars epitasis continetur actu tertio, quarto altera, hujus vero partis principium repetendum est a partu filiae patri primum cognito, quae res arcte connexa est cum iis, quae in actu quarto senes inter se et cum Pamphilo loquuntur, et cum advocazione ibidem Bacchidis. Ergo nihil prohibet, quominus sic sentire liceat: post vers. f. 515 et discessum etiam Lachetis tibicinem in vacua scena cecinisse; deinde matronam egressam esse et — ut persaepe canticum comitatus est jam ante inchoatus cantus tibiatarum — ad tibiis paulisper secum de rebus suis desperatis egisse, donec virum exeuntem audivit (v. 521) et, cum jam non solam se esse videret, ut in tali statu semper fit in cantico, ab hoc destitit; tum sermonem viri et uxoris amplius quadraginta versibus sine tibicine habitum esse; postremo illam, solam iterum factam, meditationes animi persequi, id est hoc loco: canticum continuare. Itaque tria sunt cantica hujus comoediae, unum ex iis bipartitum, quorum quodque singulis de tribus personis, quae nodi tandem soluti cum spectatoribus consciae fiunt, mandatum est. En concinnitas artis Terentii.

Cantica Hecyrae interlocutionibus carent. Propterea illud e praefatione Donati supra positum: *Cantica et diverbia summo in hac favore suscepta*

\*) Cfr. Benfejus p. 340.

*sunt* — non ita licet interpretari, ut diverbia intelligamus canticis interjecta; sed, quae alia diverbia dicantur, hic oritur quaestio. Totam fabulam e diverbiis et canticis compositam valde placuisse grammaticus dicit, si vulgari opinione contenti erimus. Id vero mirifice sibi repugnans narraret de fabula *saepè exclusa*, ut ipse loquitur paulo ante, qui deinde ad prologi vers. 1 de his explosa plura tradidit. At tum, cum tandem stetit fabula, totam summo favore exceptam esse dicit? Ne id quidem, ut opinor; quamquam non nego his verbis, ut nunc sunt corrupta, comoediam totam designari videri. Mira esset pertinacia in eorundem verborum repetitione, si in singulis praefationibus Donatus, ubi de prima primisve actionibus, et quem successum habuerint, refert, *cantica et diverbia* conjunctim commemorans, (quae vocabula etiam inverso ordine ponuntur), nihil nisi *cantica et reliqua omnia* significasset, nec potius, ut in canticis, ita in diverbiis quoque partes quasdam praeter cetera singillatim memorabiles intelligi voluisset. Id ipsum autem in ceteris praefationibus (nisi quod alii interpretationi in Andria, fortasse minus recte, locum concessimus) eum fecisse jam explicatum est. Quid igitur multa? Hoc loco ad Hecyram Donatus modulata ad tibias diverbia dixit, et ea quidem longiora quaedam et separatim per se, non breviter in mediis canticis, pronuntiata: quae diverbia cum canticis in tertia certe actione comoediae *summo favore suscepta* \*) esse grammaticus relatum legerat aut in Varronis libris de actionibus scenicis, quem scriptorem in ejusdem comoediae argumento de distributione actuum auctorem citat \*\*), aut in annotationibus e Varronis opere et aliunde in ipsis Terentii libris tum ascriptis, qualibus fontibus secundariis in universum Donatus in praefationibus suis usus sane videtur \*\*\*). — Plene ac certo enumerare non possumus, sed aliquatenus saltem nec temere conjectare, quae in Hecyra diverbia modulate ad tibias pronuntiata et sine dubio simul, id quod totius generis fuerit, cum magno quodam vigore gestus acta plausus populi tulerint. Actus 2 et 3 initium sumunt, ille ab Lachetis uxorem objurgantis et Sostratae pro se causam dicentis sermone turbulento, hic a Pamphili, qui redux in patriam factus omnia de conjuge timet, colloquio cum Parmenone, qui nova narrare properavit et nunc aegrum heri animum consolari

\*) Videlicet: ab actoribus; nisi verbum mendosum est. Nam sic simpliciter poni *suscepta* pro *accepta* vel *excepta* vix potuit.

\*\*) De actibus locutus addit: *Docet autem Varro neque in hac fabula neque in aliis esse mirandum, quod actus impares scenarum paginarumque sint numero, cum haec distributio in rerum descriptione, non in numero versuum constituta sit, non apud Latinos modo, verum etiam apud Graecos ipsos.*

\*\*\*) V. de hac re, quod dicit Ritschelius l. c. p. 322.

vult, dum nascitur intus puer Pamphilo et discursus cum clamore inde ortus foris auditur. Utraque scena et verbis et metro tam est commota, ut, quamdiu unus loquitur, nequedum apparet haud nescium eum esse praesentiae alterius personae, quae simul venit, de cantico facile suspiceris. In his duabus scenis (v. f. 198—242 et 281—326) tibias passim auditas esse eo est verisimilius, quod ante easdem novis actibus praecinere debuerunt. Atque item fortasse, cum ante quintum actum cecinissent, nondum mutae erant, ubi in prima scena Parmeno, ridiculus et nova sciendi cupidissimus, sed in eo studio semper delusus servus, de irrita sessione sua in arce hospitem praestolantis narrat, quae repraesentationi rerum perquam mimicae et tibiis comitibus accommodata videantur, sed canticum breve non sint, quia in cursu narrationis de Bacchide exeunte verba facit, qualia intra cantici fines de alius hominis adventu non fiunt. Affuerintne tibiae tantum huic soliloquio Parmenonis (v. f. 799—807), an etiam brevi, sed arguto sermoni, qui sequitur, Parmenonis et Bacchidis, — sequitur deinde hujus mulieris canticum, — non magis dicam, quam num forte in ultima scena vividissima et ita forsitan per totum actum quintum cecinerint. Quod si de singulis diverbiis hujus generis vera conjeci, fuerunt in ore personarum prope omnium earum, quas principes hujus comoediae Donatus nominat \*), dum unius ex his personis canticum est. Sed satis de hoc.

Ad tibias ipsas nunc venimus. Canticum ordine primum (v. f. 361—408), maxime illud flebile, et bipartitum secundum (v. f. 516—520 et 566—576), in quo nulladum spes salutis arridet matronae maestissimae, lugubribus modis tibiaram parium sinistrarum responderunt. Tertium vero (v. f. 816—840), post laetam rerum conversionem hilaritatis plenum, laetos sonos tibiaram dextrarum secum habuit. Neque difficile cognitu est, ubi inter actus et in iis partibus fabulae, quibus ad tibias pronuntiatum diverbium esse potuisse credimus, pares dextrae sinistris successerint. Post nubilum rerum statum in actu 1:o expositum sinistrae decebant et 2:i iram maritalem, quae in ipso initio tumultuatur, ceteraque in eodem actu tristitia, iracundia, timore ubique referta et 3:um totum, in cujus jam principio supra modum maeret, omnia timens, infelix ille Pamphilus, denique etiam 4:um, cui color manet tristis et austerus usque ad adventum Bacchidis. Sed inter 4:um et 5:um nova rerum omnium facies interim exorta novis tibiis nuntiari debuit, et in hoc actu canticum Bacchidis, et quae id sequuntur laetissima, antecedunt, ut jam admo-

---

\*) Atque in hac primae partes sunt Lachetis, secundae Pamphili, tertiae Phidippi, quartae Parmenonis.

nuimus, ridicula narratio Parmenonis et colloquium Bacchidis cum eo, cujus nova noscendi cupiditas hic quoque et instigatur et fallitur, cum quibus actus ultimi principiis tibiae laetae, si ullae, congruerunt. Atque hinc intelligitur verba *tibiis paribus tota* plane sic, ut ad Andriam, explicanda esse, tametsi vicissitudo dextrarum et sinistrarum non in hac comoedia talis, qualis in illa, fuit, sed tibiae dextrae semel admissae postea manserunt. Patet simul etiam illud, in hac parte tituli Hecyrae nihil, neque dextrarum neque sinistrarum nomen, ut alii arbitrati sunt \*), excidisse, sed more in didascaliiis recepto *tibiis paribus* pro *tibiis paribus dextris et tibiis paribus sinistris* scriptum esse (cfr. supra p. 19).

Quod pollicitus eram fore, ut de tibiis ante dicta in comoediis perlustrandis confirmarentur (p. 17 sq.), id jam impletum esse opinor. Nunc in conspectu ponam cantica Terentii et immixta iis diverbia ad tibias modulata, praeterea ad fabulas tibiis earum annotatis, omissis autem in hac tabula iis longioribus extra cantica diverbiis, quae ad tibicinis cantum pronuntiata esse videntur, quia omnino incertiora sunt, quae de his suspicatus sum.

Andria. Acta *tibiis paribus* (dextris et sinistris) *tota*.

1a) Versus fabulae 175—183: i initium (actus 2: i scenae 1: ae versus 4—12: i initium) prior pars cantici, cum diverbio. 1b) V. f. 206—214 (act. 2: i sc. 2: ae v. 1—9) posterior pars cantici. Vid. p. 67 sq.

2) V. f. 236—264 (act. 2: i sc. 4: ae v. 1—29) canticum cum diverbio. Vid. p. 67.

3) V. f. 338—343 (act. 3: ii sc. 2: ae v. 1—6) canticum cum diverbio. Vid. p. 69 sq.

4 et 5) V. f. 599 (in fine) —604 (act. 3: ii sc. 12: ae v. 1—6) et v. f.

\*) Wilmaunsius, cui tibias dextras tristes videri vidimus, dicit p. 47: „Quod ad Hecyram pertinet, cum omnes testes eam tibiis paribus actam esse consentiant, utrum dextris an sinistris temperata fuerit nescimus: verisimile autem est, si totius fabulae naturam respicimus, tibiis dextris tibicinem cecinisse“. Et Boeckhii de tibiis Hecyrae haec sunt p. 169: *Von der Hecyra, als einer weinerlichen Komödie, welche paribus (ohne nähere Bestimmung) aufgeführt worden, liesse sich annehmen, dass sie mit tiefen (Flöten) begleitet wurde*. Idem p. 167: *Steht pares allein, wie in der Didaskalie der Hecyra, so fehlt die nähere Bestimmung aus Nachlässigkeit der Grammatiker oder Abschreiber*. Ac ne quod genus opinionis abesset, ne maxime quidem falsum, Kohlius p. 34 viri summi verba ita impugnat, ut ipse hilares et acutas dextras toti huic fabulae addiderit.



607—615 (act. 3:ii sc. 13:ae v. 1—9) duo cantica, posterius cum diverbio.  
Vid. p. 70 sq.

6) V. f. 625—641 (act. 4:i sc. 1:ae v. 1—17) canticum. Vid. p. 67.

Eunuchus. *Acta tibiis duabus dextris tota.*

1) V. f. 232—264 (act. 2:i sc. 2:ae v. 1—33) canticum cum diverbio.  
Vid. p. 43.

2) V. f. 292—303 (act. 2:i sc. 3:ae v. 1—12) canticum cum diverbio.  
Vid. p. 43 sq.

3) V. f. 549—556 (act. 4:i sc. 2:ae v. 1—8) canticum. Vid. p. 45.

4) V. f. 615—628 (act. 4:i sc. 3:a) canticum. Vid. p. 45 sq.

Heautontimorumenos. *Acta primum tibiis imparibus, deinde  
duabus dextris.*

1) V. f. 213—229 (act. 1:i sc. 3:a) canticum. Vid. p. 62 sq.

2) V. f. 668—678 (act. 3:ii sc. 6:a) canticum. Vid. p. 62 et 65.

Phormio. *Acta tibiis Sarranis tota.*

1) V. f. 179—192 (act. 2:i sc. 2:ae v. 1—15) canticum cum diverbio.  
Vid. p. 53 sq.

2) V. f. 231—246 (act. 2:i sc. 3:ae v. 1—16) canticum cum diverbio.  
Vid. p. 54 sq.

3) V. f. 465—470 (act. 3:ii sc. 4:ae v. 1—6) canticum. Vid. p. 58 sq.

4) V. f. 728—738 (act. 4:i sc. 6:ae v. 1—11) canticum cum diverbio.  
Vid. p. 55 sq.

5) V. f. 841—851 (act. 5:i sc. 6:ae v. 1—11) canticum cum diverbio.  
Vid. p. 57 sq.

Hecyra. *Acta tibiis paribus (dextris et sinistris) tota.*

1) V. f. 361—408 (act. 3:ii sc. 4:ae v. 1—48) canticum. Vid. p. 72 sq.

2a) V. f. 516—520 (act. 4:i sc. 1:ae v. 1—5) prior pars cantici. 2b)  
V. f. 566—576 (act. 4:i sc. 3:a) cantici posterior pars. Vid. p. 73 sq.

3) V. f. 816—840 (act. 5:i sc. 3:a) canticum. Vid. p. 72.

Adelphi. *Acta tibiis Sarranis tota.*

1) V. f. 196 (in posteriore parte) —208 (act. 2:i sc. 2:a) canticum. Vid.  
p. 38—40.

- 2) V. f. 254—259 (act. 2:i sc. 4:ae v. 1—6) canticum. Vid. p. 38 sq.
- 3) V. f. 299—319 (act. 3:ii sc. 2:ae v. 1—21) canticum cum diverbio. Vid. p. 35—37.
- 4) V. f. 610—633 (act. 4:i sc. 4:ae v. 1—25) canticum. Vid. p. 37 sq.
- 5) V. f. 855—881 (act. 5:i sc. 1:a) canticum Vid. p. 38 et 40.

## II. Emendationes Terentianae.

Superiori disputationi quaestionum criticarum specimen parvum adjungimus. Praefandi causa hoc tantum dicimus, emendationis in Terentii fabulis progressus a conjecturis probabilibus jam maximam partem exspectandos videri, cum e duobus codicum Terentianorum generibus \*) alterius exemplum unicum nunc in bibliothecis reperiri potuerit liber Bembinus, alterius vero, e censura Calliopii, ut in vetustissimo quoque libro subscriptio indicat, ducti et mutationibus ab hoc viro circa seculum nonum excogitatis a poetae verbis remotioris, exempla, quorum multitudo paene infinita esse dicitur, auctoritatem antiquitatis in discrepantiis raro redoleant, cumque codex Bembinus, qui manu hominis parum eruditi, sed jam quarto seculo scriptus est, multis et magnis erratis et ipse inquinatus sit. Emendationes nostrae omnes, quas iudicio intelligentium committimus, conjecturae sunt, ad menda quaedam antiquitatis orta corrigenda destinatae. Quod aut de communi codicum scriptura aut separatim de Bembinus in sqq. passim retulimus, editorum iudiciis debemus.

### I.

#### Heautontim. v. 645.

Sostrata, uxor Chremetis, postquam ei maritus exprobravit imperium suum de filiola exponenda male eam olim exsecutam vitae fortasse meretriciae vel etiam servili filiam servavisse, suppliciter orans ita inducitur in editione Fleck-eiseni \*\*):

\*) Vid. Ritschelii *de emendatione fabularum Terentianarum disputatio* (programma Vratislaviense ed. a. 1838), p. 10—12. Ofr. etiam Kraussii *Quaestiones Terentianae criticae* (ed. Bonnae 1850), p. 15—17.

\*\*) Ex hac editione versus Terentii etiam in sqq. afferuntur, levi tamen facta in verbis scribendis commutatione, quae attinet ad *u* et *v*, *i* et *j* litteras ad nostrum scribendi modum ubique in hac posteriore parte hujus operis distinctas, ne nimia varietas, quae hic oritura erat, oculos offenderet.

*Mi Chremes, peccavi, fateor: vincor. nunc hoc te obsecro,  
Quando tuos est animus natu gravior, ignoscēntior,  
Ut meae stultitiae in justitia tuā sit aliquid praesidi.*

Versus ille, de quo agitur, qui et in libris MSS. sic est \*) et vulgo eodem modo editus, — nisi quod *quanto* librorum Fleckeisenus in *quando* Erasmo duce mutavit, — quin nonnullis tamen displiceret, fieri non potuit: quem, a Guyeto totum tamquam spurium damnatum, Bentlejus nimia audacia ita refinxit: *Quanto tu me es annis gravior, tanto es ignoscēntior* (ubi posterius *es* imperativum esse vult). Jure autem cum Bentlejo quaeratur, num possit latine dici *animus natu gravior* pro eo quod est *aetate gravior*, tum vero, num ingenium senile adeo in universum placabile sit, ut ipsa aetas ignoscēntiores homines faciat, non potius per se, si nihil accedat, eos reddat morosiores, difficiliore, iracundiores. Editores quidam post Bentlejum parum considerate contulerunt et Horatii C. III. 14. 25 sq.: *Lenit albescens animos capillos Litium et rixae cupidos protervae*, qui versus de rixis aemulatione amatoria excitatis scripti nihil cum hoc loco commune habent, et Ovid. Trist. III. 6 (5). 31: *Quo quisque est major, magis est placabilis irae*, ubi Ovidius versum Terentianum fortasse recordatus esse et Ruhnkenio videtur et Westervohio, etsi non aetati proveciori, quam illi in animo habuerunt, sed naturae praeclarae et magnanimae placabilitatem ascribit Ovidius (ut v. s. *Et faciles motus mens generosa capit* atque exempla leonis, Achillis, Alexandri magni, Herculis satis superque docent). Neque Terentius, opinor, aliter. Nam in contentione blandissima, quam inter se et virum suum facit uxor Chremetis, quae tum quidem, cum pro se deprecatur, mater est filii jam matrimonio jungendo maturi, id est, ut legum Atticarum ratio habeatur, minimum duodeviginti annorum, non respexit in se aetatis tenerioris, verum sexus muliebris imprudentiam atque levitatem, in animo autem virili gravitatem hujus propriam, hunc animum ob id ipsum, quod gravior, i. e. constantior, fortior, prudentior, sit, ad ignoscendum proniorem esse addens \*\*), et ob eam rem ob-

\*) Quod ad illud *natu gravior* attinet. His verbis in libro Halensi a Brunsio typis expresso praepositum est *aetate*; idque ut ex interpretatione aliena inter poetae verba receptum est, sic certe se habet etiam aliorum codicum in posteriore versus parte *tanto sit vel tanto* (in margine libri Berolinensis *tanto esto ignosc.*), unde Bothius edidit (a. 1822): *Quanto tuus est animus gravior, tanto sit ignoscentior*.

\*\*) Rem illustrant, in nulla sexuum collatione, elegia Ovidii et illud Ciceronis de Off. I. 25. 88: *Nec vero audiendi, qui graviter irascendum inimicis putant idque magnanimi et fortis viri esse censebunt. Nihil enim laudabilius, nihil magno et praeclaro viro dignius placabilitate atque clementia.*

secreat, ut in viri sui *justitia*, quam falso interpretantur „lenitatem“, stultitiae suae aliquid sit praesidii, hoc est, ut justus et aequus iudex decernat non debere prudentiam expectari in muliere, quam ipsa natura non meliorem creaverit. In haec si conveniret illud *animus natu gravior*, enarratio tantum, non etiam emendatio requireretur. At nusquam spectatur in substantivo *natu* humana conditio, ut non de aetate dicatur, velut *magno natu*, *grandior natu*, *tantus natu*; neque umquam nisi in hanc sententiam id vocabulum in versu Terentii acceperunt. Sed unius modo litterulae additione opus est. Scripsisse enim poetam puto non *natu*, sed *natus*, h. e. *natura conformatus*. Cfr. ex. c. Varr. de re rust. I. 6: *alius ager bene natus, alius male*; Liv. IX. 2: *ita natus locus est: saltus duo alti, angusti silvosique sunt* cet.; Cic. de Or. I. 20: *idque cum argumentis docuerat, quod ita nati essemus, ut et blandiri suppliciter et subtiliter insinuare iis, a quibus esset petendum, et adversarios minaciter terrere possemus* cet.; Plaut. Cas. II. 5. 35: *ita rem natam intellego*. Ac re vera apud Terentium cum virili virtute levem, ut Atheniensibus vulgo visa est, et prae illa spernendam naturam feminarum conferri versus ibi sequentes explanant. Quemadmodum enim in alia scena Chremes ira rursus in uxorem mota exclamat: *Oh, pergin mulier esse?* (v. 1006), sic in hac, ubi in eam cum sensu suae dignitatis despicientiam mulieris statim exprompsit (v. 621), virilis mentis praestantia subjectissime ab ipsa concessa tam celeriter mitigatur, ut nullo aetati senili quamvis humiliter praestito honore id ita facile fieri potuisse videatur (v. 647—649); et verba Sostratae, quae tum sequuntur, non de eo commonefaciunt, quod Bentlejus annotavit, „stultos omnes et miseros esse superstitiosos“, sed apertissime feminarum stultitiam et superstitionem confitentur:

*Ut stultae et miserae omnes sumus*  
*Réligiosae, quom exponendam dó illi, de digito anulum*  
*Détraho* cet.;

ubi *misere* cum Westerhovia et aliis multo malim, quam cum Fleckeiseno et Bentlejo *miserae*. Itaque versum 645 sic constituens: *Quando tuos est animus natus gravior, ignoscentior*, mendum pervetus, quod etiam cod. Bembinus et codices Servii, ad Aen. IX. 291 versum Terentii commemorantis, habent, feliciter correxisse mihi videor.

#### II—IV.

Adelph. v. 357. Andr. v. 703. Hecyr. v. 248.

His locis vetusto errore librariorum duo verba in unum confusa esse videntur.

In Adelphorum actus 3 scena 3 Demea secum dicere inquit, ut Fleckeisenus edidit:

*Dispérri: Ctesiphónem audiui filium  
Uná fuisse in ráptione cum Aéschino.  
Id misero restat mihi mali, si illum potest,  
Qvi aliquoi reist, etiam meum ad neqvitiem addúcere.*

In libro Bemino et in aliis MSS. ultimus versus post *etiam* habet *eum*, non *meum*. Possessivum Fleckeisenus approbavit, a Bothio inventum, qui annotavit: „Friget *eum*, cum *illum* praecesserit. Raptum *m* a praegressa voce“. Qvamvis vero apte pater eum de duobus filiis, qvem fratri adoptandum non dederat, *meum* appellare potuerit, verius tamen, ut puto, erit *eum* non mutatum servare, in versu autem antecedente *illum* in *ille eum* dissolvere. Milies apud Terentium et poetas antiquiores in *ille* syllabam priorem corripere non est qvod gnaros moneam.

Andriae act. 4:i sc. 2:a Davum proponit in cogitationibus defixum, quibus consilium novum pro hero minore reperiat. Cum Pamphilus, qui servo graviter iratus non jam ei confidit, decrevit, si ita necesse foret, amore non dissimulato potestati patriae aperte obviam ire et Charinum rogavit: *Qvis videor?* hic autem respondit: *Miser, aeqve atqve ego*; haec sequuntur e recognitione Fleckeiseni:

DA. *Consilium quaero.* PA. *Fórti's,*  
*Scio, qvód conere.* DA. *Hoc égo tibi profécto effectum réddam.*

In codd. MSS. est: *Scio qvid conere*; de quo verissime Bentlejus: „Plane absurdum. Qvomodo enim vel Charinus vel Pamphilus praescire id posset? Cur etiam et postea alter interrogat *Qvid est?* alter *Qvid facies? cedo*: si jam resciscerent?“ Ipse excogitavit: *Si qvid conere*; qvod, Charino ab eo tributum, adhortantis esset. Sed diffidentis et cum ironia laudantis est, qvod servo dicitur, et qvidem a Pamphilo: utrumque enim responsione Davi firmatur. Multo autem clarior, quam cum Fleckeiseno *qvid* in *qvod* mutando, sententia fit et propius ad codicum scripturam acceditur sic:

PA. *Fórti's,*  
*Sció, qvi id cónere.* DA. *Hóc ego tibi profécto effectum réddam.*

*Scio*, qvod saepe iambus est (vid. Ritschelii Prolegom. Plautina p. CLXVII), Pamphilo necessariotribuendum est etiam in v. 669, ibi qvoqve ironice positum.

In Hecyrae act. 2:i sc. 2:ae v. 5 sqq. verba, quae sunt Lachetis, Fleckeisenus e libris ita reddidit:

*Phidippe, etsi ego meis me omnibus scio esse adprime obsequentem,  
Sed non adeo ut mea facilitas corrumpat illorum animos:  
Quod tu si idem faceres, magis in rem et vostram et nostram esset.*

Intolerabile est anacoluthon, cum in tali brevitate dicendi plane desit enuntiatio primaria. Neque id ferre potuit, quamquam agnoscitur etiam a Donato et a Charisio (p. 229 Keil.), Bentlejus, qui ideo coniecit: *Phidippe, et ego meis me omnibus* cet. At et origo vitii et semel orti pertinacia melius, opinor, hoc modo declaratur: in versu *Sed non adeo, ut mea facilitas corrumpat illorum animos*, sive compendio scripturae male intellecto sive voce dicantis non recte audita, e *sum id* factum est *sed*.

V.

Phorm. v. 368.

In prioribus versibus scenae 2:ae actus 3:ii (falso 2:i) hujus fabulae Phormio parasitus et Geta, simulantes se non videre Demiphonem et advocatos, quibuscum jam ille adest, colloquium continuant, quo Phormio nunc criminationes fictas in Demiphonem cum omni fidei ostentatione profert, Geta vero, ut a se omnes suspiciones heri avertat ab eoque gratiam ineat, hunc defendit et calumniatori saepe maledicit. Parasitus neglectum turpi avaritia Demiphonis pauperem hujus cognatum, quem totum finxit, cum qvestus est, exclamat: *At quem virum! quem ego viderim in vita optimum*. Sequitur deinde versus, qui in Fleckeiseni et aliorum editionibus hic est:

GE. *Videas te atque illum, ut narres*. PH. *I in malam crucem*.

In verbis Getae libri MSS. nihil variare dicuntur; tantum in iis, quae Phormioni tributa et in libro Bembino sic scripta sunt, varietas quaedam exstat. Neque priorem partem versus, in qua inest difficultas, correctionibus tentam vidi, praeterquam a Palmerio, quem Bentlejus merito exhibet, et ab ipso Bentlejo, qui in annotatione dicit hoc sibi in mentem venisse: *Vidisti nullum, ut narres*. *I in malam crucem*. Multa autem ad sententiam interpretandam quaesita sunt. In Donati commentariis quattuor explicationes inveniuntur, quarum tantum prima, quae ipsius Donati fortasse sola est, digna videtur, quae afferatur: *Hoc est: parem \*) te illi existimo atque illum tibi*. Recen-

\*) Hanc vocem pro absurda *parentem* conjectura inventam (v. Terentii Westerhoviani vol. 6 p. 330) inter verba Donati posuit Klotzius.

tiorum temporum enarrationes omnes eas, quas novi, commemorare superse-  
deo \*). Nam hic locus, ut nunc est, non potest idoneo et ad persvadendum  
apto modo explicari. Excidit enim vox tota, idque ita, ut saepenumero idem  
factum est in Terentio, apud quem poetam librarii antiqui saepe voces itera-  
tas aut praecedentibus vel sequentibus similes praeterierunt; velut in Adelph.  
v. 687: *Jam id peccatum primum magnum, magnum, at humanum tamen*;  
in Phorm. v. 643: Ge. *Quid? nimium quantum*. Ch. *Quantum? dic*; in  
Heaut. v. 168 sq.: *Miseretque me ejus; sed ut diei tempus est, Tempus tamen  
monere me hunc vicinum Phanium*; in Hecyr. v. 206: La. *Tu nescis?* So.  
*Nescio, ita me di ament, mi Laches*; in Hecyr. v. 201: *Itaque adeo uno  
animo omnes socrus omnis suas oderunt nurus*; in Eunuch. v. 968: *Di-  
cam huic an non dicam? dicam hercle*; in Adelph. v. 37: *Aut ceciderit  
aliqua atque aliquid praefregerit*: cfr. edit. Fleckeiseni. Praemoneo etiam  
de indubitata *malus, malum, malam* formarum pronuntiatione apud poetas ve-  
tustissimos, sicubi opus est, monosyllaba \*\*), quae in versu Terentii unam  
syllabam adjici patitur. Itaque hunc versum ita constituerim:

GE. *Videas te aequae atque illum, ut narras*. PH. *I in malam crucem*.

Clara oritur sententia. *Aequae* enim spectat ad praegressum *optimum*. Geta

\*) Ex. c. proponamus hanc Ladewigii („*Beiträge zur Kritik des Terentius*“, programma  
Neostrelciense, ed. a. 1858, p. 17): *In den Worten des Geta sehe ich einen beabsichtigten  
Doppelsinn; je nachdem nämlich das illum auf den Stilpo oder auf den Demipho bezogen  
wird, erhalten die Worte ganz verschiedene Bedeutung. Auf jenen bezogen, heissen sie: ver-  
gleiche nur dich in deiner Schlechtigkeit mit der gerühmten Vortrefflichkeit jenes; auf die-  
sen aber: schau dich und ihm bei deinen Worten an, so dass Geta seine Freude über die  
Frechheit, mit der Phorm. lügt, und über das Staunen des Dem., der seinen Ohren kaum  
trauen will, ausspricht.* — In Germanicum verba Terentii convertit Benfejus: „*Denkst sicher  
an ihn und dich nur*“, in annotatione, in qua etiam *vides* pro *videas* legi se velle ait, hanc  
interpretationem ita explicans: „*Nach deinen eigenen Worten [ut narras] siehst du nur ihn  
und dich*“; mit andern Worten: „*er mag leicht besser als du gewesen seyn, aber schlechter  
als jeder Andre*“. Beissender konnte er wohl nicht gut Beide zugleich beleidigen. — Don-  
nerus vero germanice reddidit: „*Ganz also, wie du selber!*“ Qvi rem acu prope tetigit, ta-  
metsi in annotationibus nihil de mutanda hoc loco scriptura dicit; quemadmodum etiam Stall-  
baumius aliquatenus ad veram loci sententiam appropinquat, ubi Bentleji conjectura comme-  
morata addit: „*Vereor ut quidquam mutandum sit. Phormio cum dixisset quem viderim, Geta  
ejus mendacia facete exagitaturus respondet: Possit quis te atque illum cernere, prouti nar-  
ras: h. e. adeo speciose mentiris*.“ Quamquam nihil potest esse magis falsum, quam simul  
in *videas* de subjecto indefinito et in *te* de Phormionis persona cogitare.

\*\*) V. Ritschelii Prolegomena Plautina p. CXLII sqq. et Corssenii „*Über die Aussprache,  
Vokalismus und Betonung der Lateinischen Sprache*“ II. p. 105 sqq.

igitur, cum mendacium de homine omnium optimo audivit, hoc dicit: Non minore virtute et probitate, quam ille fuerit, te ipsum esse videas, ut hoc temporis momento te ostendis, dum, impudenter mentiens, hanc rem ista veritatis specie narras. — Retinui in posteriore parte versus scripturam codicis Bemini, ut quintus pes anapaestus sit, quod permittunt duae leges metricae notissimae, correptio in monosyllabis longae vocalis ante vocalem in hiatu et neglecta saepe apud Plautum et Terentium positio in consonante in particulae; quemadmodum hoc loco eadem syllabae breves sunt in arsi pro iambo positi dactyli e lectione vulgo recepta. Et tamen etiam Donati illud „adverbialiter“, ut appellat, dictum *In malam crucem!* commendabile est, si cui displiceat correptum *I* in thesi versus iambici.

VI.

Eunuch. v. 267.

*Sed ego cesso*

*Ad Thaidem hanc deducere et rogare ad cenam ut veniat?*

*Sed Pärmenonem ante ostium † Thaidis tristem video,*

*Rivális servom: salva res. ni mirum, hisce homines frigent.*

Plane sic Fleckeisenus; qui in claudicante versu libros MSS. secutus obelum addidit. Mendo in *Thaidis* non dubio quomodo mederi conati sint editores ante Bentlejum, apud hunc vide. Ipse ita: *Set Pärmenonem ante ostium operiri tristem video*. Bothius graece reposuit *Θαιδίον*. Hermannus Element. doctr. metr. p. 151 conjecit non feliciter: *Sed Pärmenonem ante ostium hic Thaidis tristem video*, loco in quarto pede propter caesuram hiatui et pyrrichio concesso. Klotzius edidit: *Set Pärmenonem ante ostium Thaidis hic tristem video*. Denique Kayserus in censura editionis Terentii Fleckeisenianae l. c. p. 325 dicit: „*Eun. 267 könnte Thaidis halbwegs eine Corruption aus hic astantem sein, vergl. Heaut. 960: hic patrem astare aibas.*“ Cfr. etiam Phorm. v. 607: *Sed patruom video cum patre astantem*; Hecyr. v. 428: *Sed Pämphilum ipsum video stare ante ostium*; Hecyr. v. 854: *Sed Bächchidem eccam video stare ante ostium*; Plaut. Menaechm. v. 631 sq.: *Nón ego te modo hic ante aedis cum corona flórea Vidi astare?* et v. 676: *Mi Menaechme, cur ante aedis ástas?* Quorum exemplorum ratione habita certe quidem videtur, si quod intercidit verbum, *astare* vel *stare* potissimum addendum. *Thaidis* autem unde venit in versum? In quo sufficebat *ejus*, cum nomen mulieris in versu superiore jam allatum esset et ibidem ad *veniat* cogitetur. Sed enim ad eum quidem locum non absurdum erat in margine



interve lineas annotare *Thais*, et forsitan haec ipsa fuerit origo corruptionis, qua versus, de quo agitur, laborat. Ad hunc enim Donatus hoc habet: „*Thaidis*. Legitur et *Thais*“. Et constat ortum mendorum in libris veterum et in ipsius Terentii saepenumero ex eo repetendum esse, quod alienis explicationibus eae voces, quas illae ad interpretandas destinatae erant, locum cesserunt. *Ejus* vero, ut ad hanc formam redeam, pariter atque *hujus* et *cujus*, monosyllabum in Terentii, sicut in Plauti, fabulis perquam frequenter esse non opus est exemplis, in notissima re, probare. Quae cum ita sint, verisimillimum esse puto poetam scripsisse:

*Sed Pármenonem ante óstium ejûs astáre tristem vídeo.*

## VII.

Hecyr. v. 163.

Parmeno hujus fabulae Philotidi et Syrae narrat de Pamphili heri minoris rebus sollicitis, qui, cum in medio amore Bacchidis versaretur, invitissimus cogente patre Philumenam uxorem duxisset: diebus pauculis post nuptias juvenem Parmenoni dixisse intactam virginem usque ad id tempus a se relictam esse uxorem sibi obtrusam et eo se tendere, ut ipsa tandem, satis intellecto se cum hoc marito non posse vivere, consilium caperet in patris domum redire. Tum ita sermo continuatur:

PH. *Quid? intérea ibatne ad Bâcchidem?* PA. *Cotídie:*

*Sed út fit, postquam hunc álienum ab sesé videt,  
Maligna et multo mágis procax facta ílicost.*

PH. *Non édepol mirum.* PA. *Atque éa res multo máxume*

*Diiúnxit illum ab illa, postquam et ipse se  
Et illam et hanc quae dómi erat cognovít satis  
[Ad exemplum ambarum mores earum existimans].  
Haec, ita uti liberáli esse ingenió decet,  
Pudéns modesta, incómmoda atque injúrias  
Viri ómnis ferre et tégere contumélias.  
Hic ánimus partim uxóris misericórdia  
Devinctus, partim victus hujus injúriis  
Paulátim elapsust Bâcchidi atque huc tránstulit  
Amórem, postquam pár ingenium náctus est.*

Versum, de quo quaerimus, quem in omnibus codd. ita scriptum esse dicunt

et talem etiam Donatus invenisse videtur \*), uncis inclusit Fleckeisenus (cujus recognitionem hoc quoque loco reddidi), cum insiticiū etiam olim Guyetus et postea Kraussius \*\*) judicassent. Corruptum esse consentiunt multi, ut Bentlejus, Ruhnkenius, Stallbaumius; et Bentlejus quidem jure ait, tametsi non *earum* modo, sed etiam *ambarum* ad *mores* referre ei placuit: „Ad quod, quaeso, exemplum? Si dixisset: *Hujus mores ad exemplum alterius*; quid illud esset, intelligerem: sed *Ambarum mores ad exemplum* mera caligo est; nisi, quod sit exemplum, indices.“ Nam desideratur profecto nomen rei *ambarum* propriae, sed in iis dissimilis, cujus ad exemplum Pamphilus mores earum aestimaverit. Verum idem vir summus non sane probabiliter *ad amussim* posuit pro *ad exemplum*. Geppertus *aliarum* pro *ambarum* scribi vult, *earum* et cetera non mutans \*\*\*); *aliarum* etiam Kaysero l. c. p. 287 in mentem venit, et *hujus* pro *earum*; sed et Gepperti et Kayseri correctio cum sensu loci pugnat; neque enim sermo est de aliarum mulierum comparatione ulla cum Philumena et Bacchide, neque de collata cum aliis feminis Philumena sola, ut opinatur Kayserus, dicens: „*Pamphilus hätte dann das Benehmen seiner Frau mit dem anderer Weiber verglichen. Von der Bacchis kann hier keine Rede sein*“: agitur vero, ut et antegressi versus et consequentes clare docent, de collatis inter se Bacchide et Philumena. — Si pro *ambarum* reponas *amorum*, tolerabilis fortasse fit sententia. Ita enim componerentur inter se amores meretricis, ad quos tamen juvenis post nuptias numquam a pristina amica admissus est (cfr. v. 750 sqq.), et castae conjugis, quibus Pamphilus post duos menses frui coepit (cfr. v. 393 sq.), et ex ea diversitate ille tandem omnem morum et ingenii dissimilitudinem intellexisse diceretur. Sed praeposterus sic esset ordo narrationis, neque ipse hac explicatione acquiesco. Mutationibus igitur aliquanto majoribus hic versus videtur turbatus; qui plane eam sententiam, quae exspectanda est, exprimit, hoc modo correctus:

*Ad exemplum morum amorem earum existumans;*

h. e. ex malignitate et procacitate (ut Parmeno interpretabatur) Bacchidis

\*) Hoc tamen non certum est. Annotationes enim tantum exstant ad verba *ad exemplum* et *existumans*; priore illo loco haec: *Quasi ad imaginem et collationem et speciem comparationis*.

\*\*) In *Quaestionibus Terentianis criticis*, p. 45 sq., et in Museo Rhenano a. 1853 p. 547. Hoc loco fatetur non ob neglectam, quam proponit *exemplum*, positionem condemnari verum posse.

\*\*\*) „*Ueber die Aussprache des Lateinischen im älteren Drama*“, p. 90.

et rursus e verecundia, modestia, patientia indulgentiaque Philumenae iudicium faciens, quanto pluris, quam meretricis, bonae uxoris amor aestimandus esset.

## VIII. IX.

Heautontim. v. 583. Phorm. v. 20 sq.

Transpositorum, ut conjicio, versuum duo exempla afferam. In Heautontimorumeni act. 3:ii sc. 3:a Chremes ex aedibus se proripit cum Clitiphone filio, quem graviter increpat, quod eum cum sui amici, hospitio ibi excepti, Cliniae, ut senex credit, amica nimis petulanter ludentem offenderat. Est ante in scena Syrus, qui re audita bis secum loquitur, initio veritus, ne dolus audaciae singularis, quo Bacchidem, quasi amatam Cliniae puellam, in domum Chremetis introduxit, jam detectus sit. Postquam autem senex, cum filius de fide sua amicum non dubitare asseveravit, aliquanto magis sedato animo, quanta tamen cautione opus sit, ne Clitipho molestus fiat amantibus, et hanc ob causam eum praesentiam eorum vitare debere dixit idque pro sua sapientia exemplo e suo ipsius vitae usu petito confirmavit, Syrus et Clitipho inter se loquuntur; quorum ille paedagogi munus, quod sustinuerat, persequens, severe et acerbe, audiente sene, impudicitiam adolescenti objectat atque simul oblique in eo nihil nisi imprudentiam reprehendit, hic vero veteratoris verba contemptim repudiat. Tum consequitur is versus, de quo est quaestio:

CL. *Nón accedam ad illos?* CH. *Eho quaeso, una accedundi viast?*

Quod Clitiphonis hic est, id Syro dicere non potest, sed, si tamen versus hunc locum recte teneat, patri, cui ideo, quod respondetur, tribuitur; hoc vero responsum non bene se habet. Cum enim sic patrem roget filius, num revera sibi non liceat ad amicos redire, Chremes neque ait neque negat, sed quaerit, sitne una, quam noverit filius, via ad eos accedendi illa impudica. Et enim hanc sententiam e verbis Chremetis elicere studuerunt interpretes; male vero Calphurnius, interrogatione nulla in responso agnita, annotavit: „*Eho*. Hoc loco admonentis est. *Una via*. Scilicet honesta: ne quid impudice agas.“ Iudicio aliorum commissum voluerim, nonne pro tali obscuritate restitui versu transponendo lux, et hic versus sedem suam recepisse videatur eo loco, quo eum infra migrare jussi, ubi omnia eum in libris usque ad finem ejusdem scenae sequentia secundum Fleckeisenum exhibentur:

SY. *Actumst: hic prius se indicarit, quam ego argentum effécero.*

*Chremés, vin tu homini stulto mi auscultare?* CH. *Qvid faciám?* SY.  
*Jube hunc*

*Abire hinc aliquo.* CL. *Quó ego hinc abeam?* SY. *Quó lubeat: da illis locum.*

CL. *Nón accedam ad illos?* SY. *Eho quaeso, úna accedundí via est?*

*Abi deambulatum.* CL. *Deambulatum, quó?* SY. *Vah, quasi desit locus.*

*Abi sáne istac, istórsu, quovis.* CH. *Récte dicit, cénseo.*

CL. *Di te éradicent, qv̄i me hinc extrudis, Syre.*

SY. *At tū pol tibi istas pósthac comprimító manus.*

Septenarius trochaicus etiam alibi in hac eadem scena inter alios versus interjectus est. Illud autem vix opus est dici, adolescentem, cum in aedes abire conetur, a Syro interrogari, num praeter eo accedendi viam nulla ibi sit, et non modo verbis servi, sed etiam manu repelli, donec imperio patris filius obedire cogitur.

In prologi Phormionis priore parte obtrectatori suo Luscio Lavinio Terentius, ut solet, paria refert. Versus 18—21 sic sunt apud Fleckeisenum et alios:

*Ille ad famem hunc ab stúdio studuit reticere:*

*Hic répondre vóluit, non lacessere.*

*Bènedictis si certásset, audissét bene:*

*Quod ab illo adlatumst, id sibi rellatum putet.*

Non vidi quemquam offendisse horum versuum ordinem; sed tertius et quartus nescio an errato veterrimo locos inter se permutaverint. Etenim tertius, cum ipse demonstrativo careat, non satis bene consequitur eum versum, in quo *hic* pronomen ad Terentii spectat personam; et quarto, adlata relata esse memoranti, apta sedes erit proxima ab illo, in quo Terentius lacessitus respondisse dicitur. Melius ergo et a poeta, nisi forte ipse negligentius scripsit, profectum hoc est:

*Quod ab illo adlatumst, id sibi rellatum putet:*

*Benedictis si certásset, audissét bene.*

## X.

### Heautontim. v. 32.

Periculum faciam mendii pervetusti ita corrigendi, ut recepta conjectura Bentleji, quae ulcus hujus versus non sanat, sed sanandi viam praeclare iniit, praeterea elementorum levi mutatione aliam sententiam et loco commodiorem exhibeam. Actor prologi, causam poetae contra inimicum Lavinium et alios

malevolos apud populum agens, illud praeter alia dicit, si libros MSS. cum Fleckeiseno seqvimur:

*Facite aeqvi sitis: date crescendi copiam,  
Novarum qui spectandi faciunt copiam,  
Sine vitiis: ne ille pro se dictum existimet,  
Qui nuper fecit servo currenti in via  
Decesse populum: quor insano serviat?*

Si nihil mutatur, sic verba ultima interpretanda sunt, ut interrogari dicamus, cur poeta debeat insani hominis, adversarii sui, commodis servire. Sed non sine causa Bentlejus hoc admonuit: „cum *servum currentem* dixerit, *servire insano* necesse est proprie accipi, non figurate“. Et rectissime negat percipi posse, quodnam *vitium* illud fuerit, populum currenti servo de via decedentem facere: quoniam saepe apud Plautum servi et parasiti malum cuius minitantes, si quis currentibus sibi et properantibus obsistat, inducantur; velut in Curcul. v. 280—298, Stich. v. 285—287, Amphit. v. 984—987, Capt. v. 791—822; quales minationes quam frequentes in fabulis palliatis fuerint, docent verba Mercurii, Jovis nuntii persona servi induti, in Amphitruone:

*Concedite atque apscédite omnes, de via decédite.  
Nec quisquam [nunc] tam audax fuit homo qui obviam opsistat mihi.  
Nam mihi quidem hercle qui minus liceat deo minitarius  
Populo, ni decedat mihi, quam servolo in comoediis? \*)*

Sed dixerit quispiam usitatissimas illas quidem in comoediis fuisse currentium servorum minas, in eo autem Lavinium peccasse, quod populum, his minis obtemperantem, servo, quasi honoris causa magistratui, via decessisse finxerit; et id ipsum Guyetus, quem Bothius sequitur, opinatus est. At vero occurrit Bentlejus etiam ejusmodi interpretationi hoc addito, quod nemini rerum scenicarum antiquarum gnaro dubium esse potest: „Quid, quod viae istae extra scenam sunt, in scena servus minatur, ultra scenam cursurus, ideoque, utrum populus via decesserit necne, spectatores videre non poterant“. Nihil igitur restat, si, quod scriptum est in codicibus, retinetur, nisi ut cogitemus aliquem in scena commemorasse, quomodo servo omnes cives decessissent de via. Qualis narratio, seu servuli ipsius magnifice se jactantis, seu alius cuiusvis personae, quid tandem habere potuit tantae offensionis, ut Terentius Luscium Lavinium hujus rei apud spectatores accusare satis habiturus fuerit? — praesertim cum illud ne in cogitationem quidem cadat, tale quid de po-

\*) Ex editione Plauti Fleckeiseniana.

pulo Romano scriptorem fabulae palliatae in ea aliquo modo attulisse. Gravius sane quodpiam peccatum, non id, quod nullum videretur, Terentius hoc loco in adversario notavit. Itaque jure Bentlejus *decesse* rejecit et bene in ejus verbi loco posuit *dixisse*, quod jam ante Perizonius conjecerat et postea approbavit Ruhnkenius. Sed cetera in hoc versu nemo expedit. Credit enim Bentlejus a Luscio aliquem in cavea fuisse constitutum, qui populi spectantis nomine cum histrione verba faceret: hoc igitur ei poetae vitio verti, quod populum eo modo in scenam induxerit cum servo loquentem. At ipsa verba, quae e cavea dicta essent, qualia fuissent in ore loquentis cum actore spectatoris? Cum his verbis, in quibus nihil correxit Bentlejus, comparavit versum Curculionis Plautinae 200: *Cédo mihi contra aurichalco, cui ego sano serviam*, quem dicit servus domini amore insanientis, et initium Pluti Aristophaneae, ubi omnes deos servus testatur, quam sit molestum *Δοῦλον γυρόσθαι παραφρονοῦντος δεσπότου*; verum si Terentius inauditam in fabula agenda novitatem inimici criminatus esset, alio quodam modo id fecisset neque verba repetisset non sane notabilia, etiamsi haec ipsa Lavinius tribuisset homini de cavea clamanti; hic vero poeta non eorum certe verborum causa caveam in scenam commutasset. Videtur autem a servo in scena agente et spectatores, ut fit, alloquente responsum sibi datum facile fingi potuisse: quemadmodum in prologo Captivorum actor, postquam de argumento fabulae narravit, rogat: *jam hoc tenetis?* et primum addit, quasi annuerint spectatores: *optimumst*, deinde, velut si quidam negarit: *negat hercle vero ille ultimus*, et quae sequuntur reliqua. Qvis non videt non modo nutum et renutum, sed quaevis verba spectatoribus ita potuisse ab jocante histrione assignari? Atque id si in comoedia Lusci sic se habuit, ille revera *fecit servo currenti in via Dixisse populum*; sin autem reapse spectatorem cum actore loquentem induxisset, non *dixisse*, sed *dicentem populum* fecisset \*). Pergam nunc ad cetera, si possim, explicanda. Servis num Romae inter spectatores fabularum scenicarum locus concessus sit, Ritscheliuss \*\*) suo jure addubitat, ut tamen, testibus veteribus auditis, hoc judicium faciat: „legitimum quidem et quavis offensione vacuum ad caveam aditum servis non fuisse, sed eundem usu tamen, sive abusum dicere malueris, invaluisse atque id licentiae servis indulsisse magistratus.“ Cujus licentiae maxime luculenta testimonia ad tempora liberae reipublicae aetate Lusci Lavini et Terentii inferiora pertinent; ut autem

\*) Comparandus est infinitivi usus loco Horatiano Sat. I. 2. 21. Nam *pater ille, Terenti Fabula quem miserum gnato vixisse fugato Inducit*, non tam misere *vivens* proponitur in hac fabula, quam *vixisse* narratur.

\*\*) *Parergon* p. 223—225 et XIX sq.

hac aetate superiore multo minor abusus ille fuerit, acrior contra, sicut in omni disciplina, ita in servitiis a contagione malorum exemplorum, quae scena iis offerret, removendis severitas, haec ipsa res declarat majus visum tum esse peccatum poetae comici, si quis servorum infidelitatem judicio populi approbatam finxerat, id quod Lavinium fecisse conjicio. *Servus currens* in fabulis palliatis (cfr. prol. Heautont. v. 37 et Eunuch. v. 36) qualis fuerit et quomodo in magna festinatione orationes perlongas in scena habuerit, exemplis notum est. Talis igitur cursor si in fabula Luscii Lavinii talia questus est, qualia in Plauti Mercat. v. 123 sqq. Acanthio servus:

*Perii: seditionem facit lien, occupat praecordia.*

*Simul enicat suspiritus: vix siffero hercle anhelitum.*

*Perii: animam nequeo vortere: nimis nihili tibi cen siem.*

*Numquam edepol omnes balineae mi hanc lassitudinem eximent:*

vel si timores protulit, quales Stasimus in Trinummi v. 1011 sq.:

*Cave sis tibi, ne bubuli in te cottabi crebri crepent,*

*Si aberis ab eri quaestione: ne destiteris currere:*

si, inquam, in scenam prorupit querebundus, sibi timens, labores serviles aegre ferens, idemque, cum ad caveam conversus adeo iniquam sortem lamentaretur, se audire simulavit vocem spectantis, cur iste servus tam insanus esset, ut servus manere vellet, mirantis, et ita illud servis promptissimum consilium *aliquid convasandi atque protinam se in pedes conjiciendi* (vid. verba in Terent. Phorm. v. 190) sibi vel inditum vel firmatum autumavit: profecto tali exhortatione *furti et fugae* (Phorm. v. sq.) spectatoribus tributa palam laesa et bona disciplina et Qvirium dignitas videri potuit, ut actori prologi in alloquendo populo Romano adversarium Terentii hujus peccati accusare liceret, hanc addenti denuntiationem:

*De illius peccatis plura dicet, quom dabit*

*Alias novas, nisi finem maledictis facit.*

Itaque corruptum vocabulum corrigere sic ausim:

— — *ne ille pro se dictum existimet,*

*Qui nuper fecit servo currenti in via*


*Dixisse populum: quor insanus serviat?*

Etenim vitia versus proximi et mendis librarii, velut pro s duabus confinibus una littera scripta, et falsa loci explicatione oriri potuerunt.











3 6105 045 046 740

Bruner, E. 114869  
Quaestiones Terentianae.

STATE

NAME \_\_\_\_\_

DATE \_\_\_\_\_



